

A HIZOLO OMLO

Tupna Kician Anei Khangote
Thapiakna

Tuang Za Khai

Khai & Sen

Copyright © 2014 Tuang Za Khai

Copyright © by Tuang Za Khai

August 2014. Published in Chin State, Myanmar (Self
Publication with the name 'Khai & Sen').

February 2024. eBook Version.

Lai gelhpa' tung pan phalna omlo pi-in, hih laibu a
them aneng khat peuh lakhia, behlap, leh hawmkhia
cih khat peuhpeuh kibawl theilo hi. Tua bang khat
peuhpeuh abawl nuam a om zenzen leh, lai gelhpa
kiangah phalna ngen masa hamtang ding hi

Hih laibu sungah a kigelh thute pen, a piangtakpi
thute akibulphuh vive hi-in, mi lawhcing khinsate'
phuutkhak thu le late tung tawnin a luang khia thute
vive ahi hi. Hih laibu sungah, laigelhpa' ngaihsutna
ahilo, laibu dang sungah a kigelh sa Zolai tawh alet
khiat kik zong tampi kihel hi.

*Sep ding khempeuh hong sep sak , Zumna
daina leh haksatna khempeuh hong puak
sak , Thu honghilh in tha hongpia tawntung,
Ka it ka Pa Rev. Thawn Za Nang*

*Pasian' kiangah a lungdamna te khitui
luangin a pulaak, A thaneemciang' khitui
luangin thakhauh nading thu a ngen, A ta
te' a ding khitui luang mahin thu hong
ngetsak tawntung, Ka it ka Nu Nu Ciang Za
Niang*

*Te' tungah hih laibu tungtawn in
ZAHTAKNA, ITNA leh LUNGDMNA ka
pulaak hi.*

A HIZOLO OMLO

Tupna Kician Anei Khangnote
Thapiakna

Tuang Za Khai

Copyright © by Tuang Za Khai
August 2014. Kalay University
eBook Version

Lai gelhpa' tung pan phalna omlo pi-in, hih laibu a them aneng khat
peuh lakhia, behlap, leh hawmkhia cih khat peuhpeuh kibawl theilo
hi. Tua bang khat peuhpeuh abawl nuam a om zenzen leh, lai
gelhpa kiangah phalna ngen masa hamtang ding hi

Hih laibu sungah a kigelh thute pen, a piangtakpi thute akibulphuh
vive hi-in, mi lawhcing khinsate' phuutkhak thu le late tung tawnin
a luang khia thute vive ahi hi. Hih laibu sungah, laigelhpa'
ngaihsutna ahilo, laibu dang sungah a kigelh sa Zolai tawh alet
khiat kik zong tampi kihel hi.

Laibu Apna

Sep ding khempeuh hong sep sak ,
Zumna daina leh haksatna khempeuh
hong puak sak ,
Thu honghilh in tha hongpia tawntung,
Ka it ka Pa

Rev. Thawn Za Nang

&

Pasian' kiangah a lungdamna te khitui
luangin a pulaak,
A thaneemciang' khitui luangin
thakhauh nading thu a ngen,
A ta te' a ding khitui luang mahin
thu hong ngetsak tawntung,
Ka it ka Nu

Nu Ciang Za Niang

Te' tungah hih laibu tungtawn in
ZAHTAKNA, ITNA leh LUNGDAMNA

ka pulaak hi.

Hih Laibu Hong pianNa Thu

- Haksatna, tuahsiatna, guallelhna, mabinna, lametbei na, lunggimna, thaneemna, lungneuna, sepkhelhna, gaihstut khelhna, kimuan lahna lungsim neihna, sum leh pai ki tangsap na, khemna tuamtuum tuah-khak na, haksatna tuamtuum hangin lungkhatna ----- tua buaina te khempeuh satzan in, tuate' tungah gualzawhna ...
- Natna satna hanga lungkhamna, zawn-na gentheihna hanga lungbuaina, bangmah theikisalo in maizumna tuamtuum thuakna, lungzin-na leh guallelhna, mite' neumuhna leh pampaihna thuakna ----- tua thuakna te sung mah pan gualzawhna ngahzawh na ...

- Pilna hangtawh hilo Pasion' huhna khatha hangbek tawh '2002-2003' laisim kumin tansawm ka zawhna, tua hong zawhpih Pasion' tungah ka lungdam na...
- Hih thute hangin HIH LAIBU (A Hizolo Omlo) hong piangkha thei ahi hi.

Theihsakna

Haksatna, Buaina, lungkhamna
leh lungkiatna
A thuak-kha ngeilo te a dingin

hih laibu sim kullo hi.

Contents

Laibu Apna

Hih Laibu Hongpian Na Thu

Theihsakna

THU KONGHONNA

Hello...

Ka Nu' Kiangpan Laikhak

Edison Leh Tuahsiatna

Mawhna

Lungmuan-na Om Hi

Thuaksiamna Vs Lincoln

A Nungta Kam-mal Khat

Na-puuk Ding Laukei-in

A Haksa Khualzin-na

Thuakna leh Khelhna

Lungnop Nading Hauhna Bangzah Kisam
Ahi Zolo Omlo
A Hoihpen Ihcih Ciangin...
Kei Leh Ka pa
A Maute Lungkia Lo Uh
A Hoihpen Kam Vaikhakna
Gualzawh theihna'ng Nuntaakpih akul
Thupawlkhat
Lametbei Mi
Hun Zatsiam Huai
Ka Phutkhak Nuntaakna
Bishop pa' Han-ah Akigelh Laimal
Hell Leh Vantung Thusim
Lungsim Puak (101)
Lungkia Ke'n
Gualzo Pen...
Alamdang Sunmang
Ka Pian-na Vangkhua Neu
Tuun-nu' Zogam

THU KONGHONNA

A Hizolo Omlo (Tupna anei te adingin) cih thulu tawh Sia Khaikok hong gelh khiat laibu in laisim mite khua muhna kihong tuam dingin i lam en hi. Hih bang laibu pen ei Zomi te sung ah agelh ki tawm mahmah lai hi. Lung kiat hun ah ih phawk khak ding thu tampi hong mu thei sak hi. Leitung ah mihau, mipil te in amau tuahkhak phut khakna te uh pan amuh khiat, aluang khia thucin thu hoih kam mal tampi tak hong mu khia hong lak khia hi.

Leitung mi minthang tampi takte in hatsatna tuak kha lo a, amin thang hilo in hatsakna tampi nawkkha, phukha mah leh lungkialo a, han ciam na pan gualzawhna ngah ahih lam hih laibu in hong mu khia hong thei khia sak hi. Tua haksatna te akantan zawhna uh leh ahaksat hun ah Pasion in panpih a, lungkia lo in ahan ciamna thu te hong at khia in thalak huai leh tha ngah huai mahmah hi. Sia Khaikok in a pianna khua itna leh Zogam itna ngaihna la kam tuamtuum tawh hong gelh khia ahihman in ih pianna pan pilna zong, sum zong apai khia khempeuh a dingin ih gam ih lei itna ding hong phawk hong thei sak hi.

Tua bek thamlo in lai gelhpa in ama tuak khak, phutkhak thute leh mi minthang tampi tak te tuakkhak haksatna te enkak khawm in leh alung kiat lohna, ahan ciam na leh gual zawhna angah kik na te hong lak khia ahihman in zong sim nop huai pha deuh a, ih lung sim hong la pha diak hi. A Nu leh Pa hatthotna te hong gelh khia in nu le pa in Tate tung ah it na athak in hong phawk sak hi. Nu leh Pa in tate pattahna pen ngah kik ding (amet ngah na ding) lam et na hilo a, atate mi tawh kim in amai zumloh

ding hong deih ahih zawk na zong hong thei sak hi.

Hih laibu asim khempeuh in hatsakna ih tuah hun, ih lungneu hun , ih guallelh hun, mite sim mawh thuak ki sa in ilung neu hun, sum leh pai hang a haksatna ihtuah hun ciangin tha lak na in nei thei ciat ding in ka lam en hi. Hih laibu in Zomi Zolai a sim thei khem peuh a ding in, a sim huai leh asimtak mahmah laibu hoih khat hi ding in ka lam en hi. Sia Khaikok zong mai lam ah hih bang laibu hoih tampi ngelh khia zo dingin Pasion in lungpilna cidamna hong piak sak ta hen. Haksatna ih tuah hun ciang hih laibu sung ah om mi minthang tampi tak te nun takna etteh a lungkialo in a hanciam amai nawtzo ding in ih Biak Pasion in thupha hong pia ciat ta hen, Lungdam.

Zam Dong, PhD
History Department

*Kha thu lamah zawngkhal a kisate' sungah
vantung ki ukna thu om ahih manin, thupha ngah
mi ahi uh hi. Dah in athuum atau mite in Pasion'
hehnepna ngah ding uh ahih manin, thupha ngah mi
ahi uh hi. Lungneemin a ki niamkhiat mite in
Pasion' ciamsa leitang ngah ding uh ahih manin,
thupha ngah mi ahi uh hi. Pasion' deihna tawh
kituak nahoih sep zawh ding hanciam penin anei
den mite in Pasion' piak lungkimna ngah ding uh
ahih manin, thupha ngah mi ahi uh hi. Midangte
tungah hehpihna-aneit mite in Pasion kiangpan
hehpihna mah ngah kik ding uh ahih manin, thupha
ngah mi ahi uh hi. Lungsim siangtho tawh Pasion a
zong mite in Pasion mu takpi ding uh ahih manin,
thupha ngah mi ahi uh hi. Kilemna ding hanciamin*

*na-a sem mite in Pasion' tate cihna ngah ding uh
ahih manin, thupha ngah mi ahi uh hi. Pasion' deih
bangin a gamtatna hangin bawlsiatna-athuak mite
vantung ki ukna sungah a omte ahih manin, thupha
ngah mi ahi uh hi.*

Zesu Khris

Hello...

- Haksatna pen Pasion in a-it a tate, a hoihzaw dingin hongsuinha hithei tawntung hi.

Henry Ward Beecher

- Khatveivei Pasionin tuipeek ih siam ding hong deih manin, tui thukna munah hongkhia thei zelzel hi.

Herald Lindsell

- Haksatna in mihingte thaneemsak zolo, kisiasak zolo aa, nopsakna leh cihtheihna in mihingte puuksakin kisiasak zaw hi.

William Barclay

- Ka lampi ah tuahsiatna in hong nawkgawp in, kakhe suan zolo, nungtolh in, ka lampi nangawn ka telzo nawnkei hi. Ahi zongin, ka tuahkhak thute ahih leh pukcip nading hilo in nungtolhna lel

ahih lam teltak in kathei hi.

Abraham Lincoln

- A niampen dinmun ah ka om hangin, lungnop ding ka mangngilh ngeikei ding hi. Ka nuntaakna-a haksa pen dinmun ah ka om hangin, ka lungkia ngeikei ding hi. Zaanhun hong beiteh, zingkhua hongvaak ding aa, ni hongsuak in, Sunni hong taang lel ding hi... Nuntaakna ihcih pen a ki khelkhel ding a ngeina hi aa, hangsan tak in ih phut ngam ngiat ding a kisam ahi hi.

Maung Myint Aye

- A kihong theilo ding tawhbu kuamah in bawl ngeilo ding hi...Tua mah bangin, Pasian in ihpuak zawhloh ding haksatna vangik hongsuam ngeilo ding hi... Lung-gim in maitai zolo in na omleh hih leitung in hong nuihsan lualua lel ding hi... Lungnuam tak in na omleh hih leitung in hong maitai ding aa, nang'hangin mi tampitak in lungnopna a ngahlawh uh leh, leitung in nang' thupha hongpia ding hi.

Metacafe.com

- Hunsawtpi sung lungkia lo in nathuak khit nangawn teh natuah guallelhna pen, guallelhna taktak ahi: ‘hanciamna neilo in omhithiatna leh ahoih ding ngaihsutna neihlohna’ te sangin, manphazaw thampek hi.

George Eliot

- Haksatna nathuak hunsungteng bekma, diktatna tawh a kidim, tupna gelna leh pilna siamna te athak in a ki bawlphat hun hizaw hi. Tua-ahih manin, haksakna leh tuahsiatna cihte pen ‘Sia’ hoihipen te hizaw hi.

Abdul Halim Ali, Tan Sri

*Pasian in a teeltuam mite, suahtatna ding
manawh in a makaih na-ah, haksatna leh khelhna
tampi phukha uh hi. Ki puahphat nading hunpha
khatkhit khat Pasian in piapia hi. Ahi zongin a mite
khial thapaai uh hi. Pasian mangngilh in dawih leh
milim peuh bia zelzel mawk uh-hi. A Topa un
thukhen tuanlo, hehpihna leh itna bucing tawh
lamlak in, a lipkhaphuai thulela tengmah zawhpih
toto in, Canaan gam lutpih veve hi.*

*Leighton Ford
(Billy Graham' tupa)*

Ka Nu' Kiangpan Laikhak

*“Tu ni aa ka hihna khempeuh, zingciang’ hih
dingin ka geelsa khempeuh, a vekpi, a vekpi-in,
ka nu’ hong hehpihna khut sungah om hi”*

~ Abraham Lincoln

Kapian kum (21) aphak laitak, Kalay University ah B.Sc (Hons) kasin hunsung, ka pianna khua Pakzang hi –in, Kawlpi meeltheih te’ innpan sang kakah zeel hun.

“Khangno nawilunghan’ hun” acih hunsung ah ka om hunlian ahih natawh kizui-in, ka ngaihsutna tuamtuum te hong khauhpai veva mawk hi. Ka ngaihsut bangin na khempeuh ka piangsak lianlain nuam hi. Tua ka lung-gulh bangin thu khatpeuh apian pahpah theihloh teh na khempeuh mawhsak in ka gaal bangin ka ngaihsun hi. Ka nu leh ka pa’ hong thuhilhna te phawk-khak in neilo in ka lunggulh leh katup thute bek thupisak in ka mitsuan cip kha hi. Itna leh deihsakna tawh thu hong ki hilh hangin ka lungsim sungah lut ngiatlo mawk hi. Kei leh kei –in hanciam lel ning cih lungsim tawh kanu leh ka pa tung’ pan ahi aa, midangte’ tungpan ahi zongin, ka ngah ding itna leh deihsakna te ka thupi ngaihsut ngiat loh hun ahi hi.

Hibang hunsung pan-in ka ngaihsut-tuamtuum te hong kipelh diamdiam mawk hi. Ka tup bangin bangmah piang theilo, ka vaite’ kipelh diamdiam in, ka ngaihsut khak ngeiloh haksatna

tuamtuam in hongtuamcip ta hi. Mite' neih bangh neizo ki salo, mite' siam bangin siam ki salo, mite' tawh ki kimzo ki salo in ka lungneu mahmah hi. Tuahun taktak ciang, lungkiatna in ka lungsim hong luahcip mawh hi. Sanginn pan kaciah sim phial in, inn ka tunphet leh phunlo paulo in lungkiatna tawh kalupna ka kideenna zinzeen den hi.

Ka-maitai zolo, ka thaneem, ka lungkia in, zan ihmud hunsung khempeuh ka puak thuhaksa teng ka ngaihsutsut na hangin, sawtlo-kaal in zingkhua hongvaak ciaiciai zel hi. Sunhun sung khempeuh zongh kei a dingin lung-gimna pi khat mah hizel ding, cih thei gige kahih manin ka lung-gim mahmah hi. Sangkah ding mah in Ka pai ngaungau den sam hi. 'Lai' peuhmah lungsim sungah omzo ngiatlo mawh hi. Kuama theihpih loh tak-khat in keikia ka gimmahmah hi. Khatveivei bangh ih lawmte nangawn ki mudah kha phial mawh thei hi. Tua kawmkaal ah, inn lam pan ka nu in hong hopih dihdih hi. Ka lung-gim' khinkhian tawh ka hehsuak ahih manin ka nu ka tawng-gawp kha hi. Tua khit a sawt hetlo khat in, sanginn pan ka lamet hetloh laitak-ka lawmit mahmah khat ahi, Deih Tung (Mr. Mang Deih Tung, Sacret Heart Theological Seminary, Sillong, India) in laikhak khat hongpia hi. Tua laikhak sung ah:-

Dear Khaikok,

Ka ta-aw, itna tawh hong hopih ingh. Na ngaihsutna tuamtuam te nadeih bangin apian theihloh manin, lungkia in na-om lam kathei hi. Kong itna leh kong thuhilhna te zongh na thudon hetloh lam katel hi. Ahi zongin ka ta-aw, bangbang na geel aa, bangh bangh seem in, bangzah tak in nong thupi ngaihsut kei phial zongin, kong itna themkhat zongh kiam tuanlo ding hi. Nang a dingin ihbiak Pasion' kiangah khitui luangin thu kong ngetsak den hi. Nang leh nang ki muang lozaw in, Pasion' tungah navaai khempeuh na ap

zaw in!

A bei ngeilo ding itna leh deihsakna tawh,
Hongit na Nu

Hih laikhak thumvei, liivei, sim-in, athak in kasim pha kik-kik hi. Ka nu nangawn tawng-gawp in, hong thuhilhna te ka thudon hetloh hangin hong itna ki lamdang hetlo in, hong deihsak tawntung ahih lam ka telthei panpan hi. Ka nuntaakzia ka ngaihsun kik aa, ka buaina leh ka lung-gimna te' sungpan ka nu' hong itna pen kei a dingin lungmuanna leh daihna ahih lam, damdam in ka phawk thei sansan hi. Ka nuntaakna sungah bangbang apiang zong, hongittawntung ding ka nu' hong itna leh hong deihsakna thute athak in ka telcian thei aa, Pasion kiangah thu hong ngetsak tawntung na hangin lawhcinna leh matut gualzawhna a ngah ding kahih lam teltak in ka theita hi. Tua ahih manin ka lung muangin, lungnuam takin sanginn pan, inn lam ka zuan theita hi. Lamdang mahmah hi. Tua-ni a kipan katuah haksatna te' tungah gualzawhna la in, lungnuam tak in ka ihmu hithiat theita hi.

Tu in ahih leh bangbang haksatna katuak zongin ka nu' hong itna leh, hong thunget sakna te tungah thala in lametna hoih kanei thei tawntung ta hi. A nung kik ngeilo, a kiptawntung itna in mihingte' nuntaakna nangawn ki khelsak thei ahih lam ka nu' kiangpan ka ngah laikhak tungtawn in teltak in ka thei hi.

William Carey in kum (40) sungbang India
 gam-mi te a ding, a nuntaakna azat khit-teh asuahni
 pawl khatvei bawl hi. Tua pawl sungah William
 Carey in :- “Ka nuntaakna hun, abeisa thu
 khempeuh ka ngaihsut kikkik ciang, Pasian’ ading
 ka nasepna, ka ki piakkhiat na te’ sungah lungkim
 huai bangmah om zolo in, a thaneem mi, Pasian’
 na-ahi ding bang leh ahoih in asem zolo mi khat
 kahih lam ka kiphawk hi. Aw... ka Pasian aw...
 nang a dingin kei athak in kong ki ap hi.” Ci-in a
 lungsim tamzaan in thu agen khiankhian hi. A
 tawpna-ah a thugen hi bangin khup hi... “Ka
 sihkhith-teh ka ki phumna hankhuk tungah a kiphut
 ding mualsuang tungah ka deih mahmah Isac Watt ii
 la ngaihno, a kammal hoihte, a kigelh ding ka
 lunggulh mahmah hi... tua kam-mal te ahih leh... a
 thaneem, a zawnghal, bangmah aa-a ki simlo,
 tangteel khat-tawh a kibang lel ‘KEI’ ka nuntaakna,
 ka hihna khempeuh, ‘NA’ hehpihna
 ‘KHUTSUNG’ ah kong ki-ap hi...”

J. David Lundy

Edison Leh Tuahsiatna

*“Na inn mei-in akaat leh, tua mei tawh nakhua lumsak in!”
~Spanish Proverb*

1914, December kha sung,

Thomas Edison a setzung pi (laboratory) Mei-in kanglualua miau. Dollar awnnih sang’ tamzaw tham ding mei-in kangtum-mai. Sumpung dingin a muan penpen, Dollar tengnih val (\$ 238,000) tawh a lamh a inn neihsun mei-in akangtum ding hita. Edison in khua-ul sakaai-in asep abawl, ahanciam sa kempeuh tua nitaak, meikuangpi sungah vut leh vaai asuak hita.

Kum 24 apha, atapa Charles in meikuang vuavua, meikhu kizial nianua nuai ah maikhing ngeungau sa in apa zong buaibuai kawikawi. A nunung na-ah, a sam kang thingthenge huih in mut in aleng thengheng, dahmai mahmah kawmsa in meikuangpi lam a en ngeungau, a pa galmuh hi.

“Aw... pa... dahlua ingh... kum (67) bang phata in, khangno hi nawnlo cin aa, na neih khempeuh mei-in kangtum khin sese...” Ci-in Charles khasia lua in awngkhia gawp kha hi. A pa in:- “na nu ee?” Ci-in a dot buatbuat leh, a tapa in theilo ta sawnsawn...

Edison in “Na nu manlang in vazong inla hiah hong paipih in, a nuntaak sung khempeuh hibang meikuang mukha ngeilo ngel ding hi.” Ci ziau mawk...

A zingteh, a kisia gawp a inn leh a vante en gega kawmsa in Edison in “Hih tuahsiatna a manphatzia sumtawh leizawh ding hilo hi. Pasian aw na tungah lungdam ingh. Ka khelhna khempeuh uh,

mei-in kangtum khinta hi. A thak in kipan kik theita ungh...”

Tua khit nipi thum asawt phet in, Edison in a masa penpen lakhumna set (phonograph) zuak-khia ziahziah zo veve hi.

Brain Cavanaugh’ gelh

‘Great Value In Disaster’ pan

*Mikhat peuhmawhsak in gensiat dingsang'in, a
ma nuntaakzia, ahihna-a-omzia khempeuh thei
masa phot in, tuakhit-teh, amah leh amah akitel
theihna ding, lamlak in huh ding kisam hi...
Banghangin amaute tuaci gamtat in, tuaci nuntaak
uh ahi hiam? Cih athu, theihding thupi mahmah-hi.
Mikhat peuh ih gensiat niloh sang'in pahtawi-in
pibawl theihding kisam zaw hi.. athu ala khempeuh
telsinsen hilehang, mawhna khempeuh ki maisak zo
ding hi. Topa Pasion mahmah in, nitawpni hongtun
mateng, mikhat peuh tungah, thukhen huailo ahih
na thu honghilh-hi...*

Dr. Samuel Johnson

Mawhna

*“Mawhna na nutsiat photloh un, Pasian
tawh na kilawmta theikei ding uh-hi.”*

~ C.H Spurgeon

Siampi (Phungzi) nih, biakna vai-in khualzin khawm uh.

Kantan loh phamawh Guntui khat tuak dihdih uh. Tua lai ah nungaak melhoih simtham khat Guntui ngaptan dingin na kithawi thawi. A puante khepkhep in asilh ateen te akawt khak ding lautuak mahmah. A mah ngiat zongh tua tui ngaptan ding cih lautuak mahmah lailai..

Phungzi pa khat in, tua nungaak nu’ lautuakzia atheih ciang hehpih lua-ahihmanin, a nungah pua in guntui kantanpih pheih hi...

Pungzi te nih zongh akhualzin-na mabaan uh zomin pai leuleu... Naikhat dingbangh lam apai khith uhteh Phungzi pa khat in alawm’ kiangah:-

“Um het keng ee lawm, Ih biakna thukham in numei khoihkhak ding deih hetlo hilo ahia? Numei amawk-khoih loding te hive hangh... Banghang aa, ih thukham palsat liangin den aa nungaaknu puaphei dihdih mawk nahia?” A den a nungaak a puaphei phungzi pa in malkhat zongh dawngkik vetlo in lampai ngeungeu hi.

Them veipi adaih khipkhep khith uhteh,

“Ka la sa!!! Ken’ tua nungaak, den aa guntui sung mahah nusiapah mai vengh ee! Nang’ tu dongciang na lungsim sungah puapua lai maw?”

Imgard Schoegl’

(The Wisdom of
ZenMasters)
gelh 'Two
Monks'pan

*Mihing te nisim ih nuntaakna lungkham dingin
ngaihsun hile'ng ih hihna khempeuh lipkhaphuai-in
lauhuaina tawh kidim hi. Ih neek ih dawn leh ih
hawh ih ciahna te gen vetkei ni! Ih diik leh ih
sankhiat huih sangtho thu na ngaihsun kha
ngeihiam? Na nuntaakna dingin na diik huih
sangtho na sankhiat khit laitak, nuamtak in tua
huih sangtho diik kik thei dingcih lungmuan-na
taktak na nei ngam hiam? Kuamah in-nei ngamlo
ding hi.*

Billi P.S. Lim

Lungmuanna Om Hi

*“Na lupna tungah ihmu theilo in na om
hunteh, a lupna ding cih thadah omna ding
ngiat neilo in a genthei mitampi a om lam
phawk thei-in.” ~ Ralph Waldo Emerson*

Khualzin bangin nisim ih nuntaakna sungah thuhaksa tuamtuam leh sepkhelh bawlkhelh tuamtuam tawh ih ki phukha tawntung hi. Tua bangh hunteh lungkiat pah ding hilo hi. Haksatna athuak ngeilo leh akhial ngeilo kuamah omlo hi.

Haksatna leh khelhna-atheikha ngeilo mi ahih leh, ‘bangmah asem ngeilo, a om hithiat, a mainawt lo mi’ hi pelmawh ding hi. Haksatna leh khelhna tuak zelzel lel in, phamawhlo hi. Kumkhat sung tawntung khedap thak khat nagawn lei zolo in na om hunteh, khedap bulh nading khe na ngawn a neilo mi tampi tak a om lam phawk thei-in.

Na tuahkhak buaina, haksatna tuamtuam te hangin thaneem kha in, na lametna na susia kha ngei hiam? Tua cih ding hilo hi. Lungmuanna, lungnopna om hi. Nuntaakna limlim bang himawh hiam cih athei khalo mi tampi tak a om lam phawk in. Martin Luther King Jr. in:- “khangmoi lai aa sihdang pen a lauhuai pen leh a lipkhaphuai pen hilo hi... Kum sawm sagih vaal bangh nungta napi, nuntaakna taktak adeihna-athei khalo ih hih khak ding dah-huai zaw tham hi.” Na ci hi. Nuntakna ii adeihna taktak bangh hiam cih natheih cian nakleh thupha lianpen angah khin na hihi.

Khatvei kumpi pa leh a nasemte pawlkhat tuipi tungah teembaw tawh khual hongzin uh-hi. Lamet hetloh pi-in huihpi hong

nung-gawp hi. A nasem te' sungpan tuipi tungah khualzin ngei ngiatlo khat ki helkha hi. Huihpi hong ki peigawp takteh tua mipa laulua-ahih manin hong kapkhia gawp zawzeen hi. Kua mah in acih nading theilo in, a hehnem zo omlo uh ahih manin, tua mipa hong naak-kah tektek mawk hi.

Kumpi pa zongh hehlua kisa-amai san veva sa in "Mikhat beek zongh, hih mipa' launa-adaisak thei ding omlo lawmlawm na hi uh hiam?" a cihcih hangin a naseem te khat beek in dawngkik ngamlo uh hi.

Themvei khit-teh, tua teembaw azui khualzin mi mawkmawk khat in, kumpi pa' kiangah :- "kumpi pa aw ka cih bangbang hongzuih na dingin thu nongpiak sak zawh ding leh tua mipa ka hehneem zo thei ding hi." Ci-in kumpi pa' tungah ngen hi.

Kumpi pa in zongh lamdangsa hi. Khualzin pa in tua mipa bangcih ding, cih theinuam ahih manin, "bang sem ding na hiam? Sem pah in! kong phal hi!" Ci pah hi.

Khualzin mipa in zongh, kumpi pa' nasem te pawlkhat sam in, alau mahmah, akap nilohpa tuipi sungah khiasuk sak hi.

Tui sungah aki khiasuk kumpi pa' nasempa zongh den aaalau na sang'in azah sawm bangin lauzaw tham hi. A cih nading thei ngiatlo! Awng zalzal kawmsa in akhe leh akhut-te zalziazua hi. Tui peek theilo pi peek dingin kithawi vanvan hi. Tui sungah tumsuk zel daw-khia kuau zel in, sih naak huhu hi. Themvei khit-teh, khualzin mipa in, kumpi pa' nasem te' kiangah tua mipa tuipisung pan kaikhia in, teembaw tungah koihto sak-leuleu hi. Kumpi pa' nasempa zong teembaw sungah lum didek in, nak dupdup hi. Tua bangin agim mahmah sam hangin, launawnlo lian mawk hi. Lungmuang tak in huihpi nung sungah teembaw tuangin, a lawmte tawh nuamsa thei ziau mawk hi. Kumpi pa in tua mipa' omzia-amuh ciang alau not hetloh lam theilua ahih manin lamdang sa mahmah hi. Tua khualzin mipil pa' kiangah kumpi pa in :- "aw... bang na deihna-ahia?" Ci-in ava dot leh khualzin pa in;

"A lauhuai zaw, a haksa zaw, a lipkhaphuai zaw leh a dipkuat huai zaw thu khat peuh ih tuahkhak mateng, tu laitak a ih dinmun, a lungmuan huai leh anuam mahmah ahih lam ki mangngilil kha thei tawntung..." Ci-in dawngkik hi.

Billi P.S. Lim' gelh 'Be Thankful' a ki etkak

A vanglian mahmah hehpihna in, thupha lian mahmah nih bawlkhia lianlian hi. Tua thupha te pen hehpihna hangin a piangkha thei bek ahi hi. Tua hehpihna apia khia mite in ahih leh thupha ngah takpi uh aa, tua mah bangin, tua hehpihna-a ngah te in zongh thupha khat a ngah uh ahi hi. Hih hehpihna pen alian penpen vangliatna-ane, a vanglian mahmah khat ahi hi. Hih vangliatna hangin apiang khia thupha te ih tu ih ta hongpiang laiding mi tampi tak in a ngah dinguh GAMH khat ahi hi. Tua pen, kham lukhu khat sangin thupi zaw aa, zongh deihhuai zaw hi.

Mark Twain

Thuaksiamna leh Lincoln

*“Lametna khempeuh bei didek liang aa
thu haksa khatpeuh phutkhak zelzel na
pen,
tuivot mahmah sungah siksa mahmah diahsuk
in, tua khit-teh ih dei h bangin kiseek aa,
tua sik hongkhauh mahmah in, ih
deihdeih na-ah ih zat ziauziau
theih tawh kibangh-hi.” ~ Eliza
Tabor*

America kumpi te lakah aminthang penpen, Abraham Lincoln leh azi Marytodd te 1842 kum, January 14 ni-in pumkhat suak uh-hi. Tua hun laitak Lincoln in Sitni a sephun sung ahi hi.

A zineih khit asawtlo in, a lawmit khat leh a nasep-pih khat ahi, Samuel Marshal kiangah hibangin laikhak hi... “Samuel, ka zineih dihdih, zinei ci-in hong kigen thuthak; tuathu lobuang, thu lamdang zaw bangh mah omlo hi...”

Kum (10) val bangh Sitni a sepna sungah aki thuahpih mahmah khat mah ahi, William H. Herndon kiangah Lincoln in:- “Lawm aw ka tuahkhak lung-gimna te, leitungmi khatciat in thuakciat hileh, amaitai mi kuamah kimu zolo ding hi. Hi bangin ka nuntaak thapaih sangin si vingvengh lengh hoihzaw tham dingin lamden ingh.” Ciliang hi.

Jimmy Miles in Lincoln nuno’ gentheih zelzel thukhat a genkik na-ah, “Zingsang khat, Lincoln te nupa leh Ulian pawlkhat

zingan ne dingin ankuang a umm khop laitak, Lincoln' thugen khat a zi-in za nuamlo in, a lawmpa (Lincoln) maitang niangtui so valval tawh thehvat mawk hi. Lincoln in a zi bangmah cih selo! Mawhsakna kam khat zongh pau selo in tu hithiat lel hi. Nasem pa khat hong paiin, kinulna puankawt khat-tawh Lincoln' maitang nulsiang sak hi."

Nikhat, meiphelh nasem, mizawng mahmah tangval khat huhna ngen dingin Lincoln' kiang tungkha hi. Tangval pa' kiangah Lincoln in meiphelh nasep zia tawh kisai thu tuamtuum donghhithiat in, tua khit-teh a mah leh a mah apian zia kigen toto hi.

"Hei... tangvalpa, na ngai dih Oo leh!!! Denteh inn vaciah ningin an ka neek khit-teh ka lawmnu na dongh phot ning... A mah bel a lungsim ahoih mahmah khat hi ee. Ken' (\$ 50) pia ni! Ci-in na ngen lengh, a ma'n, bangmah theikei teh mihai, (\$20) pia ziau leeng phazo! Hongci hamtang lel ding hi. Tua-ahih teh, tangval pa, zingsang ciang ka inn uah (\$ 20) ala dingin hongpai kik maive? Ka zi dongh masa lo in hongpia ngamlo ding himai vengh aw!! Hoih nasa na leh?" Ci hiathiat hi. Tangval pa zongh kumpi pa' cih bang mah in, a zingsang teh (\$ 20) la dingin pai kik hi.

Lincoln' thu atuamtuum tampi a om'na sungpan, mipil te in lamdangsa in, Lincoln mahmah a thupi ngaihsut phat diak na uh thukhat om hi. Tua thu pen, 'a zi limlim gensia ngeilo in, a innkuan sungthu kua ma tungah gen ngeilo aa, bangbang haksatna-a tuak zongin lametna leh lungmuan-na nei den thei hi.'

Lincoln in adeih mahmah kam-mal:

"...And this too will soon pass."

*Sep khelhna, tuahsiatna leh buaina khat
peuhpeuh atuah huntah anui hithiat thei mite pen,
haksatna, buaina te tamveipi atuak-kha ngeikhin
hikha ding hi. Tua baanaah, tua atuahkhak thu
haksa te a gualzawh nading leh a matutna dingin a
kisam penpen te ahih lam zongh athei khinkhian
nahi hamtang kha ding hi. Hibang mite in thusia
khempeuh thuhoih in puah theih nading pilna anei te
hi uh-hi. Tua bang mipil nam ahih kei zenzen leh
tua-anui hithiat thei mi pen; A lungsim acing phalo
mihai pian khat hi hamtang ding hi. Lungnuam in a
maitai thei-ihcih te pen A nuamna mun leh a
sangpen mun ah a om te hituanlo hi. A hi zongin tua
bang mite ahih leh, Na khempeuh a hoihlam in amu
thei mite hi pelmawh uh-hi.*

Hugh Downs

A Nungta Kammal Khat

*“Zuihloh a phamawh ‘hih theihlohna’
lampi zuihna tungtawn in,
ngahloh a phamawh ‘hih theihna
dinmun’
tuntheihna ahi hi.” ~
Arthur C. Clarke*

World war II hunsung British te makai-in, a lauhuai Zarmani (Nazi) galpi sungah a mite kem in ahuai, gam a dingin mi muanhuai leh thu dotpi khat zongh hi-in, British Prime Minister zongh nihvei tak a semkha; a zahtaakhuai a cihtakna, a etteh-huai a hanciamna te leh a manpha mahmah a thugen siamna te’ tungtawn in Noble Prize (1953 kum) zongh a ngah; Time Magazine in zongh kum zalom sawmni hunsung a dingin a pahtawitaak, mi tuampian khat leh a madawk pen khat in a ciapteuh uh Winston Churchill ahih leh a theilo kuamah omlo hi.

Tu hithiat in leitungbup in a theiziau hi peuhmahlo hi. A pian kum (20) aphak aa kipan hanciam in tui galkap lut-theih na ding laiphi hi. Thum vei, lii vei a phikhit-teh a lung-gulh nasep ngah in, gam leh lei a dingin a ki piakhia tangval khat ahi hi. A tup leh asawm taktak ahih leh British Ulian muantaak cing khat suahzawh ding ahi hi. Tua-a lungtup thu nuntaakpih ahih manin ahihna khempeuh ah cihtakna tawh hanciam tinten hi. Thupi-in citak ahih manin minphatna ngah toto hi. A piankum (42) cing nailo in Minister ngahzo hi. Minister a ngahteh amah leh amah

zongh kimuang simpian ahih manin, a utut ahi gam leh lei a uk uliankhat suak hak nawnlo ding cih ki laman hi. Tua bangin amah leh amah a ki muan khinkhian laitak, galpi khatna (World war I) hong piangin, Bristish te in gal hong lelcip mawh hi. Tua thu hangin Churchill a zaa ki kiasak hi.

A zenzen in tua hun laitak Churchill a lungkia hileh leitung bup ah ki theikha hetlo ding hi.

Churchill lungkia in thaneem kha peuhmahlo...

Naseplian a sem kimlai, a za-a kiat-teh zumhuai mahmah hi napi, zum ding leh lungkiat dingin ngaihsun hetlo hi. Bang cih leng nasephoih ngahkik thei ding cih lungduai takin hanciam hi. A kiim leh apaam te' gensiatna, neumuhna te buaipih masa lo in, a lunggulh leh atup asawm, nasep hoih ngah ding bek mah buaipih masa hi. A ipsung ah laidal khat pua tawntung aa, tua laidal tungah amah leh amah tha a kipiakna kam-mal: "... kasin ding aa, ka hanciam ding hi... nikhat ni teh kei'hun hongtung lel ding..."

Hun sawtpi khit-teh galpi nihna hongpiang hi. Zarmani te thakhauh mahmah in leitung bup a ding lauhuai liangta hi. Tua laitak in Nazi te' kithawi zia leh a thahat zia khempeuh Churchill in theisitset ahih manin, British makai te' kiang ah agen bangbangin Nazi te gamta lianlian mawh hi. Hih thu hangin Churchill a nasep ki semsak kik hi. Galpi aven' zawh nading han-ciam in nasem aa, tua a nasep na hang mah in Prime Minister kipia hi. Yalta Conference ah Franklin Roosevelt leh Joseph Stalin te tawh ki mu in, galven' na ding thusung khawm uh hi. Churchill' ki piakkhiatna hangin British te in gal-lel nawnlo in, galpi nihna zongh daita hi.

Churchill a kumtam simta, a samte kaang in, a elkul khiukheu ta-aa, amit na ngawn in khua muthei mel nawnlo hi. Tua hun laitak in Britain te' Prime Minister masa-ahi, Robert Walpole in buaih a ngahna, Eton College ah Speech pia dingin Churchill ki sam hi. Hih College pen 1440 kumpek in a kiphut ahih manin, tul ngiungeu in lui gemgam ta hi. A kiim apam aa singkung lopa te zongh hamsuah in vulningniang uh-hi. Tua-atul gipgiap innpi sungah sangnaupang te, sia/siamah te, leh mipil ulian pawlkhat in Churchill' kamgen ding ngaklah in na tu dimdem uh-hi. Leitung bup ah a minthang vangvang Churchill in bangh thu hong-gen zentam? Ci-in a ngaklah mahmah uh ahi hi.

Churchill ahih leh Ciingciang khat ciangkhit in zangh in, a samkang thingtheng huih in mut in leengsialsial aa, a khut langkhat ah tangtawng pekpan a khuk theih tawntung lukhu khat-tawikawm

sa in, College lutna inn kongvang pipan a tutna ding mun zuanin hong lut khiankhian hi. A lukhu leh a ciangkhut-te tutna tung khat ah akoih khit-teh, mipi te' mailam hongnaih phe-in, a thugen na ding mun hong zuan hi.

Mi khempeuh a lungsim uh lawp thei mahmah in, "... aw hunkhat lai aa ih gam leh ih lei a ding a nuntaakna-a-ap, a lauhuai galpi sung mah ah a mite thapia in a nungkik lo; gual-lelhna leh pampaihna athuak laitak mah in zongh lungkia lo in a hanciam, cihtakna nuntakpih in, gam leh lei a ding tupna hoih tawh nungta in lungkia hetlo in a hanciam ma apang tawntung, a et-teh huai leh a zahtaakhuai, mi gualzo pa in thu hong gen ding hizen!" Ci-in a cimul uh bangh tho keei uh hi.

Churchill thugen dingin hong ki panta hi. Mipi te' lamet na sang' in a thugen hong tom mahmah mawk hi. A tom mahmah hangin tua a thugen ahih leh tu ni dong nungta paisuak lai hi. Tua-a thugen na hangin cihtakna leh gualzawhna-a ngahlawh mitampi tak om hi. Tu ni dong mah in tupna kician anei mita' ding a manpha mahmah kammal ahi hi.

Mipil misiam tampitak a kikhopna mun tua College innpi sung ah, a thugen ding angak mipi te maingat in a-awneih khempeuh tawh kam-mal khat bek lian Churchill in tangko khia ziau hi.

"Never, never, never, never, never, never, never give up!!"

Ci-in mipite' maitang themvei sung a et gega khितтеh a tutna mun zuankik hi.

Tawlpі khat sung mipi khempeuh apau aham omlo in dai khipkhep uh-hi. Them veipi khितтеh khut beng ziahziah uh a, tua kikhopna hialbawl ta uh hi.

Tua kikhopna a ki hialbawl hangin, tuni dong a ki hialbawl theilo, a nungta tawntung Churchill' kammal ahih leh:-

"Cikmah hunin lungkia ngei ken!!"

Cih ahi hi...

*Nisim na nuntaakna sungah na gamtat khelhna
leh na sepkhelhna te' hangin maizum ding leh
dahluat dingin ngaihsunkha kei-in. Nuntaakna ihcih
limlim pen kisinna-ahi hi. Kisinna tampi na
tuahkhak khitteh, tua kisinna te' hangin apicing
semsem ding nahi hi. Na tuahkhak thuhaksa te'
hangin na lungsim leh na pumpi ninsak in ki siasak
ding nahi hiam? Hilo hi... Supna leh guallelhna
tawh kidim in lametna khempeuh ki siacip-phial
mah leh, na puukna munpan thokhia in! Dingto in!
Ki puahphat theihna leh kipat kik theihna dingin,
khatvei, nihvei sang' a tawmzaw lo hunpha naneih
lam phawk in! Thala in! Kalsuan khia photphot in!
Pukna leh khelhna ihcih te pen lelhna hilo hi. Tuat
ki zosak kha peuhmah kei-in. Haksatna, sepkelhna
leh buaina cih limlim pen nuntaakna hizaw cih
phawk tawntung in!*

Ralph Waldo Emerson

Na puuk Ding Laukei-in

*“(7) vein na-puuk hang’ phamawhlo
hi, (8) vei na thawhkik ding hilel
hi...” ~ Japanese Proverb*

- Tamveipi na puuk ngeikhin hi, a mangngilh-khin ta na hizaw hi.
- Lampai ding na kisin cil-in, na puuk pah hi.
- Tuipeek ding na kisin cil-in, tuisung ah tum dandan hilo na hi hiam?
- Pau’ na sincil-lai-in, haksa salua kisa na-awh tulhtulh vele...
- An-neek na ki sincil lai-in, na sik-keu nangawn natawi theihloh pi.
- Bawhlungsat khatpeuh na kimawl ngei hiam? Na ciampeek na nunglam-ah vik masa lo pi-in, na bawhlung na sat-thei kei hi.
- Bawhlung nasuih teh nakhe na

nunglamah vik masa lo-in na suihtheih loh pi.

- Kumsawtpi a hanciam khit uhteh, a siamna hangun a minthang, Bawhlungsiam te nangawn in, suikhial zezel-lai uh-hi.
- R.H Macy, New York ah sumhau pen khat in a minthan' main (7) vei sitset a sumzon-na-ah a tool (zero) vilvel ngei mikhat ahi hi.
- Thuleeng ngelhsiam John Creasy, Laibu (564) vei bangh a bawlina sungah, (753) vei bangh endik te in nolhkik zen hi.
- Baseball kimawl siam, Babe Ruth, guallelhna 1330 vei a ngah hangin, 714 vei bangh Home Run ngah zo hi.
- Na puuk-khak ding laukei-in, haksatna hangin nalung agimleh nopsakna na ngah-hunte phawk-kik inla, thalakik in na hanciamna behlap in...tua hileh nazo teitei lel dinghi.

‘Don’t Be Afraid
to Fail’ Wall
Street Journal
pan

*Kum bangzah nungta dingcih ih-hanciam
theihloh hangin, ih nuntaak hunsungteng amanh-nei
dingin ih-hanciam thei hi. Ihmeel ahoih dingin
ihpuah theihloh hangin, ahoih omzia leh gamtat
kampau' ziate ih neih theih nadingin ih-hanciam thei
hi. Ih nuntaaakna sungah- hong tung ding haksatna
te ih khaktan theihloh hangin, haksatna atawm thei
pen dingin ih-hanciam thei hi. Leitung siatna te
ihpuah ihzuun theihloh hang'in, ih lungsim ihpuah
ihzuun thei hi. Ihzawh-hetloh ding thu pawlkhat ki-
ukcip nuam thei napi, ih uk zawh mahmah ding ih
LUNGSIM uk ding ki mangngilh thei thapaai hi...*

John C. Maxwell

Na Dahciang Kaplel In!

*“Na upna sang’in na launa na liatsak zawk
laiteng, na mailam ding khempeuh a khaktan cip
nahi hi.” ~ Mary Manin Morrissey*

April kha sung, Monday ni khat, khuapha sitset in-nitaang silsial hi. Tua nitaang silsial nuai ah ka it mahmah kapi te nih tawh nuamtak in ka holim khawm uh-hi.

A zingteh, Tuesday ni; upmawh-hetloh pi-in ka it mahmah kapi khat in hong sihsan vat mawk! Bangmah kam ki vaikhak na ommanlo pi-in hong nusia vat ahih manin ka khasiat dan kigen zolo hi.

Ni dangin ahihleh khatvei teitei teh dahna leh sihna hongtung ding cihthu ka ngaihsun thei zelzel hi. A hi zongin tuabang thute thakhat in hongtung vat dingin a ngaihsun thei vetlo kahi hi. Kap nuam mahmah ingh... Dah mahmah ingh... Ahih-hang’ ka khitui malkhat mah ataak-khiat ding ka lungsim in khensat zolo hi. Ka nute ka pate leh ka sia te in: “Pasal ihcih pen khasia pahpah lo-in, akap mawkmawk lo te ahi hi...” Ci-in thu hong hilhna te uh ka phawk kik-kik hi. Ka mit-tui luangin kakah khiat khak ding laulua kahih manin adah vetlo bangin ka om veva deep hi. Kap lo ding, kap ngiatlo ding!!! Ci-in ka lungsim tawng pan tha ka lala hi.

A sawtlo in Hanmual-lam zotna dingin hun ki bawl diaidiai ta hi. Ka dahna, ka khasiatna te’ hangin aluang ding kamit-tui kadaal daal thapaih na hangin ka gim-mahmah ta hi. Khuapih

tuipih te leh khuaveng meltheih te hongtung litlit in, kapi' kiangah kap ngeungeu uh-hi.

Amau te' kah kamuh teh, ka kahsuak semsem napi, kap ngiatlo ding cih ka khensat tinten hi. Mi tua zah lak-ah pasal pipi kap lawmlawm hong ki cih ding ka ut hetkei hi. Pasal kahih manin a kap hetlo kahih lam a maute ka theisak nuam mahmah hi.

Ka Uu, kapi' kiang naihtak in tu khinkhian aa, akiang uah kapi a kipuak khiat nading kibawl lingling hi. Tua te ka muhteh ka lungsim tamzan didek hi. Ka pi ka it mahmah hiven! Aman' zongh kei hongit mahmah, keitawh ki gamla in a-om ding nangawn alungnuam ngeilo, hong mitsuan ngaungau ka pi hi aa, tu'n sihna in hong khenkham hita. Cih thuteng a banban in ka ngaihsunsun hi. Tua ka ngaihsut thute lah sigaal hongpai te in hong theihpih hetlo uh!!!

A nunung pen vaikhakna nei dingin meltheih tengin kapi' lupna lam zuan diamdiam uh-hi. Ken' zongh amau nung zui-in, ka pi kiang ka naih a, a nuntaakna-a-om nawnlo ka pi' maitang ka muh teh leitung ah kadah penpen hun hongtung taktak hizen maw, cih kaphawk hi.

Kei adingin ka pi kamuh tawpna hita!!! A sawtlo in daainawl ah kivui-in, a tawntung in a kimu ngei nawnlo ding himai! Cih ka ngaihsut-teh ka lungtang nalua, ka cihna ding meltheilo in kasan bialbual hi. Ka pi' luang-gei ah ka innkuan un kam vaikhak dingin ka pai uh-hi. Kum (15) kiim phapan kahih manin, ka pi ka neh ngam vat kei hi. Ahi zongin ka nu in kalu pan hongpom in ka pi' kianglam hoihtak in hong naihsak hi. Ka nu' khut kiptak in kaleen aa, kakah khakloh nading kaki-ip tentan hi.

Ka pi' mai-ah ka khukdin petpet uh teh ka khitui a luangkha lodeuh lian bekmah ahi hi. Ka nu in ka pi' khut hong leensak in ka pi kam vaikhak na nei hi. Misi te' khut lenngei nailo kahih manin kalau giauguau hi. Ahih hang' ka pi ka itna hangin kalau na hongveng hi.

Ka pi akhut avot didek simloh kei hong khoih ngeina mah banglian lai hi. Ka nu ka nunghei leh kah cihtak in nakap ngekngek hi. Ka nu' kah ka muhteh, ka pi ka it baanah kanu mahmah zongh hehpih-huaisa kahih manin kakah hongsuak mahmah hi.

Ka nu hehpih lua kahih manin, tutna khat ah ka paipih hi. Veng leh pampan meltheih te khat khit khat in a dahna thu-uh honggen lingling uh hi. Kei zongh amau' hong hehpih na leh ka pi a itna hangun ka lungdam na in, kamai a tai zawhna ding hanciam in

kazum nuih hiuhauw pong hi. Banghang hiam cihleh, pasal ihcih pen, alungsim khauh, a kap dingin a kilawm hetlo hiven!!!

Tua nitaak sung tawntung, ka lungsim ka hihtheih zahin ka khauhsak hi. Ka mit-tui luang ding hong kithawi teh cilvalh liangin kadaal vanvan hi. Pasal pipi kap buanglo ee!! Kap zenzen lengh mi thupi lo, mi meidawi pi hiding hivengh!! Ci-in kei leh kei ka lungsim ka khauhsak thapaai hi. A zingteh, ka nu in zingsangtung in hongphong hi. Maan (limlang) mai ah ka ki en aa, kahloh ding mah ka khensat zo saam hi. A dah mahmah ka nu tha apia ding kei hi-ingh aa!!!

Biakinn ka tun' uhteh misi puakna Mawtaw vom sungpan ka pi' luanghawm hong ki lakhia in, biakinn pi sungah ki lutpih liailiai hi. Ko innkuan ahih leh ka pi' luang-gei ahi, a mai penpen ah katu uh-hi. Hun kipat ma in ka sang-gam ka nu ka pa te ahih uh leh alungsim uh ip zolo in kap ngeingai mai uh-hi. Kei kahih leh kap ngiatlo ding, cih khensat in ka om tentan hi. Bang hang hiam cihleh pasal cih pen kap mawkmawk lo ding, lungsim khauh vailo lua...

Thuhilh (sermon) pa hong dingto in, ka pi a damlai thute; ka pi mi thupi ahihna zia leh midik mihoih ahihna zia te abanban in hong gen toto hi. Tua tak teh kahloh phamawh in apiang ding daan himai ta hi. Thuhilh sia pa in a thugen te hongzom to in:-

"Ih pi pen alungsim hoih, migi, itna nei-in, atu ata te akhual ngaungau khat ahi hi. A innsung leh abeh aphung sungah itna-anei mahmah khat hi aa, hehpihna-anei tawntung nupi khat zongh ahi hi. A diakdiak in, atu te naak it phadeuh kasa hi. A nu leh apa te naseem dingin apai khiat khit simin, atu te itna tawh hoihtak keemin khoi aa, a lungkim theihtheih na dingun ciamnuih pih niloh hi. A tupa in zongh a pi' itzia tel ahih manin, a pitu' un nuamsa in apai na peuh uah kizui kawikawi mai uh-hi. A kikhen ngeilo pitu te ahi uh-hi."

Ci-in mipi' mai ah thu hong-gen takteh; Aw... ka pi' damlai aa, ka omkhop hunte uh anuam pen hitah maw? Cih ka pawk-kik san hi. Tuk hun teh ka pi tawh la kasin khop hunte uh, phalbii huntteh ka inn-nung ua mualdung tengah ka pi-in hong kimawl pihpih hunte khat khit khat ka mitkha-ah hongsuak daudau hi.

Ka nuntaak hunsung anuam aa kangaihsut hun khempeuh ka pi tawh ka om hunteng lian hi zen!! Tu in aman' hong nusia ta!! Ka lungnop nading om ngei nawnlo ding!! Cih te ka ngaihsut sut teh kiip zo nawnlo in, kakap khia beba mai ta hi. Ka dahna leh ka khasiatna zia kuakua' muh ding lau zo nawnlo in, hong ki neumuh

ding zongh phawk-khak in ka nei man-nawn kei hi. Bang hanghiam
 cih leh, kasep dingin akilawm khat ahilh lamzongh athak in katel
 cian theita hi.

Ka pa in kakah-hongza in, a-ang ah hongpom khit-teh, ka nih un kakap ngekngek mai uh-hi. Ka nu leh ka Uu zong leitung ki tamzaan ding zah dongin kap zuazua mai uh-hi. Tua hun laitak in Pasian' mai ah kei leh kei-in kamciam khat ka pia hi. Nidang teh Pasian in suan leh khak hongpia in, tu leh ta katawi khak zenzen leh, kasih ma teitei in, kamkhat ka vaikhak hamtang ding hi. Tua ka vaikhak nop kammal pen: "Pasal hoih, pasal thupi-ih cih te pen, kineih khem ngeilo uh-hi. A dah uh teh kapngam in, a lungdam na uah anui ngam te ahi hi." Ka cih sawm hi.

Kei a dingin ahieh leh lungkim tak a ka vaikhak, ka it mahmah ka pi ahieh lam phawk theita kahih manin, ka lungnuam mahmah ta hi. Ka pi ka it mahmah na, itlua kahih manin asih teh kadah mahmah na, dah mahmah kahih manin kakah ding ka ki-ip zawhloh na... Hi teng khempeuh ka pi' tungtaang ah ahong uap mi khempeuh in thei uh ahieh lam telta kahih manin, ka lungsim khat nuam zawdeuh ta hi.

Kei leh kei a kikhem hi nawnlo, hangsan tak in ka lungsim sungah kathuak thu angin a semkhia ngam pasal khat kahih lam zongh ka ki phawktheita hi.

Jonathan Piceirillo' gelh
'Cry When You Are Sad'
pan

*Tupna kician anei mi nahih leh na tupna natun
dong na hanciam zo ding hi. Kua mah in, midang te'
sa'ng haizaw, midang te' sa'ng siamlo zaw, midang
te' sa'ng hanciam zolo, citak zolo zaw, hongci theilo
uh hi. A zenzen in midangte in hong neumuh in,
bangmah theilo, bangmah hih zolo, mihai pi, ama
tun zo kei-in teh... Hongci phial zongin tua te thupi
masa lo hi. A thupi penpen ahih leh, nang leh nang
na kigen thu ahih kei leh, nang leh nang na ki
muhna zia-ahi hi... Nang leh nang bangci ki
ngaihsut na hiam? A citak mite'n ama uh tun
peelmawh uh hi...*

John C. Maxwell

A Haksa Khualzinna

*“Mihing te’ manphatna leh ahihna taktak pen
lametbei huaizah dongin haksatna-
a phutkhak hun uhciang a om zia leh
asep zia tungtawn un ki mukhia thei hi.”
~ T.B Macaulay*

Lord Beaverbrook

Mipil minthang ahih loh hangin England Minister (5) vei sem ngei hi. England leh German te a kisiat gawp lai-in, German te’ Bomb siahna khempeuh pan England te suahtakna a ngahsak mihoih leh mi thupi khat ahi hi.

A sepna khempeuh ah guallelhna-athuak den pa khat zongh ahi hi.

- ☐ Setvan zuak tawh nuntak sawm in kipan hi. Sumh hi.
- ☐ Laibu tuamtuum zuak kipan hi. Sumh hi.
- ☐ Bawhlung kimawlina inn khat lam hi. Sum zon na dingin a ngaihsut ahi hi. Kua ma’n zangh nuamlo, sumh leuleu hi.
- ☐ Thu kizakna lai tuamtuum hawm

leuleu hi. Ki deihlo. Sumh leuleu.

- ☐ 'Law' pilna sin theih nading laiphi hi. Kia hi. Sumh leuleu hi.
- ☐ Kum (20) phata hi. Nu leh pa in gawlvak lai hi.
- ☐ A teen-na Canada pan England zuan in nasep (politic) zong dingin kuankhia hi. Ngah zolo hi. Sumh lailai hi.
- ☐ Hih bangin a tupna-atun zawhloh hang' lungkia hetlo hi.
- ☐ A hanciam teitei leh kum (30) a phakteh mihau khat in ki ciamteh ta hi.
- ☐ 1943 kum teh England Minister a khatveina sep khuan ngahzo ta hi.

Beaverbrook in, apian-na khua, a inn gei ah, singlamteh khat phut in, nitak sim in meitang sak hi. Hankhuk a cih nop na hilo hi. Mihing te' nuntaakna tom mahmah in, tuikhu bang hi aa, lamet loh laitak mahin abei ziauthei ahih lam--- Tua-ahih manin ih hun-neih khempeuh manpha tak a zat theih ding kism!!! A cihnop na-ahi hi.

Mark Twain

Lai gelhsiam in minthang vangvang aa, leitung bup-pi a zelzo, mi lamdang khat ahi hi. Sumbawl theilo pi bawlnuam in, sihlawh dektak ngei hi.

- ☐ Kum (7) aphak teh khedap nei nailo. Bawngcing in gamlak ah vak thapthap lai...
- ☐ Kum (9) aphak laitak a bawng ci'n na lam pan tuikia in si dektak ngei...

- Kum (12) aphak teh a nu' kiang ah
“sangkah ding cihloh buang na ut
khempeuh hongswawl oo, hong nial kei
ning ei” cilang in sangtawp ding' ngen
ngiat hi...
- A nu in zong a tapa' nget bangun
mangpah aa, sangkah saklo in sumzong
sak hi.
- Khualumna munte ah sing-gah tui
zuak dingin kipan hi. Sem zolo hi.
- Laigelh lunglut in, hanciam hi. Sem
zolo hi.
- Sum a leitawi tawm honkhat-tawh
Refrigerator set bawl-na-ah kipawl in na-a
sep leh sumsiang kikeuh hi.
- Mortor Engine bawl-na-ah kipawl
leuleu hi. Suplawh sitset leuleu hi.
- US Pound (90000) leitawi beh leuleu
hi. Beisiang sak leuleu mawk hi.
- Type Writer bawl-na set deih in
hanciam aa, sum honkhat beilawh napi
neizo tuanlo hi.
- Alexander Grahambell tawh kimu hi.
Grahambell in Telephone bawlkhop ding
kun hi. Mark in “Aw... khau zopsuak
kullo, Wire bulkhat zangh ziau ding,
nuamtak kiho thei ding... nuihzak huai

mahsi!!!!” Cihsan ziau.

- 1893 kum, amah kum (58) aphak laitak, a leibat tamlua, lung-gim lua in aci natlawh-hi.
- A zi-in thapia in, a mailam dinguh hanciam pih-hi. A sawtlo in laigelh minthang khat hong suakzo ziau leuleu hi. Mipil pawlkhat-te in a zi’ hangin a minthang zo ahi hi, ci-in ciamteh uh-hi.

Madame Curie

Nate’ thu thei-in mipil minthang (Scientist) khat hi aa, leitung ah atheilo-omlo phial ding...

- Paris University ah sang akah lai, zawnglua ahih manin an akham ne zolo hi. Niangtui haikhat leh moh phengkhat tawh nikhat nungta zel hi.
- A lup dingteh a singkuang hong khialkhial in, lukham khat, mainul dial khat la in phalbi do hi.
- Khuavot lua in akhua-alum zawhloh – huntah, tutna-agik mahmah khat pua thapaai zel hi.
- A lupna tung mahmah ah zongh khuavot salua in kongkaw gawp zel hi.

A zawn na hangin lungkia hetlo hi... A lungkiat hetloh mah bangh in miminthang khat suak lel hi...

Jack K. Dempsey

Boxing siamin mihau khat asuak zo. Minutes (4) sungin asum ngah Pound (200000) bang apha den ding, mi hau leh minthang mahmah khat...

A nuntaakna zia-ama gen-na-ah:-

“Sakol tungtuang in sangkah ingh. Ka nuntakna-a haksat manin lai lunglut zo keng. Tuamah bangin lai thei keng. Nikhat ka ci na in, siavuan te zuan dingin ka nu tawh ka pai uh-hi. Sum ki cinglo ahih manin meileeng hawlpa’ kiangah ka nu in hehpih ngen hi. Meileeng hawlpa in: “sum na neih kei ualeh hongzui kei vua!!” Ciziau mawh hi. Ka nu a mit-tui tak-keuhkeuh in, dah mahmah hi. Cih nading theilo in themvei lungam keei ungh. Tua laitak nupi khat in meileeng tuan nading sum hongpia hi. Ka lungdam na mangngilh thei keng. Hiciang ka tun-na Topa’ hang hi. Kanuntaak sungteng thu ngenlo in lupna zuanlo, zingtho lo ding pa kahi hi. Pasian’ kiang pan hongpai ding thupha te a ngah khalo kahih ding ka dah penpen khat ahi hi. Topa in ka thungetna tulthen sang’ tamzaw hongdawng khin hi...”

James Bone

A nu leh a pa zawng mahmah ahih manin kum (13) aphak teh sang tawpta hi.

- ☐ Bawngnawi, meihol leh aalu peuh zuak-kipan hi.
- ☐ Tui galkap ah apa in lutsak hi. Pilna neilo, banah zawnglai ahih manin, alawmte in sim-mawh mahmah aa, haksa sa mahmah ahih manin, kum (19) a phakteh zato letmat tawh tawlinga hi.
- ☐ Ngeina kimawl-na-ah lut hi. Bang mah ngah zolo.
- ☐ Kisilna tuikhukpi anei te’ inn ah nasem in om hi. Bangmah ngah lawhlo

hi.

- Universe Sport ah kimawl hi.
Bangmah ngah zolo.

A tapa-alungkiat ding dah mahmah ahih manin, apa in hi bangin thapia hi. “Ka ta-aw, leitung ah apiang theilo ding bangmah omlo hi. Lungkia hetlo ding hiteh. Nakhat peuhpeuh nasepna ah thupi ngaihsut tak in semin. Nikhat niteh lapsangna ngah lel ding hiteh” □ Kum (27) phata hi. Bangmah nasep kician neizo nailo hi.

- South Pacific ah alut, Mile Nat akici mikhat damlo in, ama ta’ng dingin lut thei miao hi. Tualai ah Director a sem, Henderson in James Bone pahtak mahmah ahih manin, Holly Wood Cenema ah alut theih nading panpih-hi.
- 1958 kum, amah kum (28) aphak laitak ‘Dr. Nu’ cih Cenema kizaih zo ta hi.

James Bone in:-

“Ka nuntaak zia gending cileng uphuailo phial hi. Ka mel hoihlo, bangmah lah neilo sawnsawn kahih manin mi minthang suah ding cih limlim ka ngaihsun ngam kei hi. Ka pa in Sean Connery aw, lungkia ken’ hongci niloh hi. Ka pa ka phawk mahmah hi. Film (6) vei ka kilak laitak, ka pa-a natna nasia (Cancer) lua, lauhuai hi, ci-in thu hong ki zasak hi. Manlang tak in inn kazuat leh ka pa in, lungkham kei-in bangmah cilo ding hi-ingh, na nuntaak nading, na mailam ding thupizaw hi, lungmuang inla vapai kik in, hongcih teh kaipai kik hi. A zingsang teh phone hong kiset in na pa

in hong nusia ta! Hong kici mawk hi. Ka pa' awkhum ka bilkha pan mang theilo ahih manin, ama hong phuah ka min Sean Connery cih limlim laih ding ka ut thei kei hi. Ahi zongin Director te in hongcih niloh uh teh ka nialzo nawnkei hi." Ci-in John Culhane kiangah gen-ngei hi.

Ludwig Van Beethoven

Kum (6) aphak teh mi (6000) mai ah lasa in a ding ngam, music siam in leitung bup a sukham, laphuak siam in mi khempeuh' lungtang a satza'an, German suan te lak ah a madawk mahmah khat ahi hi.

- ☐ Kum (13) aphak teh Music sin dingin a innpan taisim hi.
- ☐ Kum (1) sung piano asin khit-teh, apa in a siapa' kiangah adotleh, asiapa in, "lamet om vetkei ei!" cihsan ziau.
- ☐ A pa in Beethoven' kiangah "na septheih dingte sem heuh ve" a cih leh "kei music siam Mozart ka bangh ding hi" cita sawnsawn.
- ☐ Kum (20) aphak teh abil gong ta dihdih, music leh la-aw te zathei mengmeng nawnlo. Hanciam in nikhat nai (8) sungbang a piano tum den.
- ☐ Concert abawl teh mihon in tha ngahlua uh ahih manun kuama sawl-loh pi-in, a omna uh pan dingto diamdiam zel uh-hi.
- ☐ Beethoven in:- "Hiciang katu'n zawhna ka siamna hang hilo hi.

Hanciamna ii agah hizaw hi. Note in zongh na Piano/Guitar te uh nikhat a tawmpen nai (8) sung na tum unla, kum (40) sung na hanciam un. Tua hileh kei' sangin na

siamzaw tham dinguh-hi.”

- ☐ Kum (40) aphak teh minthang zo pan hi....
- ☐ Kum (46) aphak teh abil gong nasia lua in hopih ding nangawn baih nawnlo hi. Tua hun laitak lian in, Beenthoven in, leitung bup azeel, lungzuan la dawng (5) leh lahoih mahmah honpi khat phuakzo lai veve.

Sun Yat Sen

- ☐ Khatvei guallelhna, October 1895 kum, Guang Zhou
- ☐ Nihvei guallelhna, October 1900 kum, Hui Zhou
- ☐ Thumvei guallelhna, May 1907 kum, Chao Zhou
- ☐ Liivei guallelhna, June 1907 kum Hui Zhou
- ☐ Ngavei guallelhna, September 1907 kum, Qing Zhou

- Gukvei guallelhna, December 1907 kum, Zhen Nan Guan
- Sagihvei guallelhna, March 1908 kum, Guang Zhou, Lian Zhou leh Sang Si
- Giatvei guallelhna, April 1908 kum, Yunan He Hau
- Kuavei guallelhna, February 1909 kum, Guang Zhou
- Sawmvei guallelhna, April 1911 kum, Guang Zhou
- Sawm leh khatvei guallelhna, Wu Chang a leh khit-teh, a piankum (46) phata hi. Lungkia tuanlo. A hanciam teitei leh a sawtlo in China President ngahzo ngawngaw.

*A piangtawm thuhaksa leh buaina te, ih
lamtawm khak thuhaksa leh buaina te, lauhuaaina
leh liinhuaaina, suplawhna leh thuaklawhna,
sepkhelhna leh phawklahna, tuahsiatna leh
meetlahna, lungkiatna leh thaneemna, lauthawngna
leh lametbeina, buaina-a kici khempeuh...
gualzawh, matutna ih ngah na dingin zuih loh a
phamawh kahlei dawl te ahi hi.*

Sumner Redstone

Thuakna leh Khialhna

*“Tuahsiatna, supna, guallelhna leh sepkhelhna
cihte na tuahkhak masak loh in gualzawhna
na ngah thei ngeikei ding hi.” ~ John C.
Maxwell*

Tuahsiatna, guallelhna, supna leh sepkhelhna cihte tuak masa lo in matutna, gualzawhna leh lawhcin-na cihte ki ngah zolo ahih lam mipil misiam, mi gualzo leh mi minthang te in a tuahkhak leh athuak khak ciatciat na tungtawn un ‘ahi ding mah hi’ ihci thei hi.

Hihi... nang zongh a tawlna hithiat mi nahih kei naak leh tuabang buaina tuamtuam na tuak-kha peelmawh ding hi.

Khatvei Edison kiangah a minthan’ theihna thu a dongh dingin tangval pawlkhat hongpai hi. Edison in:-

“Sepkhelhna pen ka ki phatsak pih mahmah thukhat ahi hi. Ka khelhna hangin a minthang kahi hi. Mi pawlkhat te in khelhna kihta in, bangmah hanciam nuamlo uh-hi. A maute in a ngaihsutna uah oltak in minthang ding (gualzo ding) ci-in um uh-hi. Pawlkhat te leuleu in, nikhat niteh hauhna in hongphut in ki omkhong theikei nave! Ci uh-hi. Hi mah hi... cihna ding danga om nawnloh taktak teh thoto in kipan takpi uh ahih manin 50% bangh a lung-gulh uh ngah mah uh-hi. Ih ihmud na pan thoto in ihphawk ding thu in, ‘thuakna’ pen gualzawhna ih ngah theihna dingin piakloh a phamawh ‘thaman’ ahi hi.”

Roman Empire akhan hunsung, a minthang mahmah mipil

Alexander Pope in a gentheih tawntung thukhat na zangei khin kha ngel ding hi. Tua mipa in:-

“Mihing hihna limlim pen khelhna hi aa, maisakna-ahih leh Pasian ahi hi. Mihing taktak nahih leh na khelhlloh a phamawh hizen hi.” Na ci ngait hi.

Mihing leh khelhna kikhen theilo hi. Ih nuntaak naak leh a khial ding ih-hi a, ihkhelh naak leh a nungta ih-hihi. Tua khelhna hangin maizum ding leh lungkiat ding hilo in, hanciamna leh ki puahphatna in nei-in, pilna ih ngah na ding ahi hi. Peter Principle leh Murphy’s Law ci-in a minthang, ‘Rules for Being Human’ a kici zuihding ngeina thu (5) na om hi. Tua thu (5) te ahih leh: Ngeina (1) na: kisin-na na sin ding hi.

Ngeina (2) na: khial cih omlo hi... kisin-na-ahi hi.

Ngeina (3) na: na siam mateng kisin-na, nasin kik-kik kul ding hi.

Ngeina (4) na: kisin-na-a olkhat sin-in na piltheih keileh a haksa zaw kisin-na na tuak ding hi.

Ngeina (5) na: na pianzia na kikhel khit-teh sin-na-a zokhin nahih lam na kithei ding hi. (Success Pg. 27; John C. Maxwell)

A lim-mahmah Coca-cola a ki deih mahmah hun laitak, Pepsi hong kithei hiauhiau hi. Damdam in Pepsi lim kisa zaw in, zongh ki deihzaw ziau mawk hi. Hih thu hangin Coca-cola bawlna-aa thudotpi Robert McMath lunghimawh ahih manin, a nasep-pih Sergio Zyman kiang ah alung hih mawhna thute genin, tu ni-in, ih gelsiam kei leh Pepsi-in hong vatzaan ding hi.” A cihteh Zyman nasep kipan in Coca-cola puahphat ding ngaihsun hi.

Coca-cola cih min-ngiat laih in, New Coke cih tawh naakpi takin hong tangko uh-hi. Hibangin amin laih in a tangko khatna un \$ 100 million zangh tum uh-hi. Kuamah in New Coke cih deihlo in saangthei ngiatlo mawk hi. Hih nasep limlim zongh Zyman a ki liatsak luat manin geltawm gawp aa-a sepgawp hikha ding hi. Ci-in mi khempeuh in sangkhial hi. Kua mah in deih hetlo ahih manin-ni (79) a sawtkhit-teh, laih leuleu in nidang aa-a zatngei mah uh zanghkik in, Classic Coke cikik uh-hi. Hihthu a sepkhial na hangun Company in naak suplawh mahmah ahih manin, Zyman a nasepna pan khawlsak uh-hi. Zyman khasia hetlo in lungkiat dingin zongh ngaihsun hetlo hi. A mah in:-

“Hih tuakhak na manpha mahmah-hi. Lelhna hilo hi. Thuakna khat hile aa, cihtakna leh hangsa’n na ii agah hizaw hi.”

1993 kum, Zyman a nasepna pan a khawlwawh kum (7) a cin

khitteh, Coca-cola Company ah Chairman leh Chief Excutive a sem Roberto Goizueta in, Zyman samkik in na semkhawm kik uh-hi. Zyman zongh kisuan-na leh zumna nei hetlo in lutkik pah lel hi. Na hong semkhawm kik uh ah nakpi takin hong minthang kik ziau lel uh hi.

Mangte' paunaak khat ah "Bawngpi na khawi laiteng, Bawngnawi banghzah suuk cih buaipih huailo hi." Cih na nei uh-hi. Man mahmah hi. Ih nuntaak laiteng khelh ding a ngeina hi aa, khelhna bek ngaihsun in buaipih ding hilo hi. Tom Peter in, "a haihuai thu semkha lo pi-in, a pilvai thu khatpeuh nasem zo ngeikei ding hi."

IBM a phuankhia pa Tom Watson, a muan mahmah a naseppih, sum leh paai vai khempeuh tavuan apiak pa in, sum-metbawl na dingin \$ 10 million zangkhial in beimang sak hi. Watson in, khatvei a nasem tengtawh meeting khat nei hi. Sum zangkhial pa ki suangtaak lua ahih manin, tua meeting a kipat phetleh dingto pah a; "Aw... Sir... ka nasepna pan hong khawlsak ding hi niteh maw? Meeting samselo in hong hawlkhia ziaulel-lo aa?" ci-in aw ling thupthup sa in gen buatbuat hi. A thugen a manteh Watson in: "bangmah sinkham kei-in. Na nasep na khawl ding hithei nailo hi. Bangbang ahi zongin, na pilna dingin ihsum neihsun sungpan \$10 million a zangh khin hilel hihang..."

Laigelh siam, thuhilh siam leh makaih siam pilna-ane, 'The 21 Irrefutable Laws of Leadership' cih laibu agelh na tungtawnin a minthang vangvang, John C. Maxwell in:

"Mihing te hihna limlim pen ki cinlohna-ahi hi... Na pumpi a khantoh tawh ki zui-in, gual-lelhna leh gualzawhna in hong sulzuih pah-hi. Guallelhna lo tawh gualzawhna ki ngah theilo hi. Tua mah bangin guallelhna mun ah gualzawhna leengla gige hi. Mikhat peuh in nang guallel hiteh! Hong citheilo hi. Na nuntaakna huu a om laiteng a guallel na hi kei hi. Nuntaakna huu nasan khiat kikaal in guallelhna in hong taisan lel ding hi."

Leitung ah mualsang pen ahi Himalayans mual khitteh a sangpen nihna Andes mualtung kantan in apai, Meileeng lampi khat om hi. Tua lampi pen Meileeng lampi khempeuh lak ah a sangpen hiin, pi 15000 val sangin tuni dongciang a ki zangh, ahoih mahmah lampi ahi hi. 1859 kumin Ernest Malinowski (Polish-born engineer) leh a lawmte in tua lampi bawl dingin a kithawi laitak un, mikhempeuh in haivai a sak uh ahi hi. Kua mah in a hithei dingin umlo hi. Sum le pai leh tha le ngal mawkbei lel ding hi. Haivai hi

ciin, mi khempeuh in mawhsak in gensia uh-hi. Malinowski leh a lawmte in ahih leh lungkia lo in sem teitei uh aa, Meileeng lampi piangsak zo uh-hi.

Jans S. Plachta in: “ Kua mahin semzolo ding hong kicih na hangin a semzo hizaw ungh. Hih nasep a kizawh theih na dingin sepkhelhna leh suplawhna genzawh ding hilo hi. Semsem mai-in a sawtna ciang tangtung zolel mawk hi. Hih Meileeng lampi ah leisung totna leh lei ki dawhna bekbek mun 100 val om hi. Hih nasepna-ahaksat zia mit-tawh muhna tungtawn in genziau tawh kicing zolo hi.” Ciliang hi.

Bangbang haksatna a om zong, tuate in bangmah khaktan zolo hi. Tupna kician tawh nasep ding kician a nei mikhat in ahih leh sepkhelhna pen pilna ngahna in nei aa, buaina leh haksatna te pen ahoih pen vanzat-te suaksak lel hi. Basketball satsiam Rick Pitino in “ khelhna pen hoihsa mahmah ingh. Kei a dingin ekleiza hoihipen khat hi. Basketball ka satna-ah ka khelhna te’ tungtawn in asiam semsem kahih lam ka kitheih sawt nailo hi. Ih khelhna pen ih siamna ding na hi gige...”

Tupna lianpi nei-in, gualzawh na ding lampi tawnin na om laitak, na thuak haksatna tuamtuam te leh na lung-gulhna bangh in piang lianlian theilo in, a ki pelh zelzel na nasepna te; tua na ki cinlahna khempeuh leh na sepkhelhna khempeuh hangin lungkia in nungkik kha het kei-in.... na ngah ding gualzawhna tawh ki nai mahmah ta nahih lam phawk inla mainawt-tawntung in .

Ka tate in hih leitungthu a theihTEL dinguh ka lunggulh mahmah hi. Leitung pianzia a lamdan' luat hang' hilo hi... Mipil misiam atam mahmah hang zongh-hilo hi... Ka deihna-ahih leh, a maute in leitung pianzia tel mahmah phot uh henla tua hileh hih leitung mahmah a hoihzaw leh a lungnop huai zaw dingin zuunsiam thei ding uh-hi. Theihna leh pilna ih cihte pen pumpi ki deekzawhna tawh kibang lo hi. Ahi zongin, a beisa hunlai aa ih khelhna khempeuh phawk-kik aa, tuabang khelhna tawh a tawntung in kipelh theih nading hanciam in, nopna leh daihna lung-gulhna tawh leitung zuunto in ih puahphat sawm leh ih phawkding thunih a kisam mahmah om khinkhian hi. Tua thute pen: a koici bang mi kahi hiam? Cihthu leh, bang septheih nei kahi hiam? Cih thute ahi hi. Bangbang ahi zongin ei leh ei kitheician photni, tua hi leh ih hihna bangbang tawh hih leitung a hoihpen dingin ahi zongin, asia pen dingin ahi zongin, ih zuun thei ciat dinghi.

Howard Gardner

Lungnop Nading Hauhna Bangzah Kisam

*“Lungnopna a khatna in, ahi bangbang
tawh lungkim theih na-ahi hi...”
~ Aristotle*

Tembaw hoih mahmah khat-tawh lungnuam tak in avaak hiauhiau, Rome khua mi, mihau mahmah khat in tuipi gei-ah Gunkuang tawh Ngasa bengin a om, mizawng mahmah khat mukha... Nga beng pa-ahih leh Gunkuang nawlkhat ah Gunkuang hotna lukham in ihmu hithiat...

Tua mipa' omzia amuh teh mihaupa in hehpihhuai salua mahmah ahih manin, deihsak mahmah na tawh:-

“Hei... tangvalpa, bang hangin Ngasa benglo in mawlk om hihial nahia?”

“Tu zingsang, tu-ni ka neek-khop ding man khinta kaih cianga”

“Ha... tua aihleh matbeh sawm nawnlo maw?”

“Matbeh lailengh bang aa zangh ding?”

Tuateg mihau pa in:-

“Matbeh leteh zuak ding, sumtampi ngah ding, tua hileh na Gunkuang bangh Set (Engine) thuahzo ding naïve... Tua teh tuithukna munte ah bengthei ding, tuithukna munte ah Ngasa tamzaw tham aih cianga sum tamngah zawlai ding naïve... Tua hileh Gunkuang tampi leizo ding, sum hau semsem ding ... Tua bang hi lecin mite-in kei mah bangmah in ‘mihaupa’ hongci ding uh hiven...”

Ci-in khantoh theih nading lampi tampi tak mihaupa in gen toto...

Tuakhit teh mizawngpa in:-

“Aw... tua nong-gen bangin mihau khat suak zenzen lengh bang kasem lai tam?”

“A!... hailua teh, tuabangin haulecin bangmah sep kulnawnlo, keimah bangin na utut in om hilhial theita ding naïve?” Mihau pa in acih leh, mizawngpa in:-

“Aw...tua ahih leh maw mihaupa, tun’ ke’n bang sem mawka ka hia...?”

Anthony Demello’ gelh
‘How Much Is Enough’pan

*Tupna kician-nei in, a nungkik ngeilo, a
tuahkhak buaina leh haksatna te kahlei bangin a
ngaihsun tinten thei mikhat ahihleh, A nuntaakna
abeima peuhmah in, a tupna mun tungin, a lung-
gulh tinten thu ngah peelmawh kha ding hi. A
nuntaakna sungah, amuh khempeuh deih in, ahawh
aciahna-ah lung-gulh ahau kawikawi, tupdeuh
cihbangh anei tuanlo mikhat in ahihleh avawh
bangin agahkhat mah at-teeiteei ding hi. Tua-a-at
ding ahih leh bel 'Kisik mah si'ng maw' Cih hi
peelmawh ding hi.*

William H. Hrison

Ahi Zolo Omlo

“Hizolo!!!

*Ihcieh thupawlkhatte,
ngaihsun taktak lehang, ih-
hanciam taktak lohman
hithei thapaai hi”
~ Sajith Cyriac*

‘Hizo kei ee!! Kua mahin semzo ke’n ciai!! Ka siamna, ka theihna leh ka hatna in aci’n zolo himai ee!’ A cikha ngeilo mitamlo kha ding hi.

Hibang kammal te in ahih leh sihna sangin akhauh zaw guu nei hi. Mi tampi te’ sep leh bawl, tup leh geel teng khempeuh zongh vut leh vaai suaksak thei hi. ‘Sepzawh, bawlzawh ding hilo hi! Kuakua in hih zoke’n teh! Haksa lua hi!’ Ci-in ei leh ei banghzah vei-ih kikhem kha ngei khin hiam? ‘Hizolo ding hi’ ci-in ih lungkiat lawh thu tampi te ahizo hetlo mah ahihiam? Bang hangin tua ih lungkiat thute mah mikhat peuh in semzo thei mawkmawk zel ahi hiam? Tuabangh mite in mihing hihna sang’ in alianzaw vangliatna nei uh ahi hiam? Hi tuanlo hi...

Thomas Edison, a sangkah lai-in asia te in laihilh zawh ngaplo zah dongin laitheilo mikhat ahi-hi. Sun leh zan tawlna lo-in a hanciam na tungtawn in Electric Bulb bawlkhia zo hi. Edison in, “a gualzo mikhat suahtheih na dingin hanciam na 99% kisam aa, theihna leh pilna-ahih leh 1% bekbek kisam hi.” Ciliang hi.

Tansawm kakah lai-in, laivuansim phial in kakia ngekngek mai hi. Kei leh kei nangawn lai-ongzo dingin kaki lamen ngiatkei hi. Bangmah neilo pi-in sang akikah ahih manin, lai kakiat niloh teh kalung neu mahmah hi.

October kha hong tunteh laivuan-na thupi khat kinei hi. Sia te in “hih laivuan-na-ah a-ongte, laivuanpi teh lamet omzawdeuh bek hi.” Ci uh-hi. Ka lai phina te akitel teh, nidang mah bangin kakia diipdeep lai mawk hi. ‘Lai vuanpi ading lamet omlo hi zen ingh maw!’ cih ngaihsun in, khasiatna leh lungkiatna lianpi tawh tua nitaak lai en zolo in, lupna ka ki deen-na vingvengh-hi.

Thu ka ngen hi. Thumvei liivei kanget khit-teh kalu kaphottoh khiankhian leh nidangin zongh ka muhkhak ngeiloh, Calender khat kageei ah na kikhai deedaa hi. Tua Calender tungah laimal golsimkhat tawh: “Ka khatha bektawh... Zech.4:6” Cih kammal na kigelh hi. Ka lungsim honglawng mahmah ahih manin ka khitui hongluang kekeuh mawk hi. ‘Aw... Pasion’ huhna-a-om naak leh na khempeuh hithei ahih lam, Lai Siangtho in honghilh aa, banghangin kei lungkia zenzen ding...’ Ci-in kei leh kei tha ka kipia hi. Ka mangngilh khak Pasion masak in, ka nuntakna ka kikhel ding ka khensat aa, Pasion tawh tonkhawm in, athak in hanciam phat ding ka ngaihsun hi. Ni danga ‘LAI’ sangin ka thupi ngaihsut zawk thu pawlkhat nusiak sitset ding zongh ka khensat pah a, tua Lai Siangtho munmah zongh ka nuntaaksunng bulphuh dingin ka kipsak pah hi.

Lamdang hi! Laivuan sim phialin lai akia denpa, tansawm laivuan-na a kitel teh amin kihel mawkmawk hi. A hizolo cihbangh omlo hi!!! Pasion in: ‘hita hen!’ A cih naakleh na khempeuh hithei hi. Willbur Wright leh Orvill Wright te Unau, vanleeng a bawlthei masa te ahih uh hang’, kuamah in a muanloh uh ahi hi. Vanleeng cih limlim zongh omthei dingin kuamah in umlo hi. Tansawm nangawn sinkha lo uh ahih manin, amau Unau zongh kimuang zolo uh-hi. Zawng mahmah sawnsawn uh ahih manin Lawi leh Bawng-guh peuh kaaikhawm in ekleiza bawlna munah zuak lingling zel uh-hi. Tuabangh peuh tawh nuntaakna-azong, pilna-anei hetlo, Unau te in ahih leh vanleeng bawlkhia thei veve uh-hi.

Tu laitak in bangh dinmun-ah om nahiam? A lungkiat huai pen dinmun ah na-om laitak, ahih keileh, a zumhuai pen dinmun ah na-om laitak zongh hikha thei ding hi. Thaneem ding leh lungkiat dingin ngaihsun peuhmah kei-in! Tua na omna mun mahpan Pasion in hong lamsaang thei hi. Pasion vanglian hi. Ahih theihloh omlo hi. Nathuak gentheihna, zumhuaina, haina, lelhna leh a dangdang buaina te khempeuh, gualzawhna na ngah theih na dingin akisam penpen vanzat-te ahi dingin Pasion in hong bawlsak theilua ahih lam, phawk tawntung in.

John C. Maxwell in ‘Developing The Leader Within You’ cih laibu agelh na sungah: - “ Vuk-khal avot mahmah na munah mikhat aneu tung’pan pantah in, khangkhia sak hile hang George Washington tawh a kibangh mikhat apiang ding ahi hi. Bangmah neilo in azawng mahmah innkuan sung pan naupang khat a khankhiat leh Abraham Lincoln tawh a kibangh mikhat asuak thei ahi hi. Naupang khat aneu lai-in, apum langkhat zawcip zah dong ding in a ki vuak gawp leh Franklin D. Roosevelt bangin mithupi khat asuak zoding ahi hi. Siavuan te in “Lam pai kik theilo ding hi” acih zah dong ding in mikhat in meikaang tuahsiatna athuak leh 1934 kum aa, taikhat taikidemna-ah Leitungbup a ding in Champion angahzo Glenn Cunningham bangin piangzo lai veve thei ahi hi. Minam kideidan-na, kibawlsiatna leh kineumuhna mun ah a khangkhia nahih leh Booker T. Washington, Marian Anderson, George Washington Carver leh Martin Luther King Jr. te bangin mi gualzo khat asuak theilai nahi hi. Nasep nabawlina-ah midangte pha zolo in ‘MIHAI bangh mah theilo’ khat in hongki ngaihsut leh Albert Einstein bangin Scientist khat nasuakzo lai ding hi.”

Na nuntaakna sungah bangbang buaina tuak in, bangbang haksatna natuak zongin tuate kizo sak in, na lungkia sak-kha het-keiin. Tua te’ tungah gualzawhna lak ding hizaw hi. Na khat peuhpeuh ‘ka semzo zen tam? Ka hizo mawk tam? A piangthei takpi tam?’ Ci-in na lungsim linglawng sak masa kha kei-in!

Banghangin semzolo peuhmah ding? Cih na lungsim sungah nungtasak zaw inla na lungtup thu mitsuan gige in! Tua thu asem ding in, dingkhia in! Kipan photphot in! A hizo lo cihbangh omlo hi! Laigelh siam Phe Myint in “Apiang theilo leh ahi theilo cihbang omlo aa, apiangthei nailo leh ahitheo nailo cihbek om ahihlam phawk gige in.” Cithei thapaai hi. Hi mahmah hi. Na nuntaakna sungah Pasian tawh na tonkhop naak leh, hih zawhloh ding omlo hi. Nang hong ompih pa in ‘HITA HEN’ a cih photphot ding a thupi hi lel hi. Bang hanghiam cihleh Pasian a ding in AHI ZOLO cihbangh OMLO hi

*Hoih mahmah in ate ziazua khempeuh suang
manpha hipah lo aa, etlawm hetlo in hoihna meel
zongh aneilo honpi khat lah suang manpha hithei
veve... Tuahsiatna leh haksatna tuamtuam tawh aki
phukha den mite gual-lel den tuanlo uh aa, mavang
in a daupai mahmah honkhat te lah gualzo den
tuanlo thei uh... Athak khempeuh kip-in khoden
tuanlo aa, alui honkhat lah kip-in to mahmah thei...
Vut-themkhat sungpan apiang khia meivaak-khat
zongh thakhauh mahmah ziau thei napi, khauh
mahmah in akuang lualua meivaak honkhat lah
khuazing in ziin' nelh ziau thei... Kham lukhu akhu*

*khempeuh kumpi hikhin lo aa, tualniam in genthei a
kisa khempeuh lah migual-lel hikhin tuanlo...
Gualzawhna leh Gual-lelhna NANG ma khutsung ah
om hi... Koi deih zaw na hiam?*

J.R.R. Tolkien

A Hoihpen Ihcieh Ciangin

*“Ihsep bangh leh ihut bangin
mihingte kipiayang hi.*

*Tua-ahih manin, ei leh ei-ih-hihna
theihtel ding leh sansiam ding kisam hi.*

*Mite’ hihna khatpeuh deihgawh luat
ding hilo in, neihtheih ciat ahih lam
upna neih ding hizaw hi.*

*Ei leh ei kitel in, ih hiohna leh
ihsiatna musiam leeng,
midangte’ mawhna ih maisak thei ding
hi.*

*Tua hun teh ei’ mawhna zongh hongmai ding
aa, ihtup leh ihngim thu khatpeuh hangin,
dahna leh thangpaihna
thuak-kha nawnlo ding hihang.”*

~ Dale Carnegie

Mualsang dawn-ah apo taaksing kung na hizo kei phial zongin,
mualkuam guamsung munte ah apo singkung khatpeuh hizaw lel
in... Ahi zongin...

A hoihpen singkung nahih zawh ding hanciam in!!

Singkung hoih khatpeuh nahih zawh keiphial lehzongh phamawh lo
hi...

Sawlbuk neu khatpeuh hizaw lel mai-in!!

Sawlbujuk neu khatpeuh nahih zawh kei lailai leh zongh phamawh nailo hi...

Leilak ah apo kiak lomkhat peuh hilel mai-in!

Ngasa lian nahih zawh kei leh Ngapeem neukhat peuh hiphial-lel mai-in!

Eite khempeuh ih vekpi-in, a uk leh alian suak-khin thei ngeilo ding hihang... Ahi zongin...

Nungzui hoih ihsuak-kimciat thei hi...

Nasep akici khempeuh zumlo, phunlo in semnuam ding hihang... Lampi lian ih suahzawh kei leh mihing te' zuihtheih lamneu khat hi lel mai ni!

Ni bangin ihtaang phazo kei phial zongin, van' aa-aksi neu te bangin vaak ciuciau ding hihang...

Bangh zahvei zo in, bang zahvei lel cih thupi masa lo hi.

Athupi penpen bel A HOIH-PEN sep ding ahi hi.

Lungskim tak leh lungnuam tak aa ih nuntaak theih na dingin;

- Midang te' hihna khat peuh deihgawh in, zil mawkmawk lo ding hihang...
- Ei leh ei-ih-hihna ih kitel sinsen zawh nading hanciam ding hihang...
- Ih hihna banglian nuntaak pih sawm ding hihang...
- Ih sepna khempeuh ah ahoih pen ding lung-gulhna neiden ding hihang...

Poet by Emerson

(Attributed to Dogglatt Malox)

A gualzo ut kahih manin, thahatna ka ngen
hi... Ahi zongin, hihlahna vive hongpia zaw ahih
manin, kiniamkhiatna, diktatna leh thumaan-na te
kasin thei hi. Nalian pipi semnuam kahih manin,
cidamna ka ngen hi... Ahi zongin katha hong
khauhsak lo ahih manin-nahoih kasem thei zaw hi...
Minuamsa khat hinuam kahih manin, hauhna ka
ngen hi. Ahi zongin zawn-na leh gentheihna bek
hongpia zaw ahih manin mipil khat kasuak thei zaw
hi... Mite' hong pahtawi ding ut kahih manin,
minthanna ka ngen hi. Ahi zongin, thaneemna vive
hongpia zaw ahih manin, ka nuntaakna sungah
Pasian akisap lam katel thei hi... 'Nuntaakna nuam
hi' ka cihtheih ding lung-gulh kahih manin,
nakhempeuh ka ngen ta hi. Ahi zongin, ka
nuntaakna ka pumpi lianbek hongpia mawk
ahihmanin, nakhempeuh tungah ka lungdam thei
hi... Ka nget khempeuh ka ngah khatzongh a omloh
hangin, nakhempeuh tungah ka lungdam thei hi...
Ka deihloh teng ka ngahna mah, ka thungetna
hongdawn-na, na hi zaw gige... 'KEI' leitung
mikhempeuh lak-ah mihau pen ka hi zen aa!

Unknown Confederate Soldier
(Galkap Ulian Khat)

Kei Leh Ka pa

“Khua-amial semsem ciangin, van aa-aksi taangte ki mupha semsem hi...”

~Ralph Waldo Emerson

June 8, 2008. Zingsang nai 6:00 hun...

“Khaikok aw... sum leh paai peuhmah tawh na lungsim na patausak-kha kei-in, LAI na hanciam inla, na omna innkuan te-in hongit-theihding na hahkat in... sum na kisap teh meltheih khat peuhpeuh kiangah ‘Sum hong leitawi pak un...ka pa te-in hong khakpah ding hi. Kongloh kik theipah dinghi...’ Na ci kawikawi-in... Banghanghiam cihleh, Inn pan na sum kisap hun hongkilap pahpah zolo ding hi. Sum a omlo hilo hi, ih Pasian hau hi...”

Kalay University ah M.Sc Final year sin dingin ka pa peek (Sitni Suan Khan Dongh, Pinlong, Kalay myo) te’ inn lam zuan-in Ka pai’ dingni, zingsang aa ka pa’ hong kamvaikhak ahi hi. Tualaitak ka innkuan sung omzia uh:-Ka Nu leh ka Pa kum (70) kiim bang hita in bang mah semzo nawnlo, ko Unau sungpan a Uu penpa kamsiatna tawh India gamah thong akiat laitak, ka Uu khat ahihleh Gilpina ngah in Siavuan siamte adelh kawikawi hunsung. Sumzong ding omvetlo ciangbek hilo in, ka batsa te baan uah bat thuahthuah in LEIBA tawh kalung-gim mahmah laitak uh ahi hi.

Ka pa’ hong vaikhak bangin sum leh paai tawh lung buaisak loding cihpen ahitheih ngiatlo thukhat ahi hi. Sanginn ah kapiak ding Fees tuamtuum, kipawl na tuamtuum te ah khiat ding, laibu laikung nengneng lei nading, Sang pai nading Motor sap cihbang nengneng, akisam pak te ah zatpak dingciang nangawn ka tungah SUM khatzongh omngiatlo thei zel takpi mawh hi.

Hibangdan thuhaksa khatvei bek hilo ka tuahkhak zelzel

takteh kalungkia mahmah mai... Ka-puan lomzial in kapi-an-na khua Pakzang ah kiciah vingveng henla sum zontheih bangin ki-zong phot leh cih bekbek ka ngaihsunsun hi.

Ka maitai zolo... Maikhing dedasa-in ka haksatna te ka ngaihsun phapha zel hi. Ka lungkia cip in, ka lametna khempeuh kisia dideek ta hi.

Tua bangin lamet bei, lungkia in, katha aneem mahmah laitak mah, Pasion a muangngiat ka pa' hong kam vaikhak na-in ka lungsim tawng pan hong hopih ciauciau hi. Katha hong khauhsak kik in, lungmuan-na leh lametna-athak in hong-guan tawntung hi. Ka dah pen hun laitak mah kha muan-na hong ngahsak zel ka pa' upna kammal ahieh leh: -

“Sum a-omlo hilo hi... Ih Pasion hau hi...”

*Meitawh aki halgawp suangmanphate, mihingte
in zangin, kizepna hoieh leh van manpha pen suak
ziau hi. Kiseek peek in, set-tawh a kizen kham, sik-
khausan te meikhau (wire) hoieh mahmah in piang
aa, kum sawtpi kizangh thei hi. A kikhawng kham, a
kisui gawp suangtum te a mangthang ngeilo ding
limhoieh leh mualsuang thupi-in piang hi. Tua
bandan ahi hi. Ih nuntakna sungah ih tuahkhak
haksatna, ih phutkhak lungbuaina atam semsem leh
ih ngah ding thupha atam semsem cih ahi hi.*

Banghun... Hun Hoihpen?

*“Tuni, tuhun laitak sang’in a manpha zaw
nadang bangmah om nawnlo” ~ Goethe*

‘Tuni June kha (15). Thaiciang ka piankum kum (30) cingta ding. Bangmalo pi-in akum sawm simin abeito hanhan himai. Ka hunhoih teng beibei ta maw?’ Cih teng ngaih sun in ka lung-gim pian phimpchiam...

Nisim in-na sem ding ka pai madeuh in, kimawl na khan sungah exercise kala den hi. Tualai ah ka it mahmah ka pu Nicolas tawh ka kimu zel uh hi. A mah kum (79) bangh phakhin-napi, a cidam in atha hoih mahmah khat ahi hi.

Tu ni ka kimuh uh teh, kapu in tha ka ngah hetlot lam hongthei hi. “Bang thulam dang om ahia, thaneem tuak sicia?” Ci-in hong dongh hi.

Ka piankum (30) cingta ding hi aa, tua thu hangin ka dahna, cihna meel ding katheih loh na thu te ka gen hi. Tuabek hilo in; “Pu aw ei mihing te’ a dingin banghun sungteng ih hunhoih pen ahi tam?” Ci-in ka dotbeh hi. Ka pu in:-

“Aw... ngaihsutna zangh in hongdongh nahih teh ke’n zongh ngaihsutna mahtawh kong phi’ kul vem-maw?” Hongci-in;

“Hi bangdan hi... Austrilia ah ka-om lai un, kei naupang lai, bangh mahsep kullo. Ka nu leh kapa in hong vak, hong kem hong khoi-in kei ka-utut in om hialhial lel... Tua hun pen kei a dingin anuam pen leh hun thupi pen khat na hi gige. Tua leh, sangkah in, buaih ka ngah phet-leh nasep ka kipan pah hi. Ka nasep tawh buai mahmah

in, bangmah thudang ngaihsun manlo. Tua bangh mah in kei leh kei ka ki vakna khop ding ka nasep na pan ngah ingh. Tua bangh-hun zongh kei a dingin a thupi mahmah hunkhat mah-hi.

Tua teh ka lawmnu tawh kimu, kingai mahmah, vak-khawm hiauhiau, nuam mahmah, thudang bangmah kiphawk manlo liang, tua hun zongh hunhoih leh hun thupi, hunnuam khat mah hi. A sawtlo in leitung galpi nihna hongtung, galtai-in, Austrilia pan US lam a zuan ding Tembaw sungah laulua kisa ling kekeuh in, ka zi tawh suahtat ding delh in ka dah mahmah hun uh, tua hunlian zongh nak thupit mahmah hi.

Canada tungin, tanu tapa ka nei uh-hi. Innkuan bucing in ka ki makaih lingling hun uh zongh, hun thupi mahmah khat mah hizel. Tua khit-teh, ka tate kisap thute buaipih in, ka gimpah hun, ka makaih niloh hunte zongh hun manpha leh hun thupi mahmah mah-hi zel...”

Ci-in a banban in hong-gen tohtoh teh;

“tua-ahih leh tu’n ee, bang ci?” Kava cih leh...

“Joe aw... hong-gen ning maw! Tu’n kei kum (79) pha khinta. Ahih hang’ Pasian’ hehpihna tawh ka cidam, ka thahat lai, tua banah kazi zongh ka ki muhcil lai uh mah bangin ka itna ki lamdang nailo... Cih dan hi... Tua-ahih teh, tu laitak zongh kei a dingin ka hun hoih penpen khat mah hi...”

Joe Kemp’ gelh
‘The Best Time of
My Life’ pan

*Mihingte' nuntaakna tom mahmah in Papo
tawh kibangh lel hi. Tua ahih manin, tangthu
tuanthu te leh hongtung ding, apiang nailo mailam
thu tuamtuam te, buaipih in ki lung-gim sak kha kei
ni! Ih kuang leh ih keu te' sungah, lungnop
tawldamna a dimin ih neih ding hanciam zaw ding
hihang...*

Grimod de la Reyniere

‘Goliath’ Na Thatnuam Hiam?

(I Sam. 17)

“Aw...kong gennop khat omlai ei!

Nang leh nang cik mah hunin ki neumuh kha ngeikei-in. Mihing khat in tuabangh in ei leh ei ki muh ding hilo hi. Nang leh nang na ki muhna tungtawnin, mite’ pi muhna na ngahthei bek ding hi, cih kei’ upna ahihi.”

~Anthony Trollope

Vatican khuapi ah a om Biakinn pi khat ii kongvang tunglian ah lim golpi khat kisuang hi. Tua lim pen, limsuaisiam Michael Angelo’ khutma-ahi hi. Tua lim gamla pi pan ki galmuh thei-in, mi khempeuh in zongh hoihsa in etlawm kisa ciat hi.

Tua lim sungah migol mahmah khat, sik lukhu khu in, akhut leh akhe tengzongh ki daalna lum tawh aki tuamcip, a kawngah namsau hoih mahmah khat asiat, akhut langkhat ah haa anei veva thaltang saupi khat tawi-in, akhut langkhat ah thalkawng gol veva khat atawi, a hat-tuak mahmah mi gol veva khat om vemvam hi.

Tangvalneu khat in tua migol mahmah pa zawhthawh bawl mahmah vial in, a nungzang pan siksian veva deep hi. Akhut langkhat tawh tua migol veva pa-a sampan kai veuvau in, akhut langkhat tawh a namsau dok in, tua mipa’ gawl a bantan sawm lian

laitak, aki suai, limhoih mahmah khat ahi hi.

Tangvalneu khat in migol mahmah khat namsau tawh agawl bantan dingin kithawi piatpuat cih bel uphuai phalo hi. Tua lim kisuang ahih leh ngaihsut huai mahmah sam! ‘Naupang khat in galkhawhang that’ cih tawh ki bangh phialin uphuai hetlo hi. Limsuai siampa in asuaih mawkmawh hilel kha ding cih upmawh huai hi.

Ahi zongin tua lim ahih leh phuahtawm thu aki suai mawkmawk hilo hi. Tuma kum (3000) hunlai pek a thupiang khat aki suai kik ahi hi. Tua hunlai-in Israel te leh Philistine te nakpi tak in ki do uh hi. Philistine te galsiam thei mahmah uh aa, atha uh zongh muanhuai thei mahmah hi. A diakdiak in a muan asuan diak uh ahi, a thahat diak leh a picing diak khat omlai sawnsawn hi. Israel te ahih leh galhang leh galsiam omlo uh ahih manin, Philistine te in oltak in a zoziau ding uh ahi hi. Hih thu hangin Israel te dah mahmah uh hi. Philistine te zo hetlo ding cih thei uh ahih manin, lau mahmah uh aa, ling kekeuh bek uh hi. Tua hun laitak, galsim ngei ngiatlo, gamsungah tuute peuh cingin ahun abei sak den, tangvalneu khat in Philistine te’ galhang penpa, kihta hetlo in thah ding ngaihsun hi. Tua tangvalneupa kuamah in muanglo hi.

Kuamah in a muan hetloh laitak mah in tuucing tangvalpaahi, David in, galhang Goliath thatzo hi. Galhang penpa Goliath thatzo ta ahih manin, David ahih leh a minthang vangvang hi. Mite in:- “Sawl in atul in that! David in a tulsawm in that!” ci-in pahtawi ziahziah uh hi.

Nang ee, galhang Goliath na that nuam hiam?

David in Goliath thatzo zenzen kei leh Israel te guallel in galte’ khutsung ah aki ap uh akul ding ahi hi. A zawhngap ngiatloh uh leh a kihtak ngiat uh Goliath athah khit uh ciang ahih leh Israel te ‘gualzote’ suak ziau lel ta hi.

Gualzawhna dingin Goliath thah loh phamawh hi. Amah that masa lo in gualzo te ki suak theilo ding hi. Na gualzawh nop leh na thah loh phamawh hi. Na thahnop taktak nakleh na thatzo lua ding hi. Na that nuam takpi hiam?

Na thahnop taktak leh tua na thah ding Goliath pen:-

A ki hatsak Goliath

Philistine te in a muan asuan uh Goliath ahih leh aki hatsak mahmah khat ahi hi. A tu'n pi (9) val bangh sang pahphot in, atha cingin agol mahmah khat hi a, galkap sungpan khangkhia-ahih manin galdo zia zongh siam mahmah hi. Zongh hau mahmah in a puansilh leh a lukhu te tamman mahmah a, mi mawkmawk in neih zawh ding hilo hi. Apuan gihna bekbek Shekel tulnga gik in, a teipi zat ahih leh Shekel zaguk bang gik hi. Hau lah hau, hat lah hat ahih manin, ki liansak in ki hatsak mahmah hi. Amai ah mikhat in alumte puaksak in, a zahtak mahmah uh ahi hi. Israel te kihta hetlo ahih manin zingsang simin to den hi. Israel te in ahih leh a galmuh phet un laukhin pahphot uh a, a-aw azak naak ua leh ling kekeuh in bu diamdiam uh hi.

Israel mite lau in abu diamdiam amuh ciang Goliath ki hatsak semsem hi. Zawhngap semsem ahih manin ni (40) sung tawntung Israel te zing leh nitaak in to thapaai hi. David in hih thu atheih ciang, kumpi Sawl kiangah, “hih mipa hangin na nasem te patau sak kei-in, keimah pai-in ka vado ding hi...” cigiap hi. Kumpipa in David kiangah, “hilo hi... hih Philistine pa' langkhat ah nading zokei ding hi. Nang pen tu'n tangval na hipan a, amah ahih leh a tangval a kipan gal a dodo ngei mikhat ahi hi.” Aci hi. David a lungsim omthei tuanlo ahih manin kumpipa kiangah:-

“Ka pa' tuute ka cinna panin, humpi neelkai ahi a, vom ahi zongin ka thatlum ngei khin hi. A maute in tuuno te amat uh ciangin, a nungpan delh in ka vatgawp zeel a, a kamsung tungsa tuuno tampi te ka honkhia kik ngei hi. Humpi neelkai leh vom te hong zosak Topa in hih Philistine pa' khutsung pan zongh hong honkhia ding hi.” Aci hi.

Tua ciangin kumpipa in David upna liansa ahih manin, “paiin! Topa in nang hong ompih taken!” ci-in paisak hi. David pai-in, guamsung atu'n ciang suangmai tangnga tawmin, a tuucin thungip sungah tuate akoih hi. A sailing tawikawm sa in Goliath do dingin guamsung pan mualtung lamzuan in kahto hi.

Goliath in zongh David kiang hong naihi hi. Ki do dingin a kinaih mahmah laitak un, David in a thungip sawk in, suangtang khat la-a, akap leh Goliath taltang khalian hi. A taltang ah suangtang tum mitmet ahih manin, galhang Goliath khuptuk buah ta hi.

David in Goliath athah na dingin lum leh tei zang selo hi. Thauvui thautang kisam hetlo in, hatna tha leh ngal zongh kisam sak sese lo hi. Agawl a bantan na dingin namsau nangawn kenglo

ahih manin, ama namsau puak mah tawh Goliath ki bantan ta hi.

Aki hatsak mahmah Goliath ahih leh tangvalneu khat in suangtang khat tawh kaplum ziau hi.

A thahat Goliath thahzawh na dingin ‘thahatna’ kisam lo hi. Pasian’ ompih na leh zawh ding upna lungsim bek a kisam hizaw hi. Gualzawh matutna ihngah theih na dingin hong huh thei hetlo napi ihmuan khak leh ihsuan khak theih thapaai thukhat in ‘thahatna’ ahi hi. Thahatna ahi siamna leh hihtheihna anei te in tua te hangin gualzo ding kisa kha uh ahih manin kisaktheih pih mahmah laideep uh hi. Tua mah bangin thahatna a neilo te in zongh, thahatna tawh gual a kizo thei ding sakha uh ahih manin lam tuamtuum tawh thahat ding hanciam ciat uh hi. Ahih hangin thahatna leh ki hatsakna te tawh gual kizo theilo hi. A taktak in ahih leh gualzawh theihna ding a kisam masa thu in, ih thahatna te suanglo in, ki hatsak na lungsim khempeuh nusia-a, Pasian muanna tawh hangsan-na ih neihna hangin a gualzo ding te ih hizaw hi. Gualzawh ding hanciam in gal na do na sungah, ki hatsakna ahi ‘Goliath’ na thah khit ciang bek in migualzo na suak theipan ding hi.

Lum leh tei a muang Goliath

Aki hatsak mahmah Goliath in a thahatna muan leh suan in aneih khitciang, lum leh tei te tawh kithawi lai hi. Sumngo sik lukhu khu in, sikpuan silh gipgiap hi. Akhe te ah sumngo ngaltuum bulh in a liangko tungah sumngo teipi khai lai hi.

Goliath in galmai samai ah alum atei te in a dalzo ding sakha hi. Gal asim taktak ciang ahih leh tua lum leh tei te in na hungzo tuanlo hi.

Goliath mah bangin leitungah mi tampi takin gualzawh nading lum leh tei te muang tawntung thei uh hi. Pawlkhat in hauhna lum leh tei te atawi laitak, pawlkhat in pilna lum leh teite pei ziahziah uh a, pawlkhat te leuleu in siamna tuamtuum lum leh tei-in zangin ki sukvik ki tovik uh hi.

Gualzawhna taktak ahih leh tua lum leh tei te’ tungah kinga lo mawk hi. Solomon kumpipa pil mahmah ahih manin tuni dongciang amah zah in apil omngei nawnlo hi. Pasian in atuam vilvel in apiak ngiat khat ahi hi. Solomon in tua Pasian’ piak a pilna

tawh agam uk in daihna phutzo hi. Hun hong bei toto in Solomon a muhzia hong kikhel toto hi. Apil' semsem ding lung-gulh ahih manin gam tuamtuam pan zi tuamtuam la kawikawi hi. Pasian a up a muanna hong bei diaidiai-in, alum leh atei ahi apil a siamna teng hongsuang tektek hi. Apil a siamna asuan tektek tawh ki zui-in, a ukna gam kisia tektek hi. Pasian piak pilna tawh Pasian' ciamsa gam aphut ding kimlai, phelnih phelthum suaksak zawsop hi. A tawpna-ah amah ngiat zongh a lungkia cipta in, "...na khempeuh a mawkna pi..." ci maita hi.

Moses leuleu asuan a muan ding lum leh tei nei ngiatlo hi. Pilna lah neilo, siamna lah neilo in hauhna lah a neihloh banah, apau ol in apau awk khat hi sawnsawn lai hi. Pasian in zangin, ama'n zongh Pasian bek mitsuan hi. Tuathu hang bek in Israel mite makaih in Canan gam zotpih zo hi. Tua banglian mah in tanglai-in thugensiam in a minthang mahmah, Demosthenes zongh apau awk khat ahi hi. Thugen in a dincil lai, mi khempeuh in zahpih in a nuihsat ziahziah uh ahi hi. Tuma kum (70) hunlai-in, laigelhsiam leh gualhuaisiam in a minthang mahmah khat omngei hi. A sepna khempeuh ah gualzawhna ngah in, mi khempeuh in zongh it hi. Tua mipa-asuah phetin a tuaci pah hi peuhmah lo hi. Lum leh tei bangmah neilo hi. Mizawng innkuan sungpan khangkhia hi. Zingsang tungin Bawngnawi zuak zeel in, asum ngah sunsun tawh sang akah mikhat ahi hi. Nuntaak haksatna tampi tak thuak kha toto hi. Tua-athuak haksatna te hang mahin, thugensiam leh mite' it khat a suakzo hizaw hi. Thugensiam leh laigelhsiam in minthang vangvang in, a laibu gelhsa te Lai Siangtho zah in hoih kisa zen hi. Mi tampi takin phattuum lawh in, pilna leh siamna baan ah cihtakna ngah lawh uh hi. Tua mipa, gualzo in a minthang den hi. Hih miminthang pa in ahih leh lum leh tei zat ding neilo hi. Tua mi thaneem, mi zawngkhal mipa pen 'Dale Carnegie' ahi hi.

Gualzawhna lampi tawnin apai khangno khempeuh in, ih lung-gulh tawntung gualzawhna picing ihngah theih na dingin lum leh tei te in honghuh zolo ding hi. Sihna peuh hong tunpih zawsop thei ahih manin, tua lum leh tei te suahkhiat photphot ding kisas hi. Lum leh tei a muang Goliath a ki hatsak mahmah laitak in, David in, "Topa in namsau leh teipi tawh a hotkhiat lohna thu hilai a-a om mikhempeuh in atheih nading ahi hi." Ciziau hi. David cih banglian in lum leh tei te in Goliath hung zolo hi. Hong hung zolo tua lum leh tei te muan khak denna lungsim thah phot limlim ding kisas hi. Gualzawhna taktak ih ngah theih na dingin lum leh tei

muanna lungsim ahi ‘Goliath’ thah loh phamawh hi.

Israel te a neumuh Goliath

Goliath ahih leh a thahat in alum atei te muanhuai mahmah ahih manin, amah leh amah zongh ki muang mahmah hi. Aki dopih ding Israel te ahih leh amah zah in a thahat leh a muanhuai omlo hi. Tua ahih manin Goliath in Israel te thusim vetlo hi. Neumuh mahmah ahih manin Goliath in:-

“Galdo dingin bang hangin hong kuankhia ngam nahi uh hiam? Tu ni-in Israel ulian te kongto hi. Ih kido theihna dingin mikhat hongpai un. Alel zawzaw sila in ih kila ding hi.” Ci-in zahko in otsan lualua hi.

Israel te tangvalneu David in azaak ciangin, ado dingin kuankhia pah hi. Goliath in amah that dingin apai David amuh ciang, thusim vetlo hi. Zahpih mahmah lel ahih manin, “Ui hongsa-a ciangkang tawh sat hongsa nahi hiam? Ka kiangah hongpai-in! Huihlak vasa te leh gamlak gamsa te’ tungah nasa kapia ding hi.” Ciliang hi. Tua bangin Goliath a ot buabua laitak, a neumuh mahmah David in suangtang khat tawh kaptuk ziau maita hi.

Goliath in ki letsakna tawh gualzo zolo hi. Ki liansak in, amah zah in a thahat lo Israel te neumuh mahmah hi. Israel te in amah atthat zo dingin ngaihsun thei vetlo hi. Amah leh amah hi kisa in midang te a neumuh mahmah laitak, tua a neumuh te mah in amah thatzo ziau mawh hi.

Tuma kum (2000) val hunlai-in, Rome gam ah naupang elbawng khat omngei hi. A lawmte in neumuh in, selnoh niloh thei hi. Simmawh mahmah uh ahih manin, a utut na uah hawlsuk hawlto lel uh hi. Tua naupangneu hong tangval to in nidang tawh kibangh nawnlo hi. Thugen siam mahmah in galkap maangkhat zong suakto zo mawh hi. Nidang a, amah a simmawh mahmah a lawmte in hopih ngampha nawnlo uh hi. Amai ah kun denden in pai uh a, acih bang bangin gamta demdem ta uh hi. Tua mipa-ahih leh ki niamkhia in, itna nei a, hehpihna bulphuh in nahoih tampi sem toto ahih manin a minthang semsem hi. A gualzawhna leh a minthan na teng mah a hazat manun mi gilo Marcus J. Brutus leh a lawmte in thatlum ta uh hi. Tua mihoih pa asih hangin, tunidongciang amin sithei nailo hi. Nungta tawntung ahih manin

Julius Caesar ci-in, mi khempeuh in ki samsam lai hi.

1788 kum pawl in galkap sang khat ah naupang khat ki simmawh mahmah hi. Tua naupang kum (16) kim pha in lai thei vetlo mawk hi. Amau khan ah mi (65) om uh hi. Laivuan simin a (64) tungsiah ngahto zo ngeilo hi. Lai theilo lawmlawm ahih manin a lawmte in neumuh mahmah uh hi. Simmawh mahmah uh a, thu omlo pi khawngin vua gawpgawp thei uh hi. Tua mihai pa in hong hanciamin, hunkhat ciang General Bonaparte ngahzo hi. A sangkah lai ua-a simmawh mahmah a lawmte in a khutnuai ah nasem ta uh hi. Amai ah kun dendin in, zahtakna apiak diamdian loh uh phamawh ta hi. Tua mipa-asepna-ah citak in galkap galdo zia zongh kiva mahmah ahih manin pahtawina ngah toto hi. Tuni ciangdong mah Napoleon Benaparte ci-in ki gengen lai hi.

A lauhuai mahmah ‘Goliath’ ahi, ki letsakna lungsim pan hongpiang, midangte neumuhna lungsim in, gualzawhna hong ngahsak theilo hi. Tua ‘Goliath’ in gualzawhna ngahlo thamlo in, sihna thuak lai hi. Midangte neumuhna pen guallehna bek hilo in, totcilna hong thuaksak theilai hi. Tua-ahih manin midang te neumuhna lungsim ahi, a lauhuai ‘Goliath’ thah loh phamawh hi. Tua in ih gualzawh nading a thupi pen thu ahi hi.

Pasian a theilo Goliath

Goliath tawh kido dingin David a kuankhiat hun laitak in, “Hih dawibia mipa pen, ka tuucin hunlai a, ka thah zelzel vompil leh humpi nelkai te tawh kibangh lel ding hi.” Ci-in, lau ngaihsut peuhmah lo hi. David in abiak Pasian’ vangletna tel in, dawibia khat in vanglian Pasian zo ngeilo ding cih theilua ahih manin hangsan takin a kithawi khia ngam ahi hi. David in a-up a muan mah bangin Goliath thatzo hi.

Pasian a theilo Goliath ahih leh ahat mahmah hangin, Pasian’ mite zozo tuanlo hi. Pasian theilo in Pasian tawh kithuah lo ahih manin, naupang khat nangawn lelziau a, gualzawhna ngahkha lo hi. A thahat in, a mipih khempeuh in a muan asuan pen khat ahih ha’ng, amah a ompih pa vanglian taktak lo ahih manin guallel veve hi.

Aki hatsak mahmah Goliath in lum leh tei te muan leh suan

in nei-in, vanglian Pasian na khempeuh bawlin a neipa ahih leh phawk kha hetlo hi. Amah leh amah hi kisa in ki muang mahmah a, a namsau, a teipi leh a teikhawh te tawh Pasian mite that dingin kuankhia hi. Tua laitak in Pasian a muang mipa in:-

“Nang nahih leh lum leh tei tawh nong kuan hi. Ahih hangin kei kahih leh a vanglian Topa, nangma ngap pa’ mintawh kongkuan hi. Tu ni-in Topa in ka khutsung ah nang hongpia ding a, kei mah in nang hong sat-tuk in nalu ka tan khia ding hi. Huih lak vasa leh gamsa te in na luanghawm ne ding uh hi. Bang hanghiam cihleh galdo na pen Topa a’ hi a, amah in kote’ khutsung ah note hong pia ding hi.” Ci-in kuankhia hi.

David in acih mah bangin Goliath lu lazo takpi hi. Pasian a thei mipa in Pasian a theilo mipa tuancil gawpta hi. Bangzah takin ih thahat phial zongin, Pasian ih theih kei leh gual kizo ngeilo ding hi. Pasian kihello hihna in gimna leh sihna hong tut zaw ding hi.

Tanglai-in Pasian a theihloh na hangin a nuntaak sung tawntung haksatna tawh a kidim mikhat omngei hi. Sabeng te in sa abet uhciang, a sukdelh a todelh uh bangin, tua Pasian a theilo pa, ki sukdelh ki todelh kawikawi a, bukna ding neilo in khua ulsa kaai-in, gimna tawl na tawh kidim cip hi. A inn nangawn ah om ngamlo in, nuamtak in zongh ihmu ngeilo hi. Hi bangin lungkhamna leh launa tawh a tai kawikawi khit nangawn ciang, kum (8) sung bangh thongsung ah kikhum lailai hi. Tualai pan a suahtak khit a sawtlo in, mi khemkpeuh in a ki lipkhap mahmah na mun ahi cybiria tuikulh ah kipuak leuleu hi. Tualai mun a tungkha mi peuhmah, mi (10) lak ah

(1) nangawn a cidam ding haksa in, a kisi lianlian na mun ahi hi. Tua tuikulh ah kum (4) sung vingveng lemet bei-in sih ding bek maingat in om hi.

A nuntaak sungin zi nihvei nei hi. A zi masa tawh ta khat neiin, kum (4) sung a kiteen khit uh ciang’ tuapnatna tawh azi si hi. Kum (40) aphak ciang zikhat nei leuleu hi. Tua-azi zongh ‘sihoihlo’ natna vei-in, bangmah sem zolo in om hi. Tua-a zikik tawh tapa khat leh tanu khat nei uh hi. Hi bangin a nuntaak hunsung khempeuh lunggimna leh buaina tawh a kidim den, Pasian a theilo mipa ahih leh Joseph Stalin ahi hi. A nu leh a pa mizawng mahmah khat hikhin sawnsawn hi. Anu in amah bangin azawn ding leh a gentheih ding phal hetlo ahih manin, a tapa Stalin, Pasian nasem khat asuak dingin thungetna tawh a-apap ngei ahi hi. Lai Siangtho

sang zong kahsak in kum (7) sung tawntung Pasian' thu asin ngeikhin khat ahi hi.

Ahi zongin, Stalin in, Pasian' thu sinsin napi nuntakpih lo in, up leh muanin nei theilo hi. Pasian' thu-um theilo bek thamlo in, 'Pasian omlo hi' cilai hi. Hi bangin Pasian theilo in Pasian omlo hi a cipa-ahih leh leitung ah a nuntak sung limlim in zongh haksatna, gentheihna leh lung-gim guallelhna tawh ki dim hi.

**Pasiantheihnaingualzawhnahi.Pasian
theihna in minthanna hi. Pasian
theihna in lei leh van hauhna bucing ngah
theihna-ahi hi.**

Gualzawh ding hanciam in ih kalsuan laitak in Pasian ih theih leh ih theih loh ih ki sittel ding kisam mahmah hi. Goliath ahih leh a thahatna leh alum atei te muanhuai-in khauhpai a, vanglian mahmah napi, Pasian tawh nungta lo in, Pasian theikha lo ahih manin, guallel veve hi. Pasian theihlohna in guallelhna hong ngahsak in, sihna nangawn hong tunpih hi. Gualzawhna ih ngah theih na dingin Pasian theihlohna-ahi 'Goliath' thah loh phamawh hi. Tua khit ciang bek in ih gualzo thei ding hi.

*Ki mawlna khempeuh phial ah; nungkhin phot lo
in mai kinawt theilo sese hi. Genteh na in:- Thal kap
ding mikhat in, thalkawng kek masa lo in, thaltang
lawnkhia theilo hi. Thau lawn ding khat in, thau zang
meek phot lo in thaulawn theilo hi. Tennis kimawl ding
khat in zongh, akhut a nungah vik masa lo in Tennis sat
theilo hi... Tuamah bangin; Bawhlung (tukpeng) sui ding
khat in, bawhlung asuih ma in akhauh ding adeih zah
tawh kizui-in, nungkhin in thala phot hi. Hihi... Ih
nuntaakna sungah thukhat peuh mainawt dingin ih
kithawi teh nungkhin phot in thalak peelmawh kulthei
hi.*

Billi P.S. Lim

A Maute Lungkia Lo Uh

*“Buaina leh ha satna a
omloh laitak,
bangci nungta hiam? Cih sang’in
buaina, haksatna sungah bangci
nungta in, koilam mitsuan aa,
bangci mainawt hiam? Cih mihing
khat adingin athupi zawtham
tawitehna khat ahi hi.”*

~Martin Luther King, Jr.

- Aristotle, Onassis ah sang akah lai-in, ahai pen in ki ciamteh ahih manin, a lungnuam ngeilo hi. Lai a theihloh luat man hangin sang tuamtuum pan a ki hawlkhia kawikawi ngei ahi hi. Lungkia lo in hanciam hi. Hunsawt sim khit-teh Diploma ngah theih nading laivuan na, ong zolo sawnsawn hi.
- General Douglas Macarthur, Galkap sang minthang khat ahi West Point ah alut theih na dingin laiphi hi. Kia hi. Phi leuleu in kia

leuleu hi. Lungkia selo hi. Thumvei a phi na-ah lut khuan ngahzo tasam hi.

- Charles Darwin, a sia te in ‘a na vaak meello’ khat in a ciapteh uh ahi hi. Lai hanciam in Evaluation Theory mukhia hi. Tua hunlai-in mite in-nuihsan lel uh-hi. A pian-na-anu leh apa nangawn in, na sepnop leh na ut thute haivai thei lua acih uh ahi hi. Lungkia lo in hanciam hi. Tu ni dongciang Biology asinkha khempeuh a dingin mangngilh theihloh ding mipil mahmah khat suak zo veve lel mawk hi.
- Leitung buppi ah Basket Ball siamin a minthang mahmah ngei, Michael Jordan, tan (8) akah lai-in, Basket kimawl siamlo lawmlawm ahih manin kua mah in ki mawlpih ding deihlo uh hi. Jordan lungkia tuanlo... A hanciam tentan leh kum (20) aphak teh Leitung bup ah mithang vangvang ta.
- Leitung bup zelh in mi khempeuh in a ki deih ahi ‘Exodus’ cih laibu agelh pa, Leon Uris, tansawm kum tampi simkha hi. A diakdiak in Manglai lel mahmah hi.

Lungkia lo in a hanciam teitei leh alelh mahmah Manglai tawh agelh laibu hang mah in Leitung bup in thei ziau hi.

- Leitung ah Music tawh lasa siamin aminthang masa penpen, Enrico Carosu, lasak zia (vocal) asin lai-in, asia pa in, “lasak tawh minthang zokei mawk niciai! Na-aw in ci’n zo vetkei ei!” Acih hi napi, lungkia lo in a hanciam teitei leh leitung bup ah lasiam masa penpen khat suak zo lai veve.
- Mualsuang tungah laigelh leh limsoih siamin a minthang mahmah, Rodin, Khutsiamna sin theih nading laivuan-na aphi lai-in, kiakia hi. Lungkia lo hi. Thumvei ciang ngah hi.
- Leitung ah a mingthang mahmah khat ahi, Forbes Magazine a ki bawl-na-ah Editor a semngei teng lak pan a minthang phadiak Malcon Forbes, University akah lai-in, ki pawl-na tuamtuum te ah panmun deih mahmah napi kua mah in muanglo ahih manin bangmah ki semsak lo hi. Lungkia lo hi. Hanciam tinten in, ama makaih natawh Forbes Magazine phuankhia in leitung bup

zelzo lel hi.

- John Milton, a mit-taw in, mi khempeuh in lai theizo dingin umlo uh-hi. Mit-taw pi mah lai gelh theih ding alung-gulh luat ma'n in kum (17) sung bang hanciam in laisim dan kisin sin hi. A sawtlo in a minthang mahmah 'Paradise Lost' cih laibu gelhkhia zo lel hi.
- Sony Corporation a phuankhia pa, Akio Morita, asang kah hunlai zawng mahmah hi. Sangsum pia zo ngeilo hi. Lungkia lo hi. Lai pil-lo sawnsawn hi. Laiphi sim in atawpna ngahden hi. Lungkia tuanlo in hanciam veve hi. A khangno' hun, a hunhoih sunglian in mihau leh mi minthang khat suakzo veve hi.
- Thomas Edison, Ligh Bulb a bawlcil-lai, khialkhial ahih manin (200) vei vaal bangh puahpha zen hi. Lungkia deklo. Media te in Interview uh-hi. "Edison aw na gengen teh nakhelh tamtuak liang mahsi. Bang zahvei puahpha khin nahia?" Ciin adot uh leh Edison in, "Kei ka khial ngeikei hi. Bulb hoih mahmah ka bawlkhin ta hi. Tua ka bawl-na-ah kahlei dawl (200) kahto khin ingh."

➤ Rock Music tawh a minthang masa penpen, Britist Rock Group khat ahi, The Beatles te, Studio ah la a khumcil lai uh, Decca Recording Company ah nasem te in: -
“A aw limlim uh deih-huailo hi. Mite’ lungsim lawngzo ngei ke’n teh.” A cih uh ahi hi. Beatles ah a makai pa John Lenon in, “tua thu hangin ka hanciam nopna tha hongkhauh vat zaw mawk hi.” Ci ziau hi. Lungkia lo in hanciam uh aa, leitung bup linglawngsak zo uh-hi.

➤ Albert Einstein, kum (4) aphak teh pauthei nailo. Kum (7) aphak teh laigelh thei nailo. Lungkia lo in sangkah teitei. A sia pa in ‘akhuak manlang lo, mitawh a kipawl theilo ding, a lungsim amaan taktak lo hi.” Ciliang hi. Einstein tua kammal te hangin lungkia selo. Zurich Polytechnic sangah lutkhuan ngenin kipia lo. Lungkia tuanlo. Switzerland ah a om College khempeuh phial ah Entrance phi kawikawi. Polytechnic ah a lutzawh nading kisin-na in aneih kawikawi hi-in, a lametna khempeuh abei hun ngawngaw teh a lunggulhna sangah lutzo teisam hi. Tua khit a sawtlo in ‘Theory of Relativity’ mukhia. Tu ni dongin sang lai simna te ah kisin ciatciat

lai.

- England Prime Minister te' lak ah a ki mangngilh theilo ding, Winston Churchill, a sangkah lai-in lai thei vetlo. Laikia niloh. Galkap maang khat hinuam lua-ahih manin, galkap lut theih nading laivuan phi. Kia pah. Lungkia lo, phi leuleu. Kia leuleu. Lungkia tuanlo in phi teitei. Liivei aphie na petpet teh ong ngawngaw. Kum (62) aphak teh Minister ngah zo nailo. Lungkia thei tuanlo. A teek kuan lawmlawm teh a lunggulh ngahzo pan. England Minister a ngah teh kum (66) phata.

Suahtakna ding hanciamin na ihsepna-ah,
thadah ding cihbangh hi theilo hi. Hih ihnasep-pen
nikhat nasep hilo hi. Khakhat sepding zongh hilo hi.
Kumsawtpi sung tawlngalo aa ih hanciam ngiatngiat
ding nasep khat ahi hi. Tuabangin hanciam nuamlo
in, tulehtu aa ngahpah nopna tawh lungkia in
atawlnga ding, ahih kei leh, lametbei-in ei leh ei aki
susia liang ding te ih-hi kei hi. Tua bangdan
lungkiatna ahih leh mihaite' lungsim puakzia khat
ahi hi. Tua-ahihmanin, lung kikhat in, lametna
tawh, tawlngalo in mainawt ni!

Boyoke Aung San

Pathein myo ah abawl uh athumvei-na

*(The 3rd Convention of Burma
Student's Union) ah agen thu ahi hi.*

A Hoihpen Kam Vaikhakna

*“Thu khempeuh ah na lungkim’ theih na dingin
a hoihpen a ngah ding bangin lametna hoih nei-
inla, a haksa pen atuak ding bangin
kiging khol tawntung in” ~
Boyoke Aung San*

Kapa tansawm sangsia khat. Nikhat Sanginn apai dingteh ka nu kam a vaikhak-khat kaza kha hi.

“Harry kiangah ngen o! A tha-adah keileh kiak nabot leh hoih ding hi ei!” Kalthum, kalli ding khawng apai khit-teh, “Ei... Harry na thadah hetkei leh hoih ding hi ei!”

Ka lawmte tawh vakna ding honkhat ka geelsa uh a om teei hang’ ka pa in ka nu’ tungah a vaikhak bangin kiak kabot mai hi...

Kiak kabawh kawmkawm in, ka pa’ hong kam vaikkhak ngaihsun in keikia kanui simsim hi...

“Aw... ka pa’ cih bangin thadah hetlo aa kiak kabawhpen siakei (hoih) mah veh ee!” Ci-in tha ka ngah kik hi...

Tu in ahih leh kum (60) bangh sawtkhin hi napi, ka pa’ kammal ka bilkha ah ging-ging lai hi. A tuaci dingin a ngaihsun hetlo ka hi hi. ‘Th utkhat ih sepkhak keileh ih sepkhak khat peuh tungah sepnopna lungsim neih theih na dingin’ ka pa in honghilh

nahi gige, cih kaphawk-kik san hi.

Tansawm kakah lai Maths kakin vetkei hi. College kahlengh Maths limlim lalo ding cih ka khensat hi. College katun' teh kumkhatna kakah sung tawntung sinloh phamawh mawk hi. Tua takteh Ka pa' kammal ka phawk kik mahmah hi. Bangbang ahi zong kiakbawh loh phamawh ahih manin, hanciam takin bawhmah kul ding!!! Ahi zongin a lamdang khatah Maths lak-kul nawnlo in ka lunglut mahmah Subject te bek sintheih ding hun hongtun' teh Maths zongh la veve in Differential Calcula ciang bang kakah hi.

Biakinn ah Pasion' thugen te zongh mipi te in:- "A ut-thu gendingin sawtpi tak a na kisin khinsa hi..." Cithei kha zelzel uh hi. "Tuabang hilo hi..." Sermon hoih khat ngahna ding athubaih hilo hi. Sermon ding ki ginkholhna cihpen Pasion' nasem tampi tak in akihtaak pen uh thukhat ahi hi. Sanini hongtun' teh Sermon na ding thu kabawl simin ka pa' kammal kaphawk kik zelzel hi... "Harry kiangah na gen o! thadah keileh hoih ding hi ei!"

Ka pa' kam-mal in ka sep nop loh thuhaksa katuah khak teh tha hongpia mahmah hi. Tua kammal hangin kasep bangbang lunglawp tak in kasem thei hi. Nasepna ih cihpen tuipi daidiidee sungah a om alian mahmah tuikhalpi tawh kibangh hi. Apua lampan akimuthei teng pen athemnengkhat leh atungtham tengbek hi a, asungtawng ah agolzaw thampek muh theihloh na om gige hi. Mite in ahoih leh anoptuak mahmah apualam adum diidia tengbek mu-in thei uh ahihmanin, agik mahmah thulianpi asungtawng ah a om lam theikha hetlo mawk uh-hi. Haksatna tampi te mah tuancil in, akithawikhia mite bekmah midangte' mai-ah madawkw zo uh-hi.

Tu in ahih leh kum (75) kapha khinta hi. Sihding bek maingat in a omta kahi hi. Ka teek thimthiam hangin ka pa' hong kamvaikhak pen ahih leh ka sungah neusuah tawntung hi.

Ka pa in hong vaikhak hi !!!

"Teek leh vuaina zongh lungdamtak mahin san' theih ding kisan hi..."

Harry Emerson' gelh
"The Best Advice I
Ever Had' pan

‘Thumaan na leh cihtakna’ pen mihing khat a dingin neih ding a kisam pen khat ahi hi. ‘A bangci mi ahiam’ cih sa’ng ‘bangci gamtat hiam’ cih thupi zaw hi. Ahi zongin, ‘Bangci mi ka hiam’ cih leh ‘bangci gamtat ka hiam’ cih kikhen theilo leuleu hi. Na hihna bangin a gamta nahi hi. Ih hihna leh thupi-ihsak ki khenkham theilo hi. Bang thupisa na hiam? Tua thupi nasak thupen na nuntakna leh na tot ding lampi zongh hipah hi. Thumaan cihtakna-a thupi ngaihsut mi nahih leh, thumaan cihtakna in hongpiak thaman khat na ngah ding hi. Thu dang khatpeuh a thupi ngaihsut zaw mikhat nahih leh zongh, tua thupi nasak thu in hongpiak thaman khat mah na-at ding hi. Na-at ‘agah’ in bangh a hi hiam?

John C. Maxwell

Gualzawh theihna'ng Nuntaakpih akul Thupawlkhat

*“Na nuntakna-a thupit lam na tel
mateng, na hun thupi na sa thei ngei kei
ding hi.*

*Tua mah bangin, na hun na
thupi ngaihsut mateng,
‘na’ nasem ngeikei ding hi.”*

~M. Scott Peck

Gualzawhna-a ngah nuamlo kuamah omlo hi. Naupang khat nagawn apil, asiam leh a gualzo ut hi. Mi khempeuh pil ding leh hauh ding ki ut ciat hi. Tuaciang bek hilo in, leitung bup ah ihmin bangh a thangzo hi leh a lungdamlo kuamah omlo ding hi. Tua bangin gualzawhna, minthan-na, leh lawhcin-na te ih ngahtheih na dingin ih nuntakpih ding a kizam thu pawlkhat om hi, tuate ahih leh:-

Sunmang neih kul

Stephen R. Covey in “na khempeuh nihvei kibawl hi. Lungsing sungah muhkholhna leh bawlkholhna om masa lo in mit-tawh muhtheih bawlkhiatna piangthei ngeilo hi. Na lungsing sungah na ngaihsut bang leh nageel bangin a semkhia theipan nahi hi.” Lungsing sungah muhkholhna thupi mahmah hi. Mi gualzo ihcih te in sunmang neiciat uh aa, tua-a sunmang te uh a thupit lam zongh tel sinsen uh ahih manin, hangsan tak in mainawt in hanciam ngam uhhi.

Mawtaw bawlthei masa, Henery Ford in khatvei Mawtaw Engine tuampian khat bawlkhiat ding sunmang in nei hi. Tua-abawl nop Engine namte tuhun in V8 kici hi. Ford a sunmang tawh buai mahmah in a nasemte pawlkhat tawh a muhna zia te laitawh ciamteh keei uh-hi. Nikhat Enginneer te lak uh-hi. Munthum munlii ah lak kawikawi uh-hi. Engineer khempeuh in Ford kiang ah hi bangin genkik ciat uh hi.

“Hih muhna pen engineer ngeina tawh kituak theilo hi. Hih ngaihsutna piangthei lo ding hi.” Ci kik ciat uh-hi.

Ford in “piangthei mah ding hi. Hong hanciam pih un.” Ci thapaai mawk hi. Engineer te in a cihngei bangh un, “piang theilo hiveh aw...” cihsan zeel uh-hi. Ford in: “piangthei mah ding hi. Hun sawtpi abei zongin phamawhlo hi... hong hanciam pih un” citeeiteei hi.

Engineer te in zongh kha (6) sung hanciam uh hi. A cihna ding uh theilo uh-hi. Kha (6) hun laak beh in hanciam leuleu uh-hi. Hizo tuanlo hi. Ford in “lungkia kei un... hong hanciam pih lai un” ci teeiteei aa, engineer te in zongh hanciam niloh in, hunsawt sim khitteh, Ford’ deihdeih engine koici bawl ding cih idea ngahkhia theita uh-hi. Ford in: “lamdang lo hi... ihmuh bangh ihnagh ding a ngeina ahi hi...”

Khatvei, Midwestern College ah Pasian nasem khat khualzin in pai hi. President pa’ inn ah zantaam hi. Tuapa pen Physics leh Chemistry ahih professor khat zongh ahi hi. Nitaak an a neek-kawm un kam ki kumkum uh aa, Pasian’ nasem Pastor pa in: “mikhempeuh a sawtlo in liangko kikim ta dingin ka um hi. Bang hanghiam cihleh, nate’ thu khempeuh lah mipil te in theikhinzo ta in, a omngeilo bawltheih bawlmawh khempeuh lah ki bawlthei khinta...” acih leh, professor pa in sangthei hetlo in: “hilo ee sia... a

ki bawlthei nailo bawltheih lai ding tampitak omlai hi...” a cih leh pastor pa heh mahmah in,”...aw... tua ahih leh nang na bawlsawm na peuhpeuh khat hong-gen pah dih vele tuabang ahih leh?” Ci guapguap hi.

Professor pa in, “hilo hi sia aw... ke’n kahih thei loh hang’ hih theih ding tampi omlai cih ka thei hi. Tuzawh kum (50) pawl khawngah mihingte vantung ah leengthei ta phial ding uh hi ei, na en gige lecin.” Cimawh hi.

Pastor pa in: “ha!!! khiatna neikei mahsi. Mihingte vangtung ah leengding cih bang. Tun’ bel dawite a leengleeng mah vevua...” Cih sanziau leuleu hi.

Tua pastor pa pen Wright ahi hi. Tapa nih nei aa, a tapa te ahih leh a pa’ sangin a muhna uh zaizaw tham hi. Sunmang thupi nei uh aa, tua-a sunmang uh a sawtlo in taksuah sak zo uh-hi. Pilna neilo uh-hi. Zongh-hau beeklo uh-hi. A sunmang uh a thupit lam thei-in, hanciam uh ahih manin gualzawhna ngahzo uh-hi.

Tua Unau te ahih leh Vanleeng bawlmasa ahi,
Orville leh Wilbur te ahi hi.

Thumaan-na nuntaakpih kul

Thumaan in a ciampel ngeilo Vaphual tawh a ki ciamteh zomi te ih hihi. Pu le pa te’ hunlai-in thumaan-na nuntaakpih takpi uh-hi.

Tuhun ciang bel Vaphual lim bekma kisuai kawikawi-in ki nuntaakpih nawnlo hi. Thumaan thutak a gente peuh zuau gen tangzaw in, zuau gengen te peuh mi thumaan suakzaw behlap phial ta hi.

Bangbang ahi zong, gualzawhna lampi azui mikhat in bel thumaan-na a nuntaakpih loh in a tupna tungzo lo ding hi. Tanglaiin Sengam makai te in agam uh it mahmah hi. Galte in a lakzawh ngiatloh ding dei uh ahih manin, agam uh khulhpi tawh umcip hi. Tua kulhpi Great wall ci-in leitungbup ah tuni dong thang vangvang lai hi. Tua kulhpi saang mahmah ahih manin kua mah in kantan theilo hi. Hoih mahmah in, sah mahmah ahih manin, a phukham zo omlo hi. Kulhpi muanhuai mahmah ahih manin gam-mite khempeuh lungmuang mahmah uh-hi. Ahi zongin, kulhpi a kilamh khit kum (100) sungin (3) vei sitset galte in Sengam vatzan

zihziah mawk uh hi. Galte in kulhpi phukham lo in, zongh kantan lo uh-hi. Khulh kongcing te tawh ki thuzawh uh ahih manin lau hetlo tak in, kulh kongpi mah zui-in alut uh ahi hi. Gam makai te in kulhpi cian ding bek naphawk in, thumaan gamtatna ki hilh ding mangngilh kha uh hi keileh, galte in thumvei tak la zolo kha ding hi.

Thumaan-na lo tawh gualzawhna ki ngah zo ngeilo hi. Thuman-na lo tawh mi kisuak theilo hi. Mang te'n paunaak ah:- “na neih na lamh khempeuh abei zongin, bangh mah na sumh naikei hi. Na cidamna ahoih keileh pawlkhat a sumh nahi hi. A hi zongin gamtatna hoih na neih kei leh na khempeuh a sumh khin nahi hi.” Thumaan lopi tawh nuntaakna hangin bang zahin kisuplawh thei hiam cih, H. Chomondelay in lakam aphuah khat om hi... “Simleitung gua bangh hin’ na, zaangpeh siik bangh to lah ee... Va bangh hamsa pupa te’n zongh ee...

Min leh vaang hailawh liang uh ee...

Judah in dangka sawmthum tawh khek ee...

A Topa azuak in ki ngaihsun kha ee...

A ma nuntaakna ngiat zongh a zuak-khak lam mangngilh ee...”

Cihtakna nuntakpih kul

Khatvei Africa gam ah a om Pasian nasem te’ kipawlna khat pan David Livingstone lai kikhak hi. Tua laikhak sungah “... Pasian’ nasep nading munhoih leh lampi kihong natheih a om leh hong zasak in! Hiah, Pasian’ nasem-nuam-mi om hi. Kong paisak thei ding uhhi...”

Livingstone in laikhak thuk-kik in “... munhoih leh lampi nuam bek ah na-asep nuam-mi ahih leh hong paisak-kei un! Kadeih kei hi. Kei tawh a kithuah ding mi ahih leh lampi haksa ciang bek hilo, paina ding lampi a ki siatcip nangawn ciang, nungkik lo in a mainawt-teitei ding mi kadeih hi...”

Cihtakna neilo pi-in gualzawhna kingah theilo hi. Lai Siangtho sungah zongh ‘haksatna natuah ciang, nalung akiat leh a ginalo mi nahi hi.’ Ci-in kigelh hi. Haksatna ki hello nuntaakna cihsang omlo hi. Tua haksatna sungpan cihtakna tawh nungkik lo in hanciam na in zawhna piangsak zo bek hi. David’ gelh Late Lai

Siangtho bup-pi en lehang, a tamzaw haksatna sungpan gualzawhnaa ngahna hang aa-a lungdamna thu vive ahi hi. Mi tampi takin Pasion muhlawh in, a pianthak lawh uh, nungzui Paul' laikhak te zongh Thonginn sungpan agelh vive himai hi. Leitung ah mi minthang te khempeuh zongh a ki patkhatna uh haksatna kuampi vive mah ahi hi. Leitung tangthu bekbek Vol. (20) ciang bangh a gelhzo Francis Parkman, leitungbup ah mihau minthang mahmah Fred Smith, Pasion deih penpen itna nuntakpih in leitungah ki-itna aphut zo Mother Teresa, gam leh lei makaih in mitampi sihna ding sungpan a honkhia Winston Churchill, muhna thak leh ngaihsutna thak tawh leitung a khangto sak Marie Curie, a kipan mi minthang tampi te ahih uh leh, thumaan-na leh cihtakna te nuntak pih in, haksatna sungah a lungkia het lo te ahi uh hi.

General George Washington, a nasep hunsung in Revolution War tawh kitalsik hi. Thumvei bekbek galzo hi. Lungkia lo in hanciam hi. A nunung na-ah British te in gallel takpi ta hi. Yorktown ah Washington tawh ki lemna bawl uh-hi. Tua lai ah British general Cornwallis in America Commander pa' tungah hi bangin gen hi.

“... Sir aw, nungkiklo in na mite uh na makaih zawhna uh leh, a lungkia ngeilo ding Christian nungzuihoih nahihna hangun kong pahtawi hi...” Hihi... ihtup ihsawmna ih tunzawh na dingin nungkik hetlo in, cihtakna nuntakpih aa, mainawt-tawntung ding kisas hi.

Pasion muanna nuntakpih kul

Pasion in amah bek ih muanding lung-gulh mahmah-hi. A mah bangzhah ciangin muang ih-hiam cih zongh theinuam mahmah hi. A mah a muang ngiat te' tungah lungdam mahmah ahih manin, a tawntung in ompih in panpih ngiat hi. Pasion in tuazah in mihing te hong lung-gulh mah bangin, mihing te in zongh amah ih lung-gulh loh in hitheilo citciat hi.

Mihing te in Pasion lo tawh bangh mah ki hih zolo na pi, Pasion kihel peuh leh a hitheilo omlo leuleu hi. Khat veivei Pasion' hong ompih lam ki mangngil in ei leh ei bek ih ki ngaihsut khak ciang, lungkhatna leh thaneemna in ih lungsim hong luaheip thei hi. Watchman Nee in a laibu gelh 'The Normal Christian Life' acih sungah “Pasion' tate in dahna leh khasiatna-atuah hun uh ciangin, a

lungtang sunguah aneih uh lungdamna thumanpha te a phawk kik theih dinguh thupi mahmah hi. Na ki sapna khempeuh hong cingsak thei ding vanzat hoih mahmah khat na sungtawng ah na neih gige lam na thei hiam? Na teen-na khuapi nangawn ki khin khiatsak theih nading vangletna naneih lam na theikha hiam? Leitung khempeuh a lokzo ding vangletna na neih lam ee, na kithei kha hiam? Deihsakna tak tawh kong-genlai ding hi. Pasion' kha siangtho sungah a suakkik-khin mikhat nahih leh na sungtawng ah Pasion nungta hi." A sungah Pasion' kha siangtho a nungta mikhat a dingin banghmah lungneu nading leh lungkiat nading omlo hi. Bang hanghiam cih leh Pasion in hihtheihloh neilo hi. (Luke1:37).

Pasion in Samson a ompih laiteng, Samson in lelh neilo hi. Pasion in ompih ahih manin La khaguh bek nangawn tawh a galte tampi thatzo hi. David in zongh Pasion a muan mahmah lam Pasion in thei-in, lungdam ahih manin a vangletna thatawh Goliath zawhpihhi. Tua banglian mah in Pasion vangletna bek mah tawh Jericho kulhpi kicim hi. A nuntaakna sungah Pasion bek muan leh suan innei-in, thumaan-na-a nuntaakpih; bangbang haksatna leh zetna-a tuah-hangin lungkia lo in cihtakna-a lenkip tawntung, Joseph ahih leh Pasion in mawk-koih lo hi. Mite' tungah lamsang takpi-in, leivui lak pan kumpi-inn tut takpi hi. Pasion' nasepna ihmuh theih na dingin ki niamkhiat natawh amah bia in ih muan ngiat-theih ding kisam hi. Watchman Nee in:- "Topa-aw na khempeuh nang a' hi khinta hen. Ka nuntaakna mahmah zongh nadeih na banghbangh in piang ta hen. Na deihsa tawh a kituaklo thudang ka ngaihsun ngeikei ding hi, Pasion aw... ci-in ih ki ap ap masak loh in ih Topa-a biaktaak taktak a hih lam koicih muhtheih ding ih hi hiam?" Ci-in gelh hi. Ih hihna khempeuh tawh amah muangin, ama deihsa bangh in ih nuntaak naak leh ih muanna zah ciangciang, ama'n hong sepsak ding ahih lam zongh kamciam hongpia khin lai hi.

Pasion anei mikhat a dingin zawhlah ding omlo hi. Thugen siam, laigelh lah siam in makai hoih khat lah ahi, John C. Maxwell in: "Mi gualzo khat ka suahtheih na dingin Pasion ka theih masak photphot kul hi. Tua khitteh kei a dingin Pasion in bang hong deihsak in, bang hong sepsak nuam hiam cih ka theih ding ki sam leuleu hi. Tuateng ka theihna tungtawnin ka neih vision (sunmang) ahih leh manpha in thupi hi. Tua ka sunmang ka ngahzawh na dingin ka hihna khempeuh sungkhia in ka hanciam a kul ding ahi hi. Cihtakna ka nuntaakpih kul ding aa, thumaan tak in ka gamtat

kul ding hi. Tua teng khempeuh ka neih khittah midang te ading
khaici manpha ka vawh ding kisam hi. Hi bangin ka nuntak theih
takciang, mi gualzo ka hita hi cih ka um hi.”

*Lungkia lungneu kei-inla, natup nageelna te
kisasak kha kei-in! Tu ni-in... Nitaang bangh ahi,
na lametna ni-in mual hong liamsan in, lung-gimna
meiipi leh patauhna hugingpi te in hong nawk gawp-
phial zongin, na lametna khahsuah kha kei-in...*

*Zeisu A mah kikhello in om tawntung... Tua
lawmhoih Zeisu nangtawh omkhawm gige hi...*

Anna Lee Edwards McAlpin

Lametbei Mi

*“A lipkhap huai haksatna tawh a ki dim
nuntakna pen, ukna gam a dingin,
Innkiu suang tawh kibangh-hi.” ~
Estee Lauder*

Napoleon’ khutnuai ah nasem, mithupi leh mi hangsan mahmah galkap-pa-in, galsung ah buaina tampi atuah laitak un, galvil’ buk sungah galvil in atut kawmsa in, gam leh lei ading akiptak-khiat zia leh a innkuan sung nuntaak zia te abanban in ngaihsun kik-kik hi.

Laidal khat la in tua laidal tungah aloh ding akisam, leeiba aneih khempeuh leh a innkuan pih, anu leh apa-asang-gam te avaak atah nading akisam sum leh paai te, abanban in gelhsuksuk hi. A khasum leh aneihsun sum tengin aleibat-teng leh a innkuan pihte avaak atah nading a kisam nate cin’ zo vetvet lo ahih lam theilua ahih manin, lamet bei-in khakun ngiungeu hi. A cih nading thei nawnlo, lung-gim mahmah kawmsa in tua-a laidal tawlam ah khitui luang kekeuh kawmsa in:-

“Aw... hih kakisap sum leh paai te koilam pan hongpai-in, ka leiba te kua in hong loh sak zozen tam-maw? Ci-in agelhgelh kawmin khitui luangin thungen ngekngek hi. Khitui naptui tawh kidim nianua kawmsa in thaneemna lianpi tawh akhut lukham in ihmu kha ta hi...

Galkap te’ omzia en in avak-kawikawi, Napoleon hong tung hi. Tua galkap-pa’ omna galvilbuuk akhenkhit deuh ciang a sap leh kua mahin dawngkik ngiatlo mawk hi. Lung himawh in lamdangsa ahih manin tua-a nutsatsa galvil’ buuk sungah honglut kik hi. Galkap-pa na ihmu khinkhian in, a kiangah, athuak haksatna tungtawn aa-a gelh dotna kam-mal te, laidal khat tungah akigelh

ziazua, Napoleon in mukha hi. Tua laidal-la in asim didek khit-teh,
laidal tawlam ah Napoleon in:-

“Lungkham kei-in KEN’ kong huhzo ding hi...”

Ci-in agelh khit-teh,

Napoleon

Ci-in a minthuh lai hi.

David Roper leh alawmte’ gelh
‘Seeking A Better Life’ (Pg. 76)

*Mahatma Gandhi: “Hun thupi sak in, hun
mawkbei ding apha ngiatlo khat ahi hi. Nikhat-tai
(2) peuhmah lamsiau hi. A tawmpen nai(1 le 1/2)
peuhmah, asiam ngan den hi. Laikhak a ngah
khempeuh hoihtak thuk-kik ciatciat hi. A nasep-pih
te tawh nasep zia ding khungkhol in, Hun-awl mawk
omsak ngeilo hi. Leengla-ahawh khempeuh deidan-
neilo in hoihtak hopih aa, ahun pia kimzo leuleu hi.*

*A diakdiak in, 1946 kum, Britist tetawh vaithupi
khat a vaihawm laitak un Gujarat ah ateeng,
Satyagraha Ashram gampan khebaai nupi khat
huhna ngen in pai dihdih hi. Gandhi-in Minutes
(15) bangh hunla in, nupi nu thapia hithiat thei
leuleu hi...*

Louis Fischer

Hun Zatsiam Huai

“Mailam thute muang kha ke’n.

A hizong, lungnuam tak in om theih sawm in.

A beisa thute beitaipi sak inla, tuhun, tu laitak hun zatsiam in.

*Na upna leh na lametna Pasian hisak
in.” ~ H.W Longfellow*

University kakah lai, ka ki thuahpih mahmah ka lawmit khat ahi, Sandrawin in:- “lawm Khai aw, nangpen ngaihsutna tawh nahun tam beisak lua teh! Pasal ihcih pen semngam ding, ih khel phial leh zongh thuakngam ding. Nang bel tuacilo in lunghianghiang mawk!!” Hongcih theihzel thu kaphawk kik zelzel hi..

Tua thu hang’mah in mi khempeuh namnih in kamu theizel hi. Pawlkhat te pen atuah peuhpeuh uh lungkim tak insem in, ahun uh mawk beisak ngeilo uh-hi. Pawlkhat te leuleu, kei dan hi-in, ngaihsut ding leh ngaihsut loh ding khenlo in ngaihsun hithiat nuam masa thei aa, midangte’ nasep te tehkak-kak thei dihdih uh-hi. Tuabang dan mite in hih LAI a sim dinguh deihsak mahmah ingh.

Singapore St. Margret Middle School ah sangsia pi asem, Sir Calorine, kum (57) aphaak laitak, natna nei hetlo pi-in sivat hi. Lamdang kisa in Singapore gambek hilo, leitung bup-pi phial ah kizelh hi. A suahni pawl bawl dingin a kiging khin hi aa, Spain gamah cimvaak dingin a kithawi khinsa-ahi hi. Cihna ding omnawnlo! A ki ginsa thu khempeuh sihsan khinta! A mawkna suak

mai.

Muhsiam ding

Suzanne Linn in ‘The Power of Now’ cih laibu a gelhna sungah, “Mihing te in ngaihsut siam nuntaakna neihtheih ding kisam hi. Ihsep na khatpeuh ah sum leh paai bek lunggulhna hangin ih-hun hoih teng zangtum manglo ding hihang. Tu laitak aa na neih na hunhoih pen sungah mihoih pen leh mi gualzo pen na suah na dingin na hanciam ding kisam mahmah-hi.” Ci-in gelh-hi. Man mahmah hi. Ih phat-tuam na ding a omlo nakhat peuh ih sep khak ding lauluatna leh, ih noptuam ding thubek thupi ngaihsut na in khelhna lian mahmah khat hi gige hi. Mailam ah bangthu hongpiang ding cih theilo ih-hih manin, tu laitak aa ih-hun neih muhsiam in, zatsiam ding kisam hi. Ei’ angsung bek enlo in ih kiim ih paam adding phattuamna-a om thei ding thute zong mu in sep ding ahi hi. ‘Get Up And Do It’ cih laibu sungah Beechy Col Clough in, “tu laitak hun mangngilh liang in, mailam thu ding bek buaipih na pen a lauhuai pen nuntaakna ahi hi.” Na ci hi.

Kum (2) sung bangh ka ki ngaihipih, ka it mahmah ka lawmngaih khat in, kikhen-na lai hongpia vat mawk hi. Kikhen-na lai hongpia amah bek mah om ngei ahih manin, ka mangngilh thei kei hi. A lawmte’n hong-gen na uah: - “Ko nih a ding ahih leh midang tawh ki muanmawhna, cihtaklohna leh lawmkingai te’ omzia leh lawm ki ngaihna thu te khempeuh athupi masa hi nawnlo hi... Ka lung-gulhna in ahih leh pumkhat suah ding thu hi napi, ahun hongso-toto hi. Nidang teh thukhat peuh om henla hileh, tu a dan mah in hun sot-toto thei ding, cih ka ngaihsut-teh ka lungkia hi...” Ci-in hong-gen mawk uh-hi. Hunsot tohtoh pen mikhempeuh in hoih kisalo napi, vaikhath peuhpeuh ah khensat zolo in lunghiangin ki om dipdeep thei hi. Bangbang ahi zongin tu laitak aa ihneih hun sang’ in hun hoihzaw om nawnlo cih phawk in, tupna hoih tawh sep ding leh sep huai thute muthei-in nusia kha lo aa, sep-pah theih ding kisam mahmah-hi. Tua mah bangin sep huailo thute zongh hubei liangin buaipih in ih lungsim kinawngkaisak huailo hi.

Septheih Dingte Seppah Huai

Na khempeuh mihingte' hanciam zawh thu hilo... Kaam (Luck) in na khempeuh uk, cih upna-anei atam mahmah hangin, ei te (a diakdiak in X'tian te) in ahih leh tua bangin ih um kei hi. Hanciam in ihsem ding a, tua tungtawn in Pasian in honghuh ding cih a-umte ih hihi. Lai Siangtho sung mahmah ah na khua-ul luanna tawh kituak ciangbek na ngah ding hi. Ci-in ki gelh hi.

Bangbang Ahi zongin, nakhat limlim septheih nei ciat hi hang!! Tua ih septheih thu enpha in sep-pah sawm dihni!!

Lieberman in 'Instant Analysis' cih laibu agelhna sungah: "Sep ding aa ih tuakhkhak thu khatpeuh tungah muan-na nei-in a hoihipen ding lunggulhna tawh sep phot limlim ding kisam hi. Tu ni aa ihsep theih thukhat peuh zingteh sep dingin mawt sot-tohtoh huailo hi. Bangbang ih sem zongin khelhna omlo cihbang om ngeilo hi. Khelh ding dahna hangtawh na khatpeuh semlo in tawlna kha mawkmawt kei-ni. Khelh ding na launa sang'in a lauhuai zawtham thukhat om hi. Tua thu pen tu laitak aa na sep theih ding thukhat na sep pah loh khak na hangin sep theih hun-na ngah nawnloh ding lauhuai zaw tham hi." Ci-in na gelh hi.

Ih Bawltawm Launa

Nasep honkhat seploh in abeimang pawlkhat pen sepkhelh ding leh suplawh ding launa hang hi gige hi. Thukhat peuh ah, semding ka hiam, semlo ding ka hiam? Ci-in-na lungsim abuai den leh tua na buaina pen nangma bawltawm lungsim puak hi aa, na khantoh nading khakcip thei hi. Tua bang launa tawh kisai Benjamin Franklin in:-

- ☐ Ihsep ding a sephuai thu pen, sep thadah huai nasep/lunggim huai nasep ahih manin...
- ☐ Ei leh ei nangawn in ih telcian zawhloh banghiam khat lau' giuguau na...

- ☐ ‘Ki khelna’ lau ngaihsut khak na...
- ☐ A khial utloh na/paubaan neihloh ding utluat na...
- ☐ Lelh ding/sep siamloh ding lau na...
- ☐ Ihsep ding pen alom in omlo, mun tuamtuam ah om in, sep kawikawi ding thadah na...
- ☐ Tua bang thuteng hangin a lungsim sungah a sepnop leh sepding a kizam thu sempah lo in, ngaihsutna tawh ahun a zangh tumcip mikhat pen khangto nawnlo ding ahih manin, a nuaikiat diaidiai hita hi.

A Beisa Thute Manggilh Bawl’ Ding

A beisa hun a, ih sepkhelhna, ih siamlohna thu tuamtuam te ngaihsut kik-kik na hangin a sephuai nahoih khatpeuh sepzawh na dingin akisam, lungsim kimuan-na, hangsan-na te beitum-mang sak den hi. Lieberman in “hun beisa khempeuh tangthu hita hi. Ih theihnop leh ciapteh ding hibek aa, buaipih ding hi nawnlo hi. Tua tangthu te’ tungtawn in pilna ngah theih ding hanciam dingbek ahi hi...” Ci hi. A beisa hunte manggilh bawl’in, mailam hun-ah ahoih nuntaakna leh khantohna-a om theih na dingin hanciam ding ahi hi.

Ih hanciam nop takpi naakleh ih hanciam theiciat hi. Na hanciam theih nading akisam penpen vanzat na khutsung ah om gige hi. Tua vanzat pen kuamah in hongsut theilo in, zongh hongguksak theilo aa, zongh-hong ki leitawi’ theilo hi. Tua vanzat ahih

leh 'TU LAITAK' ahi hi.

Tu mahmah in na kipan pah thei hi. Na kipan pah ding hiam? Denteh bangh piang ding theilo hi teh! Na kipatpah nop leh:- 'A beisa thupiang te in thugen hi' cih upna beisak inla 'tu laitak a naneih ahi tulaitak hunlian pen, manpha in pam-maih mahmah hi' cih lungsim puak nei-in!

Phawkhuai Thute:

- Tu laitak aa ih nuntaakna pen a nunung pen ding bangin ngaihsut theih huai...
- Tu ni aa ih septheih ding khempeuh zingteh sem lel ning ci-in sot-tohtoh huailo...
- 'Zingni hongsuak ding' ihcih zelzel pen lametna hilel innithak (nidang khat) ahih lam phawk gige huai...
- Tua 'zingni' ih cihcih, nuamtak in zangh thei ding cih lungmuan-na neihngam huailo...
- A bei taktak khinsa khat peuh kila kik thei ngeilo, cih phawk gige huai...
- Ihneih a manpha penpen 'TUHUN' cih hunhoih mahmah, ihneih ngei leh ihmuh ngei nailoh hongtung ding 'ZINGSANG TEH' cih kam-mal tawh mawk khek huailo...

*Thu leh la ki theisak in na ot buabua hang' na
kam-mal te ka zak khat zongh om kei... Mihing te in
kamtawh gengen na sa'ngin hihtheih tawp tawh
sepkhiatna te muthei zaw in zathei zaw uh-hi. Tua-ahih
manin a ki muthei, a ki zathei sepkhiatna te vanglian in
khauh mahmah hi. Hoihna, dikna, itna kihel-lo
sepkhiatna pen sihna gu tawh kibangh-hi. Tua mah
bangin, thumaan-na, diktatna, hoihna leh itna te
bulphuh in sepkhiatna khat peuh ahih leh siangtho in
namtui mahmah aa, pilna bulpi khat zongh hipah hi.
Tua pilna in kilemna, daihna leh nuntakna te hih leitung
ah phutzo hi. Nang na thupit zah khat in, bangh
semkhia na hiam? Cih thupi mahmah hi.*

William Shakespeare

Ka Phutkhak Nuntaakna

*“Ih tuahkhak thupiang honkhat pen ih tup leh
ih geelkhoh hetloh thu vive hithei hi...” ~ Philip
Larkin*

- Thupi salo in ih mangmat ngei hetloh thu pawlkhat te ih tung hongtung litlit na pi, ihmu theilo liang aa ih ngaihsut niloh thu pawlkhat-te lah ki galmuh kha ngiatlo thei...
- Ih ngaih mahmah mikhat in hong ngaizo taktak lo thei na pi, ih ngaih theih khol-loh khat peuh in lah hong sihngaih dihdih thei...
- Ih septheih hetloh thu pawlkhat seploh phamawh in piang thapaai thei na pi, ih siam mahmah pawlkhat lah zatna ding tam phalo thei...
- Ei tawh a kilawm, ih ngah dingin a

kituak thu pawlkhat ki ngah kha hetlo thei na pi, ei tawh a ki lawmlo leh a ki tuaklo thu pawlkhat-te lah ki phukha dihdih thei...

- Ih puaklah mahmah thu haksa pawlkhat te peuh phat-tuam na hongpia pen te hithei na pi, thupi sa in hoih ih sak mahmah thu pawlkhat-te lah ih supna leh ih siatna ding peuh hi kha dihdih thei...
- Hong it pen ding aa ih ngaihsut-te peuh in hunkhat teh hong nusia ziau thei na pi, hong it ding leh hong phawk ding aa ih ngaihsut khak hetloh pawl khat te peuh lah hunkhat teh hong it pen leh hong phawk pen te peuh hi dihdih thei...
- Siamna leh neih bangh mah neilo in bangh mah a ih muhloh te peuh a belhtaak pen suak thei na pi, siamna leh pilna nei-in ih muan mahmah khat peuh lah belhtaak leh muantaak in pianglo dihdih thei...
- Mipil mihau leh mi thupi pawlkhat dik hithiat in aneu alian tawh kithuah thei napi, bang mah neih leh theih a nei melkhol-lo pawlkhat te leuleu ki liansak in hikinkun nuam zaw dihdih thei...
- Ih sepna leh ih hihna khat peuh ah-hong zahpih pih den mite ei' sa'ng in a siamzaw hetlo te hithei na pi, hongpi bawl in hong

pahtawi thei mite ahieh leh ei' sa'ngin a zah
tampi aa, a kicing zaw te peuh hi dihdih
thei...

➤ Mikhat peuh a sepkhelhna leh a ki
cinlahna te ki muhsak in ki hawmthawh
thei den na pi, ei leh ei ki tel-lo in hihtheih
ih neih het loh lam ki mangngilh kha didek
thei...

➤ Mihau, mipil leh a picing mite ki eng in
ei zongh tua cih ding ki lung-gulh mahmah
na pi, bangh mah theilo, bangh mah neilo
in ih hih thilthial nangawn ki zangh siamlo
in, ki pua zolo kha dihdih thei...

➤ Bangbang hita leh:-

Ih lungsim leh ih pumpi
honguk khat om, ei leh ei-in
bangh mah ki hih zolo... Tua
hong uk pe'n nung ki zui
tawntung... Hong uk den pen
bangh a hitam? A hoih leh a
sia om tawntung, A sia maw, a
pha...?

*Ih sem ding aa ih sepna tungtawn-in ih sin toto
ding hi. Ih sin-na tungtawn-in ih thei ding aa, ih
theihna tawh kizui-in tuahkhak tampi-ih nei ding hi.
Ih tuahkhak thute' tungtawn in pilna ihngah ding aa,
ih pilna tawh ki-zui-in dikna ih nei thei ding hi. Ih
neih dikna hangin thu khualna ih nei thei ding aa,
tua ihneih thukhualna tungtawn-in, bang sep ding
kisam hiam? Cih ih mu thei ding hi.*

'Prike Avot'

Bishop pa' Han-ah Akigelh Laimal

*“Na khua-ul honkhat nang a dingin
luangsak masa in!
Nang mahmah hoih sawm
masa photphot in!
Pasian’ gam leh adikna na lungtang
sungah teng sak masa lopi-in hih leitung
ah
Pasian’ gam naphut zokei ding
hi.”~ Leo Tolstoy*

Westminster Abbey sungah Anglican Bishop khat ii hankhuk tungah anuai aa bangin lai kigelh.

Ka khangno lai, suakta in ka ngaihsutna in ciangtan neilo, leitung buppi puahphat ding ngaihsun ngam. Ka kum hongtam deuhdeuh in ka pilzaw deuh deuh teh leitung buppi khelzawh ding abaih hilo, ka gamsung teng bel khelzo sam ning...

Ahih-hang’ bangmah ki lamdang zolo...

A sawt-teh ka ngaihsutna hong kikhel, ka innkuan sungbeek kikhelsak zolengh hoih ding... Hizo tuan samlo... Sih ding lianbek mai-ngat in ka-om laitak ka lupna tungpan ka phawk thak thukhat;

“Aw... kei kikhel masa in, midangte’ et-teh theih dingin om lengh, ka innkuan un kikhel zo thei mah ding hive ung!! Ko innkuan kikhel le ungh ka gamsung uh gamtatna hoih in zelh leh a nunung na-ah leitung bup-pi nangawn lawhzo phial thei mah ding hiven!!

Leitungah a dah-huai penpen kammal bel ‘a semkhin hizen taheuh lengh-maw?’ Cih hi gige!!”

Ci-in Bishop-pa-a nuntaakna bei diaidiai ta...

‘Start With Yourself’
Anonymous (A gelh
kitheilo)

*Hih leitungah midangte' hazaatna leh
mawhsakna athuak-kha ngeilo kuamah omlo hi. A
om hithiat te nangawn kimawhsak hi. A kamtam
mahmah te leh akamtawm-mahmah te zongh
midangte in akibangin mawhsak in gensia veve uh-
hi. Hihi... Hih leitungah mawhsakna leh gensiatna a
thuak-kha ngeilo kuamah omlo hi. Nidangin a-
omngei-nailo, tun' zongh a-omlo, Nidangteh
(mailam ah) zongh a-omngei-lo ding thukhat bek
om, tuathu pen, genbaang ngiatlo in a hihna
khempeuh ah acing sitset ding mihing, ahih kei leh
kicinna cih limlim anei ngiatlo, ahih na khempeuh
ah gen abaang den ding mihing ahi hi.*

The Buddha

Hell Leh Vantung Thusim

“Mihing khat in kikhelna namthum neih ding kisam hi.

Tua te pen: lungsim, pumpi leh kha...”

~ Martin Luther

Lampi gei-ah Phungzi puteek-khat tu. A mit si khinkhian in akhut leh akhe te zep sitset. Pasion’ thu ngaihsun in atu khinkhian ahi hi.

Thakhat-thu in atutna hong kilawk gawp. Japan galkap hang khat na hi...

“Puteek pa Hell leh Vantung thu hong-gen dih ve?”

Phungzi pa-a pasian’ thu ngaihsutna tawh bangmah za selo. Galkap pa’ hopihna donkik selo. A thu ngaihsut-teng ama’n khit-teh amit hak in a khuadaak leh agei ah Japan galkap khat na-om gemgam.

Phungzi pa in:- “Van leh Hell thu na theikhin zo ding hi. Na meel-lah migit meel-lo, nakhut leh nakhe te ah vui dim lai...Na omzia limlim muhthadah-huai, na naamsau tawitawh lauhuai maiteh, na meel hoihlo ta sawnsawn... Na pianna na Nu in hongit teeitam-maw? Kei’ kiangah Hell leh Vantung thu dongh dingin nongpai ta dihdih...” A cih leh, galkap-pa hehlua ahihman-in anamsau dok-khia vat hi...

A namsau saangkhai'to in Phungzi pa' gawng bantan dingin hongkithawi veva mawk... Phungzi pa laulua mahmah... Lingkekeuh sa-in:- "Hih pen Hell aive!" ci-in awneem mahmah tawh Phungzi pa paukhia khiankhian...

Phungzi pa laulua mahmah in aling kekeuh a muhteh hehpih-huai salua-ahih manin, Galkap-pa in a naamsau apaai ah siat. A lungsim tawngah Phungzi pa hehpih ngeungau ahih manin, amit-tui bangh taak-kakauh liang... Tua lian leh Phungzi pa in:-

"Aw... hihpen Vantung-gam hileuleu ei!"

Father John W. Graff Jr'
gelh 'The Secrets of
Heaven and Hell' pan

Lungsim Puak

- A beisa thute ahi aa, hongtung lai ding thute ahi zongin, a vekpi, a vekpi-in; tu laitak aa ih lungsim sungah ih geel, ih
tup thute tawh tehkak hi le hang', tua thute gentham vetlo hi...

Walt Emerson

- Ih nuntaak hunsung khempeuh ih lungsim puak tawh kizuiin thaman a-at toto ih-hi hi. Tu laitak, a beisa hunte leh hongtung ding mailam hunte khempeuh sangin a thupizaw khat in, ih lungsim ngaihsutna ahi hi. Pilna, haina, zawhna, lelhna, ahun amun leh tuahkhak thute' khempeuh sa'ngin zongh thupi zaw hi. Mel hoihna leh mel siatna te' sa'ng zongh thupi zaw lai hi. Lungsim puak tawh kiphut zo in, zongh ki susia zo hi. Tua-ahih manin bangh lungsim puak nei na

hiam? A beisa thute ki puah theilo in, ei' tungah hong kibawl ding thute zongh deih teltheih hilo hi... Ahi zongin ih lungsim puak puah in ih zuun thei hi. Nuntaakna pen 10% ahih leh a piangtawm thei thu hi aa, 90% ahih leh ih-hihna tungtawn in ih ngahkik agah te ahi hi. Na lungsim puak puah in azon ding nangmah bek na-om hi... Kua mah in hong
puahsak theilo hi...

Charles Swindoll

- Lungsim hoih a neilo te in a muh khempeuh uh mawhsak in, huihna ngawn mawhsak thei uh-hi. Tua thamloh amau leh amau mahmah zongh ki mudah liang thei hi. Tua bangh mite a dingin hih leitung ahih leh dahna vive suak hi. A hoih lungsim puak anei te a dingin ahih leh hih leitung lungnopna, daihna mun ahi hi. Nang a dingin hih leitung a bangci dan a hitam-maw? Tua hi aa, bangh dinmun ah om in, bangh zah in thupi na hiam cih sa'ng in, hoihna leh giitna bangh ciang nei na hiam cih thupi zaw tham hi...

Martin Luther King Jr.

- Lel dingin na ki up leh na lel takpi ding hi. Ki demna-ah ki hel zolo dingin na ki up leh na kihel zokei takpi ding hi. Zo nuam na pi zozo lo dingin na ki up leh na zolah takpi ding hi. A hi zongin zo ding, hithei ding, ci-in na ki up ngiat leh na hizo lel ding hi. Na lungsim sungah bang upna na nei?

Arnold Palmer

- Aktui, manta leh ci... Hih namthum te tuiso sungah huan lecin, a pianzia uh kidang ciat ding uh-hi. A kilok kekeuh thei aktui pen tuisa sungah na huan khit-teh khauh in kilok thei nawnlo ding hi. Tuisa sungah a kihuan ma in akhauh mahmah manta-ahih leh tuisa sungah a kihuan khit-teh nip neknek lel ding hi. Tua mah angin, ci ahih leh tuisa sungah a kihuan teh a tunna lam ki theilo in tuisuak lel ding hi... Tuahihna te pen amau' khatciat ii a pianzia uh ahi hi. Nang ee na pianzia a bangci nam? Tua ih pianzia khempeuh, ih lungsim in a uk ahi hi. Na lungsim sung a angin apiang nahi hi.

Voleta Parra

➤ Mikhat in alian penpen aseph khel theih thukhat om, tua pen, nakhat peuhpeuh sephkelh khak ding lauluatna-ahi hi. Zawhlah na pen a dah-huai mahmah khat hi na pi, lelhcipna-ahih leh dah-huai zaw tham hi. Tua lelhcipna pen lungsim sung mah pan hong piangkha ahi hi. Khelh ding na lau leh na semngam kei ding aa, na sem phial zongin na khial takpi lel ding hi. Tua mah bangin zawh ding upna lungsim tawh nasep leh na zo lel ding hi. Na ki patcil in na tupna na tungzo kei phial zongin phamawh lo hi... Bang hang hiam cih leh a zo nailo na hi aa, alel na hi kei hi. Lelhna taktak ahih leh tawlngakna ahi hi.

Elbert

Hubbard

➤ Na lungsim puak thupi hi. Zo ding cih lungsim nei na hiam? Lel ding cih launa nei na hiam? Hoihna deihsawm na hiam? Siatna deihsawm zaw na hiam? A gualzo mi te in ahih leh ahoih leh ahi ding lungsim puak anei mi te a hi uh-hi. Tuaahi ding lungsim puak anei te in, khelhna leh zawhlahna te,

pilna ngahna in neithei uh aa, a thak in hanciam nopna lungsim nei uh-hi. A lel mi-ih cih te in ahieh leh, ‘aw tua ka sep loh!’ ‘Ka tua cih loh!’ Cih tawh ahun uh bei-in, a tawlinga suak mite ahi uh-hi...

Dennis Waitley

- Launa lungsim pen hangsan'-na lungsim tawh do le hang, hangsan'-na in zo lian in, munla pah ahieh manin, launa in mun ngahzo nawnlo hi. A hangsan khat a dingin, a lauhuai pen mun leh lametbei huai-in a dahhuai pen mun nangawn lungmuan-na leh lametna tawh kidim in, hanciam na tawh nungta thei uh aa, matut gualzawhna leh daihna in luahpah hi...

Martin Luther King Jr

Dollar Awnkhat-tawh Khek Ding Maw?

*“Nuntaakna ah hanciamna
kisam kei zenzen leh tua
bangh nuntaakna in
khiatna-a neilo
nuntaakna ahi hi.*

*Lungmuanna pen vangliatna hang
bekin a ki ngahthei ki sakha
thei hi.*

*Nuntaakna taktak ah tua bangh
omlo hi.” ~ Hellen Keller*

Harold Abbott tawh ka ki theih uh sawtsim khin in, amah ni dangin Missouri State, Webb City ah ateeng ngei ahi hi. Nidangin ka thugen-na te ah zongh Manager hong sepsak ngei hi. Khatvei Kansas khuapi sungah ka ki mu dihdih uh hi. Lokuan’ ding kahih manin, ka kuan nading mun Missouri State, Belton ah Mawtaw tawh hongkha hi. A omdan khat alung noptuak mahmah hi. Suakta

mahmah ahih manin, bang hangin hizah in na lungsim nuam in suakta na hiam? Ci-in lampi pan ka dongh hi. Hong dawnkikna thu zaaknop mahmah hi. Mangngilh theih ding hilo hi.

“Khatvei lai-in ahih leh lung-gimna tawh a kidim ngei mikhat hi-ingh. Ahih hang’ 1934 kum, tuk hun kipat cil-lam, nikhat, ka nuntaakna hong kikhel vat aive! Tua nipen Webb City aa Dougherty lampi nitumna lamah lamsiau in ka pai laitak-khat hi. Minutes 10 sungkhawng aa thupiang khat hangin a kikhel hiziau veng aw! Tua Minutes 10 sunga ka ngah pilna-ahih leh maw... a manphat dan!!! A beisa ka nuntaakna sungah tua bangh pilna- a ngah kha ngei hetlo kaive!!!

“Ke’n maw Webb City ah van tuamtaum azuak ngei kaive. Kum nih khawng ka sepkhit-teh ka van teng lah bei, ka sumteng lah bei mawk! Ka sumneih teng abei hileh phadawmlai ee maw, leibat thuah zihziah lai kaihciang aa baihlo. Tua ka leibat te kum 7 peuhmah ka buaipih kul ding hi mawk, tawmlo aih ciang aa!!! Ka van zuakna Sai bel nung nipi Sanini-in khakcip ta. Tua aih ciang aa, sumbawl nasep leh leisung sumpiang nasep asem te’ ki pawlna (Commerace and Mining) Bank khat ah sum leitawi ding aci... sum ka leitawi theih leh Kansas khuapi pai ding! Nasep zon kul ding! Cih buaina tengtawh ka lamseuh na ngawn baihlo! Ka lungsim tungzo mello in ka lungkia mahmah. Hanciam nopna lungsim cih limlim neizo nawn vetlo! Ka lametna khempeuh beikhin ee... maw!”

“Tua bangin ka lung-gim mahmah laitak, ka mai ah khe neilo khat hong ki khuksuk tawh ka ki talsik vat hi. Pei a kithuah singtutna tungah tu in, apei langkhat a sia pi hita sawnsawn. A khut ah sing tumtawng tawi-in ataw tawh ataal na hi zen! Lampi a kantan laitak in a ki tuakvat ka hi uh hi. Platform tungah a kahtoh theih nading amah leh amah ki domto cincin zen hi.”

“Aleng tawh hongkawi kik vat ahih manin ka ki en gega kha uh hi. Nuihmai seisai sa in: ‘zingpha maw! (Good morning?), tuni khuahun nuam ei mawte!’ ci-in hong hopih lai zen hi. Tua mipa a ki neih hi hetlo in, a lungsim takpi tawh, maitai tak in hong hopih hizen!”

Tua mipa tawh ka kimuh petpet ciang, ahau mahmah kahih lam ki phawkik thei pan zenlai kaive! Khe nih nei-in lam nuamtak paithei-ing aa, tua nangawn kei leh kei genthei kisa in ka lungkia lai! Zumhuai mahsi! Khe neilo pa nangawn a lungnuam thei-in, lungkiat tuak hetlo zen aa! Bangh hangin khe langnih neipa

lungnuam theilo in lungkia kia zenlai ding! Ci-in kei leh kei ka lungsim sungah kiho in tha kala kik thei hi.

‘Den in ahih lebel Bank ah sum \$ 100 leitawi ding ka ngaihsut hi na pi, tu’n bel \$ 200 leitawi dingin ka khensat ngam hi. Sumtawi thei hileng nasep zon nading ciding, ci-in ka ngaihsut; tu’n ahih leh nasep nading ka cihsawm ta hi. Tua bangh mahin ka deihzah sum leitawi ka ngah pah hi.

Tua hun pan kipan, ka cisilna khansung aa, ki etna Maan (Liimlangh) tungah laikhat kasuang hi. Mukmul kakiat simin tua ‘lai’ ka sim den hi.

“Khedap neilo in kadah mahmah laitak, khe na ngawn aneilo mikhat lampi ah mukha ingh”

Khatvei Eddle Rickenbacker tawh ka ki mu hi. Amah pen Pacific tuipi tungah tuahsiatna a thuakngei khat ahi hi. A lawmte pawlkhat tawh ni 21 sung tawntung, Gunkuang neu khat bekbek beelin tuipi tungah a thamcip ngei uh ahi hi. Tuabangh haksatna na thuak laitak bangh thu naphawk kha aa? Ka vacih leh;

“Aw... tuahun laitak maw, tui ih duh leh dawnding tui siangtho nei in, ih gil akial leh ih neek ding an khamkhop ih neih laiteng banghmah lungkham a kul hetlo ahih lam ka phawk theisan hi.”

Khatvei ‘Time’ Magazine sungah Guadalcanal a kici galkap khat, Bomb phukha in, sisan 7 vei a kithun nathu ki gelh ngei hi. Galkap-pa gim-mahmah in kampau thei vetlo ahih manin, laitawh gelhin Siavuanpa kiangah hi bangin dongh hi.

“Ka damzo lai tam-maw?” Siavuanpa in: “aw... damzo mah ni ciai...?”

Galkap pa in khatvei dongh leuleu hi. “Kam Ka pau theikik tam?” Siavuanpa in: “...pauthei ee... pelhlo pautheikik ding...” Tuaciang cina pa in laikhat gelh leuleu in:

“Aw... tua ahih leh bangh lungkhamna ding om peuhmah aihia?” Athak in nangh zongh, nang leh nang na ki dongh thei hi.

“Bangh hangin kei lungkham peuh mah ding” ci-in ngaihsun dih in. Na lungkham na thute ngaihsun taktak lecin thupi hetlo lel ding hi. Mihingte ih nuntaakna sungah ih tuahkhak 90% pen thuhoih vive hiin, 10% bekbek thusia leh thu nawngkai ahi hi. Lungnop ding na utleh thuhoih 90% te ngaihsun inla, lung-gim ding na ut lebel thusia 10% te ngaihsun in.

‘Ngaihsun inla, lungdam in’cih kammal, England ah a om Cromwellian Biakinn pi te ah ki suang kawikawi hi. Hih kammal ahih leh a pualam bekah suanglo in, ih lungtang sungah zongh ih nuntaak pih ding kisam mahmah hi. Pasian’ hongpiak thupha tampi ngah in, lungdam ih koh ding tampi a omlam, mangngilh hetlo aa, ih lungdam theih tawntung ding thupi mahmah hi.

‘Gulliver’ khualzitna’ cih tangthu agelhpa, Jonathan Swif, mikang lai gelhsiam khempeuh lak ah thusia bekbek a ngaihsun thei tawntung khat in a ki ciamteh ahi hi. Asilh a teente nangawn mudah in a suahni pawl abawl zel ding nangawn a heh asuak mahmah thei mikhat hizen hi. Tuabangh mikhat hi na pi, a nuntaakna sungah lungdam koh ding mangngilh ngei het lo leuleu hi. Jonathan in: “Leitung ah Siavuan hoih penpen thum om aa, tuate aih leh, Dr. An le Tui, Dr. Lungneemna leh Dr. Lungnopna te ahi uh-hi.” Cithei veve hi.

Eite in Dr. Lungnopna’ kiangpan a mawkna in zatui hoih nono te nisim in ih ngah thei hi. Tangthu sung aa Alibaba’ hauhna sang’ in atamzaw tham, ihneih ihlamh te lungngaih kik theih ding thupi mahmah hi. Na mitte gel Dollar awntul tawh hong ki leinum zenzen leh naphal ding hiam? Na khe tegeel ee, bangzah tawh zuaksawm nahia? Nakhut tenih ee leh, banghzah aa pia ding? Na tate ee, na zuaknuam na? Na innkuan un ee, bangzah aa ki leisak ding naivua?

Na neih khempeuh banghzah manding hiam cihi na ngaihsun kha ngei hiam? Leitungbup ah mihau minthang Rockefellers, Fords leh Morgans te’ neihsa lamsa khempeuh sangin, na neih na lamh khempeuh tamman zawtham ding ahih lam na phawk thei hiam?

Na neih khempeuh bang zah man ding hiam? Gawmpa kik dihi in! Bangzah in hau nahiam cihi naphawk kik thei ngeel ding hi. Tua na hauhna te bangzah in manpha hiam cihi na theician khinta hiam? German te thungaihsutsiam pilna nei Schopenhauer in, “eite

in ahih leh ihneih thupha te ngaihsun kha hetlo napi hangin, ih neihloh tengkek ngaihsun kha in buai niloh sese hihang..." acih tawh ih ki lamdang kei thei hi. Hibangh ngaihsutna ih neih khak leh tua ngaihsutna pen, leitungah apiang gal ki dona khempeuh leh natna lungno khempeuh sangin lauhuai zawtham hi.

Tuabangh lungsim puak neih khakna hangin John Palmer a ki ci tangval khat a kumtam nailo pi-in teeksuah gawp in, a neih a lamh khempeuh beihlawh khin ngei hi.

Mr. Palmer pen Newjersey State Peterson ah ateeng, tangvaal khat ahi hi. Galkap tum a ciah kik khit a sawtlo in, a ma a dingin sumzon nasep khat kipan hi. Sun leh zan tawlna lo in nasem hi. A ki patcil in a daupai-in nuamsa mahmah ngei na pi, a nungciang tuahsia gawp hi. A deih leh a zuak ding vante kibawl nawno! A ngah theih na ding omnawnlo! Lung gim mahmah ahih manin puteek khat bangh in teeksuah gawp mawh hi. A tuacih lam amah leh amah kithei kha hetlo laisawnsawn ahih manin, dah huai mahmah hi. A lung-gim ciang a tawlnak zelna, a thaneem ciang thathak a ngah kik zel na- a hoih mahmah a inn na ngawn, a zuakloh phamawh ding dinmun tungliang ta hi. A mah leh a mah ki hehneem zolo hi. Lametbei kisa in a lungkiat mahmah laitak a nasep-pih ngei mikhat hong hawh hi. Tua mipa pen a khut leh a khe te zangh theilo ahih manin galkap sungpan a ciah kik mikhat ahi hi. Tua mipa in, " Johnny, nang leh nang maizum ki guan mahmah hiteh. Leitung ah nangbek haksatna athuak ki sakha mawh nahi hiam? Na vanzuak na-na 'sai' themvei khakcip loh phamawh aihte khakcip ding cilel o! Tua na 'sai' na khak hang' bangci ding ahia? A senpye hunkhat peuh ciang a hongkik theiziau ding na hilel si aa!!! Tu mahmah in zongh Pasion' thupha tampi asang gige nahih lam ki theilo in, nang leh nang ki lung-gim sak in na lungkham kham niloh lai... kei maw... nang hi zenzen lengh nak ut hivengh. Hiah hong en lecin... ka khut langkhat om nawnkei ei... ka maitang zongh a langkhat bek omlai ahih lam ong mu ciai... hibang zah dongin ka gentheih hang' kei maw nang bangin lung hamham selo. Tu'n nang maw, ki lung-gimsak in, sintom lungso in na omden laileh na nasep teng na suplawh ding baanah na cidamna ongsukha ding, na inn leh na lo teng zong beisiang mai takpi ding, tua baanah, na meeltheih na Uu na Nau nangawn in ong nusia diaidiai ding uh... na thei na!" ci-in thuhilh didek hi.

Johnny in: " tua hong thuhilhna ka zaak ciang, ka bil hong puak velval hi. A ma hongcih bangh lianin, ahau mahmah lai kahih

lam ka phawkthei kik hi. Kei leh kei-in ka lungsim ngaihsutna mahmah ka khelzawh ngiat ding ka hanciam pah hi. Zongh ka khelzo takpi hi. Kaampha laitak ingh.” Ci-in gen hi.

Ka lawm Lucile Blake zongh, tu aa dan mah in a cimawh gawp dektak ngei ahi hi. A sawtna ciang a neihloh thute buaipih in nei nawnlo in, ahihna bangbang tawh a lungkim kik thei mikhat ahi hi. Hunkhat lai-in Lucile tawh Columbia University, ah tangthu tom gelhdan kasin khawm kha ngei uh hi. Tua lai ah a kah ma, Arizona State, ah a omlai-in haksatna nakpi tak in tuak-kha ngei hi. A tuahkhak haksatna bel:

“ Kei maw naakpi tak in nasep a hahkat ngei khat kaive... Arizona University ah sangkah, khuasung ah thugen zia tawh kisai tintan khat pia, ka khua uah Music ettel dan tintan khat mah phuan. Kimawlna tuamtuam, Party tuamtuam leh lamna dian-na cih khempeuh khatzongh ka seploh omlo. Kidemna khempeuh ah kihel ngekngek. Nikhat ka lupna pan thozo nawnlo. ‘Lungtang na hi’ hong kici. Siavuanpa in kumkhat sung tawntung bangmah semlo in lupna tungah lup hithiat kul ding hongci. Kumkhat bangh tawlnga khin lecin damkik lel niteh hongci. Kumkhat sung vingveng maw ka lup ding ka cih leh, tua ci hithiat kei-in, pelhlo damkik ding zongh kici theilo lai hi. Hongci sawnsawn. Ka piandan hoihlo in zongh si miaumiau thei cih dan... lauhuai mahmah sam...banghang aa hibang natna in kei hongtuam sese aitam? Bangh khelhna ka neih hang aitam? Cih teng ngaihsun in, khatvei leh kap zel... khatvei leh kitom vatvat zel in lupna tungah Siavuanpa’ hongawl bangin ka tawlngak loh a phamawh hita hi.”

Ka innveng uah lim suaisiam Mr. Rodoff in: “ kum khat sung lupna tungah tawlngak ding bangh haksa ahia? Kumkhat ihcih a sawt hilo pi. Na tawlngak sungin thuhoih thupha na ngaihsunsun thei lel vele. Tua hi keileh thu ngaihsut hunding nangawn ih ngahloh pi. A beisa na hun khempeuh sa’ng, themvei lupna tungah na tawlngak hunsung peuh a manpha pen suakthei ding aimaw? Lungsim picin na ding nangawn asin kawm hithiat theilai na hita vele.”

Hidan in tha hongpiak ciang, kei leh kei-in thala theikik pa nin, ka lungnuam thei pan hi. Khatvei Radio sungpan thukan te in, “nang pen na khuaksung ah a omzah ciangbek genthei-in na pholaak thei hi.” Ci-in gen hi. Nidangin hibangh kammal ka zakzak ngeikhat hi napi, ka lungsim honglawng kha ngei hetlo hi. Tutung ahih leh a deihna thuksa in thupi ka sa mahmah a, ka lungsim hong

zen mahmah hi.

“Ka lung nopna ding leh ka cidam na ding bek ngaihsun ta ning” ci-in ka khensat hi. Zingsang ka thawh phet in lungnopna ding bek ka ngaihsun hi. Ka natna lah damta, ka tanu lah a melhoih kikek lai... ka bil-lah hoih in ka mitlah hoih aa, laisim thei, Radio ngaithei, an lim tui lim mah nezo in, lawm le gual tawh nuam kasak theih na thute ka ngaihsun zelzel hi. Kei ka omzia limlim lungnop tuak ta kahih manin, kei hongmute lungnuam zo heel uh hi. Ka kiangah hong hawhnuam tamlua mahmah ahih manin Siavuan te in nai bangzah pan nai bangh zah sung, mi bangzah tawh kimu thei ding cih nangawn time table hong bawlsak liang hi.

Tu’n ahih lebel hunsawtpi a paikhin hita! Kumkhat sung cina in ka lupkhit ciang, nuntaakna-anuam leh a cingtaak ahih lam theiin, lungnuam tak leh hangsan tak in a nungta theita kahi hi. Arizona ah ka om hunsung khempeuh ka ngaihsut kik ciang, lupna tungah cina aa ka om hunsung peuh a manpha pen na hi zaw... banghang hiam cih leh tua thu hangin ka ngah thupha te ka muthei aa, lungnuam takin hong nungta sak thei hi. Hi bangin ka nuntaak theihna pen kaneih khempeuh sungah amanpha pen ahih lam ka telthei ta hi. Ahi zongin, adah huai mahmah thu ah, ka sih dektak khit petpet ciang nuntaakna taktak a thupitna thei pan liangsam kahih manin zumhuai mahmah sam ingh.

Lucile Blake in aphawk-kha tam-maw? Amah zongh nidang aa Dr. Samuel Johson dan mah in haksatna atuak kha ahih lam... Dr. Johnson in: “na khempeuh a hoih lam aa muh theihna pen, kumkhat sungin sum a tul a then aa ngahna sangin manpha zaw tham hi.” Ci ngei hi. Hibangh kam apau pa ahih leh nidanglai pekpan na khempeuh ahoihlam in a muden thei mi hi peuhmah lo hi. Kum sawmnih sungbangh gentheihna leh haksatna a tuakhkhak khitciang apiang khempeuh ‘hoih’ a cithei pan ahi hi. Hi mipa-a nungciang minthang in mi gualzo khatin ki ciamteh zen hi.

Logan Pearsall Smith in: “ih nuntaakna sungah tupna nih neih pelmawh kul hi. A masa pen in bel ih lung-gulh ngahzawh na ding thu hi aa, a nihna thu bel tua ih ngah thu hangin lungdam theih ding thu ahi hi...” Tua hi aa, apil mahmah mite bekma ahihna khempeuh uah lungdam denthei uh hi.

Nasep thadah in kuang le keu na ngawn nasawp thadah hun ciang’ thalawp theih nading thu na theinuam hiam? Borghild Dahl in ‘I Wanted to See’ cih thulu tawh agelh laibu simlecin na tha lawpkik pah ding hi.

Tua laibu agelh nu ahih leh kum (50) val bangh amit ataw ngei mikhat ahi hi. A mit langkhat tawcip in, a langkhat leuleu meima pawn gol mahmah khatin liahcip hi. A vang neucik khat om teei ahih manin, tua-a vangpan laimal gol mahmah te themthem muthei hi. Thembek muthei ahih manin laibu khat peuh asim ciang, amit leh laibu ki mat liangin a etloh in mutheilo hi.

Hibang ahih hangin lungkia peuhmah lo hi. Mite' huh ding leh neumuh ding ut deksuailo hi. A lawmte mah tawh kimawl nuam hi. Amit in hoihtak amuh theihloh hangin hanciam in kimawl teitei zel hi. Seng kineih kimawl-na-a kimawl uh ciangin mutheilo aih manin, lam ki gitte leinam zeenin en masa zeel hi. A lawmte ki mawl-na pan aciah khit uh ciang' amah kia pai khiankhian in, lam kigit khempeuh hoihtak en in lotngah hi. A lawmte' dinna munteng zongh hoihtak ciamteh hi. Tua bangh zah dongin hanciam ahih manin a lawmte tawh a kimawl kik uh ciang, a siampen leh a gualzo pen hiden hi.

Lai asim ciang, amit leh laibu kimat liangin a simloh in a mutheilo nu in Minnesota University pan Bachelor of Art ngah in, Columbia University pan Master of Arts ngah zolai zen hi.

Buaih a ngah khितте Minnesota State sung, Twin Valley a kici khuanеu khat ah sangsia seem hi. Tua khитте, Dakota khanglam, Sioux Falls ah a om Augustana College ah lai leh thu kizaakna (Journalism & literature) tawh kisai Professor sem hi. Tua sangpi ah kum (13) sung sitset laihih hi. Numeite' kipawl-na tuamtuam ah thugen in kisam kawikawi aa, laibu tuamtuam zongh gelhin, mi minthangte' thu Radio pan taangko zelzel hi. A mah in: "ka mit a langkhat zongh tawcip in khua kamuh theih ngiat loh ding ka lau mahmah sam hi. A hih hangin ka nuntaakna hangin lung-gim hetlo in lungnuam takin ka nungta thei veve hi."

1943 kum, apian kum (52) aphak laitak thu lamdang mahmah khat piang hi. Mayo Clinic a kici, zato minthang mahmah khat hong kiphuan in, tualai ah kilak thei hi. Amit operation ki bawlin tua khитте azah (40) val bangh a muhna hoihzaw hi. Tuahun khitciang ahih leh hoih mahmah in a lungnop huai mahmah, hing silsial in adum kikeuh leitung' hoihna te themcik khat mu milmial theita hi. Anbuuk ah kuang le keu sawpin a om nangawn, ama-a dingin anuam mahmah khat suak zen hi. Kuangsawpna ding tui sungah satpiang helsuk in, khuttawh a tawhgawp khитте satpiang tui te puak kiukeu in leeng kiaukiau uh hi. Tua a leeng kiaukiau te amuh ciangin lungnop huai sa mahmah

hi. Satpiang tui puak kiukeu te' sungah a kilangh rainbow tuamtuam te amuh petpet ciang, omkhong theilo in nuinui maita hi.

Kuangsapna tautung pan khuadaak leh phialphiah te leh kawlgit neu te leng zialzial in, daitui taak kekeuh te tawh etlawm sa mahmah hi. Satpiang tui puak kiukeu te tawlet vangah leng deudeu in, vasa neu te' kawmah leng diaidiai hi. Hi bangin leitung' hoihna te amuh theih ciang:-

“Aw Topa... ka lungsim tawngpan nang kong pahtawi hi. Vantung ah a om ka Pa-aw nang tungah lungdam ingh. Ka lungdam hi, Pasian aw...” ci-in a laibu gelh hialbawl hi.

Kuang le keu nasawp ciang, satpiang phuan te mu thei-in, huih lak ah aleeng ciauciau vasa te na muh theihna, nangma bawltheih sakha nahi hiam? Pasian' hongpiak hehpihna hang bek ahi hi. Tua thupha tungah nalung a dam theita hiam?

Cidam takin na ih septheih a lungdam huai mahmah ahih lam phawk theilo in, nasep ding thadah a ih om duakduak pen, zumhuai mahmah hi. Etlawm in ahing silsial singkung lopa te ih mu thei a, tua te' nuai ah cidam tak in ih nuntaak theihna, ih hawh ih ciah theih na leh ih sep ih bawl theih na te ei le ei kisa kha in, ahi ding mah in ih ngaihsun hithiat lel kha thei hi. Pasian hoihna leh hong hehpihna lian bek ahih lam thei khalo in, a lungdam huai mahmah ahih lam zongh ih phawk-kha kei thei zel hi.

Nisim ih nuntaakna sungah a nopna leh a thupitna tello pi-in a nungta ta kha ih hih leh dahhuai mahmah ding hi. Nuntaakna sungah lungnuam in mi gualzo na suah nop leh:-

‘Na ngah thupha namcin te phawk in mucian thei inla, Na lung-gimna vangik te Pasian angung ah suah khia thei-in!’

Dale Carnegie' gelh

‘Would You Take Million Dollars for What You Have?’ pan

BEHLAPNA

Lungkia Ke'n

Na vaite kipelh in, tuahsiatna na
phutkhak ciang,

Na lampi haksa in, na khete a gimluat
ciang,

Na thupha te bei diaidiai-in, leiba thangba
in na om ciang,

Na maitai nuam napi, maitai zo nawnlo
in,

Na nuntaakna supna tawh na kidim hun
ciang,

Lungkia in na tawlnga kha diai, tawlnga
kha peuhmah kei-in!

Haksatna leh tuahsiatna te'n, hong
pingpei gawp ciang,

Nangkia hilo, vannuai mite'n na thuakkha
kimciat,

Thuakna zo in a nunnuam te, na muhkhak
hun ciang,
Lungkia kha ke'n, 'nang' nadau apai
theihloh ha'ng,
Lamkhat peuhpeuh tawh gualzawhna na
ngah veve ding,
Gualzawhna 'hai' a dawnte, lambang eng
sawlbang vul ni'am,

Haksatna khimzing nuai ah, lametna
abei hun ciang, Gualzawhna
khamlukhu tawh bangh zahin na
kinai hiam?

Haksatna thuak photlo in, gualzawhna
kingah theilo,
Supna, baina lo tawh zongh, lawhcinna
kingah theilo,
Gualzawhna na ngahdek lam, 'nang' thei
khalo thei,
Na lamet nawnloh laitak, na kiangah
hongtung dekta,
A haksa pen na thuaknate, na gualzawh
na'ng hi gige,

Na dinmun siapen
mah leh, Lungkia

kha peuhmah ke'n.

Author Unkown

(Don't Quit)

Gualzo Pen...

A zo dingin na ki up leh na zo ding hi.

A lel dingin na ki up
leh na lel ding hi.

Zonuam napi, na
lelhngap leh, A olpen
zongh na lel ding hi.

Na sup ngap leh na sumh takpi ding hi.

Munciteng ah,
Lung-gulhna zui-
in gualzawhna
Kingah kimciat
zaw hi.

Na khempeuh ih upna
tungah kinga hi. Midang
te' sa'ng a hoihzaw in na
ki up leh, Na hoihzaw
takpi hi.

Khantoh ding upna na neithei hi.
Pahtawina a ngahngiat
dingin, Nang le nang ki
muanna neikhol in! A
thahat zaw te leh a
tungtuang zaw te bek in,
Gualzawhna-a ngah den
uh hilo hi. 'Ka hihzo ding
hi' cih upna-anei mi
peuhmah in, khatvei teitei,
gualzawhna ngah
pelmawh ding hi.

C.W. Longenecker
(The Victor)

Alamdang Sunmang

A hizolo ding ‘thute’ a hizo dingin ngaihsun leng,
A kido zolo ding ‘gal’ dozawh ding sawm
leng,
Mikim’ thuaklah ‘haksatna’, thuakzawh
ding sawm leng,

A siangtho ‘ki-itna’ leh ‘gamtatna’
nuntaakpih leng, Mikim’ lamet
‘pahtawina’ ihngah ding tuate’
hangin.

‘Minphatna’ leh ‘gualzawhna’, ih sulzuih den ding kisam,
‘Lampi’ sau in gim mah leng, lungneu’
hetloh ding kisam,

‘A kung’ dong ihtu’n na ding, phunlo
khawllo mainawt leng,

‘Gualzawh’ nading vangletna’n, hongzuih
lam theitel thei leng,

‘Lungnopna’ leh ‘daihna’ tawh
tawldamna ih ngah ta ding. Ih
teena hih ‘leitung’ zongh, et in
honglawm zota ding,

‘Nenniamna’ leh ‘bawlsiatna’, a
thuakcip mikhat in zongh, Ngahzo
ta ding ‘pahtawina’, mikim’ lung
gulh tua zawhna, A ‘hihtheih
tawpna’ dong tawh, a hanciamna
thaman dingin.

‘Gualzawh minphat pahtawina’, sulzuih tawntung ni!
‘Lametna-abei’ zongin, lunghia’n ding
ngaihsun kei ni!

‘Lampi asau’ ha’ng zong ee, phamawh
ngaihsut tuankei ni!

‘Phunlo khawllo’ atawp dong,
mainawt in kalsuan suak ni! ‘A
hizolo’ thute mah, ‘hih zawh na’ng’
sunmang ihnei!

Don Quiote

The Impossible Dream

Tangthu Namtui

'16 kum, innkuan sung buaina tuak,
'18 kum, a nu in sihsan,
'31 kum, a sumbawlna ah tol vilvel,
'32 kum, law [upadi] sang kahnuam napi
kah zolo,
'32 kum, a nasepna pan ki khawlsak,
'32 kum, thukhun bawl dingin teelna
ngah zolo,
'33 kum, leitawi tawmin sum abawl-leh
tol vilvel leuleu,
'34 kum, thukhun bawlding teelna ngah,
'35 kum, a lawmngaihnu in sihsan,
'36 kum, pumzawm' natna vei,
'37 kum, a zuthawl tut nu in nusia,
'38 kum, a pawlpah ding mi mu zolo,

'40 kum, kiteelna ah kihel khuan ngah
zolo,
'42 kum, zi neita,
'43 kum, congress minpiakna-ah lel,
'46 kum, congress ah ki teel, Washington
tung,
'48 kum, ki teelkikna-ah lel leuleu,
'49 kum, leitang ukzaa ngahna pan ki
khawlsak,
'50 kum, a tapa in sihsan,
'51 kum, 33 kum a-a leitawi lohzo ta,
'54 kum, Senate ngah zolo,
'56 kum, Vice President ngah zolo,
'58 kum, Senate ah lel leuleu,
1860 kum, apian kum 51, acin petpet
ciang, United State kumpi dingin,
Abraham Lincoln in teelna ngah veve...

Hizaw...

Zawhlahna pen 'lelhna' hilo in, 'zawh
nailohna' hizaw!

Zawhlahna pen 'siamlohnna' hilo in,
siamna ding 'kisinna' hizaw!

Zawhlahna pen 'haina' hilo in, 'cihtakna'
khat hizaw!

Zawhlahna pen 'zumhuailo' in,
'hanciambeh' na ding hizaw!

Zawhlahna pen 'neihlohnna' hilo in,
'zon'sanlai' na hizaw!

Zawhlahna pen 'tualniamna' hilo in, 'picin
nailohna' hizaw!

Zawhlahna pen 'lungkiatna' ding hilo in,
'hanciam kik' na ding hizaw! Zawhlahna
pen 'sepzawhlohnna' hilo in, sepzawhna
ding 'thalaakna' hizaw!

Zawhlahna pen Pasian' hong 'taisatna' hilo in, 'picin ding'
hong sinsakna hizaw!

Robert Schuller

Ka Pian-na Vangkhua

Sunni tumkuan huihkhi honglaang
Tukawlneu leh kawlheita te'n
Vaibang ciah ding hunte honglaak
Vailo kuanna gam vangla pa'n
Vangkhua zuan ding
kisung liailiai Kei ka
pianna vangkhua neu
ah...

Muikhua zin kuan lawkta te tau
Pengpelek leh gamva neu te'n
Giahbuk zuan ding vabang leengkhawm
Tuk, phalbii leh khuakhal hunte
Zu leh va te'n hong langhsak zeel
Kei ka pianna vangkhua neu ah...

Zingkhua vak kuan buhal hongkhuang
Simh lengthe te hong khuang ziaiziai
Pianna tuun leh ka zua ngaih te'n
Lahmei ciim tawh zingmei tawh khawm
Mangmei neilo
lahmei zangh liang
Kei ka pianna
vangkhua neu ah...

Zingni hongsuak lummeii hong khawl
Ka tuun zua leh laizom tengtawh
Cialdawh zaang ah nihaam awikawm
Zokeu tawi-in laikuang um khawm
Mangkeu neilo zokeu
zangh liang Kei ka
painna vangkhua neu
ah...

Vailo lam zuan ma kisuan khawm
Gatam tui leh vaimim ciim te'n
Sunkhua sawt in zaitha hong-guan
Tungsun nisa vingveng nuai pa'n
Zaitha suangin hanlungciam zeel
Kei ka pianna vangkhua neu ah...

Kei ka pianna vangkhua neu khat

Zogamneu sung-gam menghmee khat
Phunglun sel in genthei liangvaih
Va bang pil leh siamsil sel liang
Lunglaulo aw pianna vangkhua
Tung Pasion in hongzuun na'n cia...

Special Dedicated to
Pakzaang vontawi Lia &
Tg...

Tuun-nu' Zogam

Zosuan zomi tuan a pupa' zotual lenna,
zogamnuam-mah nun in nuam sang ee...

Mual-le guamte asang aniam kisung
dimdiam ee, tuun-nu' zogam et in lawmna
ee...

Nim dildial in lungnop huailua ee, zu le
va zongh liibang cingin nuamsa ee...

Tuun-nu' zogam nun in-nuam na ee, neek
le dawn ding an le tui liibang cing ee...

Mimza taangza-ai lingling uh ee, tualsuak
zozu hawm liailiai-in itna khaubang suut
uh ee...

Nopna dahna ki puakpih uh ee, itna
masuan pupa' nunzia ngaih ngimnam na

ee...

Vabang apil siamsin momno meiibang
khang ee, Sianmang' melma daibang
theutah ee...

Pupa' patsa itna ngaihna tuibangin kiam
ee, Sianmang' deihna ngobang langhlah
ee...

Sianvontawi te'n zogam zuunlah ee,
munci teng ah vabang leensan lai uh ee...
Zuun lah zogam lobang tulta ee, singbang
keu in lungzuan khuangaih huai lua ee...
Zuu le va'n zongh lungngai ta ee, pupa'
zogam tual in khia in vabang leensan ta
uh ee...

A dumdildial mualkuam te zong ee, keu
ngiungeu in gilkiel dangtaak ngimnam zo
ee...

Tuun-nu' zogam gilkiel dangtaak
ngimnam khin ee, von aneilo meigong nu
bang ee...

Tuun-nu luankhi tawh ki dimin
vulningniang ta ee, anul ding vonte a

ngak hi ee...

Vonte'n lah tuun-nu melbang ma ee, sing-
gamlei ah zaitha thehthang san lai ee...

Tuun-nu lakmai zeebangzum ta ee, guallai
ah a vonte'n tawisang lah sa ee...

Tuun-nu' anglum thebang hawmta ee, a
vonte mubang ngai-in sawlbangvul
khakham veilawh ee...

Tuun-nu' kahna aw ging semsem ee, a
tulsa na tuu'n saulim hongzuun aw ci ee...

Ih zogam tuun-nu' luankhi anul
ding nang mah-hi cia... A Tulsa
tuun-nu' zogam a zuun ding nang
mah-hi cia..

Pupa' patsa ki-itna -a kem ding nang mah-
hi cia...

Pu pa' neihsa cihtakna -a nei ding nang mah-hi cia...

Etlawm mualkuam zogam nuam a phut
ding nang mah-hi cia...

Singkung lopa zuu leh va-a it ding nang
mah-hi cia...

Sian hong piak ih zogam lei zo vontawi lia
leh tang te'n, zuun kei leeng kuan zuun

mawk ding...

Hih Laibu Muhnate

“Hibang laibu Zomite’ sungah agelh ki om mello mai hi. Leitung mihau, mipilte in, amau tuahkhak phutkhakte uh panin a muhkhiat, a luangkha thucin thuhoih tampitak hong theisak hi. Zomi, Zolai a simthei khempeuh a dingin, a simhuai leh a simtaak mahmah laibu hoih khat hi dingin ka um hi.”

Dr. Zam Dong, Ph.D.

“Lametbei, lungkia, dongtuak leh mailam ding abing cip a kisa mite a dingin, hih laibu pen ‘**Vantung mite**’ lamlahna **laibu**’ kici thei ding hi...”

Saya Gul Suan Lian, M.Sc.

“Lamdang mahmah mawk hi. Hih laibu simphot lehang kikhawl thei nawnlo mawk hi. Hoih ngaungau in khum ngaungau zen hi...”

S/m Vung Khan Huai, M.Div. (BBC-Tedim)

Hi laibu ahiah leh hoih mahmah in, laigualh dan zongh simnuam mahmah hi. Sumpidon sung nangawn aa kasim laibu khat hi-in, Sermonnate ah hong huh thei ding leh thalaakna dingin a manpha mahmah laibu khat ahi hi.

**Rev. Job Nang Khaw Thawng (Vandaitui Literature
Ministry)**

Khangnote' thalaak theih nading laibu kician Zomite' sungah hibek mah a om cih ding ahi hi. Sim suk lehang, laigelhpa in laibu tampi a simkhin ngei ahih lam hong kilang aa, a sunga thute zongh ahi takpi vive ahih manin thangah huai diak sa in manpha kasa hi.

Rev. Go Lian Thang, M.Th.

Laigelhpa

Tuang Za Khai pen Pakzaang khua-ah ateeng, Pu Rev. Thawn Za Nang (Guite) leh Pi Ciang Za Niang (Nekgen) te in tanu 4 leh tapa 3 aneih sung panin nautum pen ahi hi. Pakzaang pan Zolai tan 4 a zawh ciangin, Mualbeem Manglai Sang (middle school) ah tan 5 pan kipan va kahin, Mualbeem Middle School pen ama kah sungin Private High School in kilaih ahih manin, tan 9 dong kah suak hi. Tan 10 zong Mualbeem mah ah akah suak ding hi aa, a sanggampa Rev. Do Khua Mang' deihsakna tawh Tedim, Lawibual sangpi ah laih hi. Mualbeem ah akah lai-in laivuan sim phialin a khatna khawngta-angah den hiven, Tedim atun ciang ngah zo nawnlo in, sangnaupang 63 sungah a 32 na khawngah om suk velval zel hi. Tua-ahih manin, tua kumin tan 10 gualzawhna ngah zo dingin kilamen lo hi napi, gualzawhna ngah hi. Tan 10 azawh hangin, University kah zo dingin a kingaihsut zawhloh laitak un, Kawlpi ah ateeng api (apa' nu sanggam nu) te (tu laitak Dr. Liang Sian Mung-TTC, Academic Dean) in, inn pan hong kah hen ci-in deihsakna tawh sam ahih manin, lungdamtak in pai pah in, Kalay University ah sang azom thei suak hi. Kalay University ah sang akah sung khempeuh apite' inn, a inn bangin zangin, sum peek khat zong pialo hi. Kalay University panin Botany tawh BSc (Hons) leh MSc (credit) te a zawh khit ciangin, Central China Normal University ah Chinese Government Scholarship tawh PhD kahna ding full scholarship ngah aa, Molecular Biology lam bul sinin kum 3 leh ½ sungin PhD zo hi. Kalay University ah Lecturer asep sung, February 2021 in Kawlgam galkapte in thuneihna abuluh huhau in a nasepna pan tawlna hi.

Tu laitak, The Hebrew University of Jerusalem, Faculty of Agriculture, Food and Environment ah Postdoctoral Research

Fellow in a om laitak ahi hi. 2016 pan kipanin Environmental Biotechnology Network (EBNet), UK; 2017 panin Bioenergy Society of Singapore (BESS), Singapore; 2022 panin The New York Academy of Sciences (NYAS), USA, leh Member of the Institute of Biology, UK te ah member in kihel hi. Magazine leh laihawm tuamtuanah ah lai gelh zelzelin, 2014 kumin 'Ahi Zolo Omlo' cih laibu gelh in hawmkhia hi. Scientific research paper a kici kancianna bulphuh article zong (8) gelh khinin ki hawmkhiat (published) sak khin hi. Tu laitak a it azi Sitni Cing Sen Zen tawh Pasian' piak tanu khat leh tapa khat aneih laitak uh ahi hi.

About The Author

Tuang Za Khai



Tuang Za Khai pen Pakzaang khua-ah ateeng, Pu Rev. Thawn Za Nang (Guite) leh Pi Ciang Za Niang (Nekgen) te in tanu 4 leh tapa 3 aneih sung panin nautum pen ahi hi. Pakzaang pan Zolai tan 4 a zawh ciangin, Mualbeem Manglai Sang (middle school) ah tan 5 pan kipan va kahin, Mualbeem Middle School pen ama kah sungin Private High School in kilaih ahih manin, tan 9 dong kah suak hi. Tan 10 zong Mualbeem mah ah akah suak ding hi aa, a sanggampa Rev. Do Khua Mang' deihsakna tawh Tedim, Lawibual sangpi ah laihi. Mualbeem ah akah lai-in laivuan sim phialin a khatna khawngta-angah den hiven, Tedim atun ciang ngah zo nawnlo in, sangnaupang 63 sungah a 32 na khawngah om suk velval zel hi. Tua-ahih manin, tua kumin tan 10 gualzawhna ngah zo dingin kilamen lo hi napi, gualzawhna ngah hi. Tan 10 azawh hangin, University kah zo dingin a kingaihsut zawhloh laitak un, Kawlpi ah ateeng api (apa' nu sanggam nu) te (tu laitak Dr. Liang Sian Mung-TTC, Academic Dean) in, inn pan hong kah hen ci-in deihsakna tawh sam ahih manin, lungdamtak in pai pah in, Kalay University

ah sang azom thei suak hi. Kalay University ah sang akah sung khempeuh apite' inn, a inn bangin zangin, sum peek khat zong pialo hi. Kalay University panin Botany tawh BSc (Hons) leh MSc (credit) te a zawh khit ciangin, Central China Normal University ah Chinese Government Scholarship tawh PhD kahna ding full scholarship ngah aa, Molecular Biology lam bul sinin kum 3 leh ½ sungin PhD zo hi. Kalay University ah Lecturer asepsung, February 2021 in Kawlgam galkapte in thuneihna abuluh huhau in a nasepna pan tawlna hi. Tu laitak, The Hebrew University of Jerusalem, Faculty of Agriculture, Food and Environment ah Postdoctoral Research Fellow in a om laitak ahi hi. 2016 pan kipanin Environmental Biotechnology Network (EBNet), UK; 2017 panin Bioenergy Society of Singapore (BESS), Singapore; 2022 panin The New York Academy of Sciences (NYAS), USA, leh Member of the Institute of Biology, UK te ah member in kihel hi. Magazine leh laihawm tuamtumte ah lai gelh zelzelin, 2014 kumin 'Ahi Zolo Omlo' cih laibu gelh in hawmkhia hi. Scientific research paper a kici kancianna bulphuh article zong (8) gelh khinin ki hawmkhiat (published) sak khin hi. Tu laitak a it azi Sitni Cing Sen Zen tawh Pasian' piak tanu khat leh tapa khat aneih laitak uh ahi hi. Books By This Author Cidamna Ding Singkung Manpha Pawlkhat Hih 'Cidamna Ding Singkung Manpha Pawlkhat' cih laibu sungah 'Singkung lopa nam 20' te' manphatna leh a nungthute kigelh hi. Tua bangin singkung lopate' manphatna-a kigelh ciangin, ngaihsut mawkmawk thu, upmawh, phuaktawm, leh lamet thute bulphuh in kigelhlo aa, 'scientific research' a kici, hithei takpi maw, hithei takpilo, maan takpi maw, maan takpilo, cih kician takin kancianna (research) panin a kimukhia thute bulphuh in kigelh hi

Hih laibu sungah: Kuhku (Siris), Lim/Tawsaw (Oak), Zawngtah (Stink Bean), Baklawng (Indian Trumplet), Tama (Neem), Apple, Thawhbat (Avocado), Nahtang (Banana), Patkung (Cotton), Leenggah (Grape), Sakol Khekhap (Pennywort), Aisan (Tumeric), Phulun/Lothang San (Onion), Lothang Kaang (Garlic), Gatam (Jack Bean), Ankambul San (Carrot), Rosemary, Lonamsia (Mint), Umpawng (Chayote), leh Thaksing (Lemongrass) te' manphatna kigelh hi.

Singkung lopate' manphatna cih sungah, kiim le paam tung tawnin phattuumna hong piak theih thute leh zatui zaha dingin a kizat theihna thute kihel hi. Tuata sung panin, cidamna ding hong piak theih thute kibulphuh diak aa, koici zat ding cih dongin kigelh hi. A diakin, sikhang, zunkhum, lungtangna, tuapna, gilsungna, leh cancer natnate kibulphuh in, tua natnate a damna dingin ahuh thei singkung lopate sung pan mikimin a kithei diak singkung lopate akiteng khia-ahi hi. Tua singkung lopate' manphatna bek hilo in, a ciinzia ding leh a khoi zia ding aa kipan, acii nam bangzah om cih dongin kigelh ahih manin, a sin pah nuamte leh, singkung lopate' thu a lunglutte' a dingin manpha mahmah ding hi.

Praise For Author

Hibang laibu Zomite' sungah agelh ki om mello mai hi. Leitung mihau, mipilte in, amau tuahkhak phutkhakte uh panin a muhkhiat, a luangkhia thucin thuhoih tampitak hong theisak hi. Zomi, Zolai a simthei khempeuh a dingin, a simhuai leh a simtaak mahmah laibu hoih khat hi dingin ka um hi.

- Zam Dong, PhD

Khangnote' thalaak theih nading laibu kician Zomite' sungah hibek mah a om cih ding ahi hi. Sim suk lehang, laigelhpa in laibu tampi a simkhin ngei ahih lam hong kilang aa, a sunga thute zongh ahi takpi vive ahih manin thangah huai diak sa in manpha kasa hi.

- Go Lian Thang, MTh

Hi laibu ahih leh hoih mahmah in, laigualh dan zongh simnuam mahmah hi. Sumpidon sung nangawn aa kasim laibu khat hi-in, Sermonnate ah hong huh thei ding leh thalaakna dingin a manpha mahmah laibu khat ahi hi.

- Job Thawngno

Lametbei, lungkia, dongtuak leh mailam ding abing cip a kisa mite a dingin, hih laibu pen 'Vantung mite' lamlahna laibu' kici thei ding hi...

- Gul Suan Lian, MSc

Lamdang mahmah mawk hi. Hih laibu simphot lehang kikhawl thei nawnlo mawk hi. Hoih ngaungau in khum ngaungau zen hi...

- Vung Khan Huai, MDiv

Books By This Author

Cidamna Ding Singkung Manpha Pawlkhat

Hih 'Cidamna Ding Singkung Manpha Pawlkhat' cih laibu sungah 'Singkung lopa nam 20' te' manphatna leh a nungthute kigelh hi. Tua bangin singkung lopate' manphatna-a kigelh ciangin, ngaihsut mawkmawk thu, upmawh, phuaktawm, leh lamet thute bulphuh in kigelhlo aa, 'scientific research' a kici, hithei takpi maw, hithei takpilo, maan takpi maw, maan takpilo, cih kician takin kancianna (research) panin a kimukhia thute bulphuh in kigelh hi

Hih laibu sungah: Kuhku (Siris), Lim/Tawsaw (Oak), Zawngtah (Stink Bean), Baklawng (Indian Trumplet), Tama (Neem), Apple, Thawhbat (Avocado), Nahtang (Banana), Patkung (Cotton), Leenggah (Grape), Sakol Khekhap (Pennywort), Aisan (Tumeric), Phulun/Lothang San (Onion), Lothang Kaang (Garlic), Gatam (Jack Bean), Ankambul San (Carrot), Rosemary, Lonamsia (Mint), Umpawng (Chayote), leh Thaksing (Lemongrass) te' manphatna kigelh hi.

Singkung lopate' manphatna cih sungah, kiim le paam tung tawnin

phattuumna hong piak theih thute leh zatui zaha dingin a kizat theihna thute kihel hi. Tuat sung panin, cidamna ding hong piak theih thute kibulphuh diak aa, koici zat ding cih dongin kigelh hi. A diakin, sikhang, zunkhum, lungtangna, tuapna, gilsungna, leh cancer natnate kibulphuh in, tua natnate a damna dingin ahuh thei singkung lopate sung pan mikimin a kithei diak singkung lopate akiteng khia-ahi hi. Tua singkung lopate' manphatna bek hilo in, a ciinzia ding leh a khoi zia ding aa kipan, acii nam bangzah om cih dongin kigelh ahih manin, a sin pah nuamte leh, singkung lopate' thu a lunglutte' a dingin manpha mahmah ding hi.